

Ekwo

Awufu

Mkpamehu ndu Ízurelu

1 ¹Waa epha unwu Ízurelu, tso Jiékọpu laa alì ndu Ijiputu baa. Onyemone dutaru ndibe iya lashja eka ono. ²Rúbenu; waa Simiyonu; waa Lívayi; waa Jiuda; ³waa Isaka; waa Zebulun; waa Benjaminu; ⁴waa Danu; waa Nafutali; waa Gadu; waa Asha. ⁵Oshilokpa Jiékọpu tukoru du ukporo umadzu eto l'umadzu iri. Jiósefu nọhawaa anono l'alì ndu Ijiputu.

⁶Tobudu iya bu; Jiósefu yee unwunna iya g'ephe ha; waa ogbo k'ono tukowa nwushihukota. ⁷Ole ndu Ízurelu azushiele-a; bya abarahu. Ephe zushiru kwatakpo paa eka apaa; k'ophu ephe tukoerupho alì ono sweta.

⁸Noo ya; onye eze ophuu, bu onye ta amadu ke Jiósefu amama ophu bya aburu eze le Ijiputu. ⁹Noo ya; o su ndu alì iya: “Unu lenu le ndu Ízurelu akaakwa anyi shii k'ophu ephe e-mechaa ka anyi okpehu. ¹⁰Unu byakwa g'anyi kwaberu phe enya. Odumeka be ephe a-kabakwa evuvu. O -buru la nonyaru; ogo daa be ephe e-tsokwaru ndu ohogu anyi bya etsoo anyi ogo; gbado eka-a lashja.”

¹¹Oo ya bu; ndu Ijiputu bya ahota nemadzu; mee phe udumali; su g'ephe kebutaje ndu Ízurelu g'ephe je ozi mkponwu-ehu. Ephe bya akpa mkpukpu Pitomu; waa mkpukpu Ramesesu go buru mkpukpu eka Fero e-dobeje iphe. ¹²A -ka phe akpa eh; ephe agbe ka azushi ka lotu dzuru ekameka. Ndu Ijiputu kabakpooro atsù ndu Ízurelu ebvu; ¹³bya akabakpooro eme g'ephe jeje ozi mkponwu-ehu. ¹⁴Ephe kpabe phe ozi; gude mee ndzu phe buru phe aphu; mee g'ephe yoshi eja buloku. Teme ephe aghakwa pho eja mini; mewaro ozi, no-gbua legu phe. Iphe, bukota ozi, ndu Ijiputu kebutaru phe g'ephe je bukotaru ozi mkponwu-ehu.

¹⁵Eze ndu Ijiputu su unwanyi, eswije ndu Hiburu ime, epha phe bu Shifura; waa Puwa: ¹⁶“Unu -nodu eswi unwanyi ndu Hiburu ime m'ephe nodu anwu nwa; ephe -nwue ya pho; unu nyoje phe. O -buru nwoke; unu gbuje iya; teke o bu nwata nwany; unu hajekwa iya g'ogodu ndzu!”

17Obenu lẹ ndu eswije ime ono atsū Chileke ebvu; ophu ephe emejedu iphe ono, eze Ijiputu ziru phe ono. Ephe nọdu ahajẹ nwa-nwoke; ephe anọdu ndzū. 18Noo ya; Eze ndu Ijiputu bya ekukọo ndu eswije ime ono; bya asū phe: “?Bū gūnu bẹ unu meru iphe, dū ẹgube-a? ?Bū gūnu kparū iphe unu ahajẹ unwegirima unwoke; ephe anọdu ndzū?”

19Unwanyi eswije ime ono sū Fero: “Tī madū l'unwanyi Hiburu ta adūdu gẹ kẹ ndu Ijiputu. Okpehu dū phe. O nọdu abujeru; ndu eswije ime -bya abyarwuta ẹka ono; ephe ezedawaa.”

20Oo ya bụ; Chileke meeru ndu eswije ime ono iphe-oma. Ndu Ízurelú nọdu evu; bya akakporo aka l'otu. 21Chileke mekwaphọ g'unwu ndu eswije ime ono ka l'otu; kele ephe atsū iya ebvu.

22Noo ya; Fero bya atọaru ndu nkiya g'ephe ha ekemu sū: “O -buru lẹ ndu Hiburu nwuru nwa; o -buru nwoke; g'e jeje echie ya l'enyimu Nayilú! Teke o bụ nwanyi l'a haa ya g'o nọdu ndzū!”

Anwunwu Mosisu

2 1Noo ya; nwoke, shi l'onulo Lívayi bya alúta nwanyi, shikwaphọ l'onulo Lívayi. 2Nwanyi ono bya atsuta ime; bya nwua nwa nwoke. O hūmaepho lẹ nwata ono manukaru mma; o hee ya l'edomi onwa ẹto. 3O nonyaa; ophu o duedu ike domikota iya edomi. O bya egbuta ẹji gude kparū iya nkata; bya echia ya urwa mbekee. O bya ekuru nwata ono ye l'ime nkata ono; pata je edobe l'aguga enyimu Nayilú ẹka ẹji zeru. 4Nwune iya nwanyi bya eje apfuru ụzenya g'o maru iphe, l'e-eme nwata ono.

5Noo ya; nwa Fero kẹ nwanyi jeshia awu ẹhu l'enyimu Nayilú ono. Yele unwumgboko, ejeru iya ozi swiru tuko eje l'aguga enyimu ono. O hūma nkata ono g'o nọ l'ime ẹji ono; bya ezia ohu iya nwamgboko g'o je ewotaeduru iya ya. 6O kpuhaa ya; bya ahuma nwata ono. Nwata ono nọdu ara ẹkwa; imemini iya dū iya. O sū: “O kwa nwa onye Hiburu bẹ o bụ!”

7Nwune nwata ono kẹ nwanyi sū nwatibe Fero ono: “?Bū gẹ mu je ekuaru ngu nwanyi Hiburu, e-heru ngu nwata ono?”

8O sū iya ngwa; g'o jenū. Nwamgboko ono tugbua je ekua nene nwata ono. 9Nwada Fero sū ne nwata ono g'o kuta nwata ono je ehufataru iya; gẹ ya pfua ya ugwo. Noo ya; nwanyi ono bya ekuta nwata ono je eeha-haa. 10Nwata ono vutaepho; o duta iya dulaaru nwatibe Fero ono; o buru nwa iya. O woru iya gua Mosisu; kele o sūru l'oo nwata, ya gutaru lẹ mini.

Mosisu agba ala Midiyanu

11Noo ya; o rwua ujiku lanu gẹ Mosisu vutacharu; o jeshia ahuma ndu nkiya l'eka ono, ephe eje ozi mkponwu-ehu ono. O hūma onye Ijiputu ẹka oochi onye Hiburu iphe, bụ onye lanu l'unwunna iya. 12O bya achika enya ibe k'ẹbo ẹbo; ophu o dudu onye o hūmaru. O chigbua onye Ijiputu

ono bya egude ẹja kpamia ya. ¹³O -rwua lẹ nchitabọhu iya; ọ tųgbukwa ọzo je ahuma ndu Hiburu umadzu labọ ẹka ephe alwu ọgu. Ọ sų onye ọphu achọ opfu: “?Denu g’ọ nwuru iichi onye Hiburu ibe ngu iphe?”

¹⁴Onye k’ono sų iya: “?Bų onye meru ngu onye-ishi; waa onye-ikpe anyi? Tọo ?iimewaa g’i gbua mu g’i gburu onye Ijiputu phọ?” Noo ya; ndzų gųahaa Mosisu; ọ rịa sų: “Iphe-a, mu meru-a bẹ a -gbẹ madzuchawaru nų.”

¹⁵Fero nųmaepho iphe ono bya emeahaa g’o gbua Mosisu. Mosisu gbafu l’ibe Fero gbaru lashia alį ndu Midiyanu je eburu. O jerwua bya anọdu anọdu l’aguga welu. ¹⁶Noo ya; onye uke ndu Midiyanu nweru unwumbgoko ẹsaa. Ephe bya lẹ welu ono bya ekuta mini ye l’iphe, eeyejeru anų mini g’aturu ibe nna phẹ ngua. ¹⁷O nweru ndu ọzo, eche aturu, byaru bya achifu phẹ. Noo ya; Mosisu gbalihu bya eyetaru phẹ ẹka; kuta mini doberu aturu phẹ.

¹⁸Unwumbgoko ono lapfuepho nna phẹ, bų Ruwelu; ọ sų phẹ: “?Denu g’ọ nwuru unu lwaru egwegwa egube-a ntanu-a?”

¹⁹Ephe sų iya l’o nwekwaru nwoke Ijiputu, nafutaru phẹ l’ẹka ndu eche aturu ndu ọphu. Teme ọ bya esetafukwapho mini doberu aturu phẹ; ọ ngua.

²⁰O sų unwada iya: “?Denuhununu nwoke ọbu? ?Bų gunu kparu iphe, unu paru iya haa? Unu je ekua ya g’ọ bya eria nri.”

²¹Mosisu kweta; yee nwoke ono buru. Nwoke ono bya ekuru nwa iya nwanyi, bų Zipora kee Mosisu; ọ luru. ²²Zipora bya eyeru iya nwa nwoke. Mosisu gua ya Geshomu; noo kele Mosisu suru: “Mu bų onye lwaru alwalwa l’alį ndu ọhozo.”

²³A nonyakpoepho; eze ndu Ijiputu nwuhu. Ndu İzurelu nọdu atsu pfupfufu; echi mkpu; ara g’e yeru phẹ ẹka l’iphe-ẹhuka ono, ephe eje l’abubu ono, ephe bų ohu ono. Ẹkwa ono, ephe ara ono rwua Chileke nchi. ²⁴Chileke numa ude ono, ephe atsu ono; bya anyata ọgbandzu ephe lẹ Ẹbirihamu; waa Ayizaku; waa Jiẹkọpu. ²⁵Chileke bya aghaa ẹnya; lee ndu İzurelu; bya ariahaa ọriri ẹhu phẹ.

Ọku, l’enwu l’irwu oshi

3 ¹No iya; Mosisu nọdu eche aturu Jieturo, bų nna nyee ya; bya aburu onye uke ndu Midiyanu. O -rwua ujiku lanų; ọ chita aturu ono gude jeshia ẹka dų ẹnya l’echiegu. O jee jasų o jerwua l’ubvu Horẹbu, bų iya bų ubvu Chileke. ²Ọ buru l’ẹka ono bẹ Ojozi Chipfu gude ọku, enwu l’irwu oshi hee ya l’atatiphu. Mosisu huma l’oku ono enwu l’irwu oshi ono; obenu l’o to tsupyashidu iya. ³Ọo ya bų; Mosisu sų: “Ge mu bya ejekubeekwa iphe ọwa-a ntse; mbų iphe ọwa-a, tufuru ẹhu, anwu nų-a; ge mu maekwaru iphe, kparu iphe, ọku ono te etsupyashidu irwu ono.”

⁴Chipfu humaepho l’ọ kpiritawaru ntse g’o lerweta ẹnya; Chileke shi l’irwu ono kua ya oku sų: “Mosisu! Mosisu!”

Mósisu za ɛnu; sù: “Wakwa mu nọ l'èka-a.”

⁵Chileke sù iya: “Ta kpìritabaekwaru ntse ọzobaa! Yefù akpọkpa ngu; noo kẹle ẹka ono, ì p̄furu ono bụ alì, dū nsọ.” ⁶Sù iya: “Ọ kwa m̀bèdua bụ Chileke kẹ nna ngu; b̄rú Chileke kẹ Ébirihamu; b̄rú Chileke kẹ Áyizaku; bya ab̄rú Chileke kẹ Jiékp̄u.” Mósisu n̄mae ya p̄họ; o wohaa ip̄hu; kẹle ndz̄u ele Chileke ɛnya watar̄u iya agugu.

⁷To b̄du iya b̄; Chipfu sù: “Mu h̄mawaru ip̄he-ɛhuka, ndibe mu eje l'alì ndu Ijiputu. Mu n̄mawa mkpu, ɛp̄he echi sù g'a dz̄ota p̄hẹ l'èka ndu udumalì; t̄eme ip̄he-ɛhuka, ɛp̄he eje r̄wuwa mu l'èhu. ⁸Ọo ya b̄ lẹ mu byawaru ḡe mu naf̄uta p̄hẹ l'èka ndu Ijiputu; duru p̄hẹ laa l'alì, dū ree; bya ad̄u shii; mb̄u alì mini ɛra-eswi; waa man̄-ɛnwu jiru kẹ pȳimu pȳimu; mb̄u l'alì ndu Kénanu; waa ndu Hetu; waa kẹ ndu Am̄oru; waa kẹ ndu Pérezu; waa kẹ ndu Hevu; t̄eme waa kẹ ndu Jiebusu. ⁹Nta-a bẹ mkpu, ndu Ízuru l'echi r̄wuwaru mu lẹ nchi; t̄eme mu h̄mawaa ḡe ndu Ijiputu gude akpa p̄hẹ ɛhu. ¹⁰Ọo ya b̄; lẹ nta-a bẹ mu ezi ngu g'i jepfu Fero je edufuta ndibe mu, b̄ ndu Ízuru l'alì Ijiputu!”

¹¹Mósisu sù Chileke: “?B̄u onye bẹ mu b̄ k'ẹje ap̄furu Fero l'ip̄hu; je edufuta ndu Ízuru l'alì Ijiputu?”

¹²Chileke sù iya: “Mu e-swiru ngu eswiru. T̄eme waa ip̄he-ohubama, ii-gude maru l'ọo m̀bèdua ziru ngu ono baa: I -d̄ufutaɛpho ndu ono lẹ Ijiputu bẹ unu a-baru m̄be Chileke ẹja l'úbv̄u-a.”

¹³Mósisu sù Chileke: “Ọ -b̄kwanuru lẹ mu jepfuru ndu Ízuru je as̄u p̄hẹ: ‘Chileke kẹ nna unu p̄hẹ zikwaru mu ḡe mu byapfuta unu.’ ɛp̄he -j̄ikwanua mu sù: ‘?Epha ngu aza ḡunu?’ ?B̄u ḡunu bẹ mu e-yeru p̄hẹ ọnu?”

¹⁴Chileke sù Mósisu: “Mu b̄ onye mu b̄. Ip̄he, ii-p̄furu ndu Ízuru b̄ l'ọo m̀bèdua, b̄ Chipfu ziru ngu g'i byapfuta p̄hẹ.”

¹⁵Chileke s̄kwapho ḡe Mósisu sù ndu Ízuru: “Ọo Chipfu, b̄ Chileke kẹ nna unu p̄hẹ; mb̄u onye b̄ Chileke kẹ Ébirihamu; b̄rú Chileke kẹ Áyizaku; bya ab̄rú Chileke kẹ Jiékp̄u bẹ ziru ngu g'i byapfuta p̄hẹ. Noo ɛpha mu b̄ ono jas̄u lẹ tuutuutuu lẹ m̄imiimii. Epha ono bẹ ogbo m̄e ogbo e-gude maru mu.”

¹⁶“T̄uḡbua je ekuk̄o ndu b̄ ọgerenya lẹ Ízuru; sù p̄hẹ lẹ Chipfu, b̄ Chileke kẹ nna unu p̄hẹ; byapfutaru ngu; mb̄u onye ono, b̄ Chileke kẹ Ébirihamu; b̄rú Chileke kẹ Áyizaku; bya ab̄rú Chileke kẹ Jiékp̄u. Waa ip̄he o p̄furu baa: ‘Mu lewaru unu ɛnya; h̄ma ɛgube ip̄he, eeme unu lẹ Ijiputu. ¹⁷Mu kwewaa ukwe lẹ mu e-d̄ufuta unu l'ip̄he-ɛhuka, unu eje lẹ Ijiputu; duru unu laa alì ndu Kénanu; waa kẹ ndu Hetu; waa kẹ ndu Am̄oru; waa kẹ ndu Pérezu; waa kẹ ndu Hevu; t̄eme waa kẹ ndu Jiebusu; alì, mini ɛra-eswi; waa man̄-ɛnwu as̄o gborogboro.’

¹⁸“Ndu b̄ ọgerenya Ízuru bẹ a-ngab̄eru ngu-a nchi. Ọo ya b̄; gu-bedua unu lẹ ndu b̄ ọgerenya at̄uko sw̄iru jepfu eze ndu Ijiputu je as̄u iya: ‘Chipfu, b̄ Chileke ndu Hiburu bẹ byapfutakwaru anyi. Hanaa anyi

g'anyi jee ije ujiku ẹto; lufu l'echiegu je agwaa Chipfu, bu Chileke anyi.'
 19Ole mu makwaru-a l'eze ndu Ijiputu te ekwedu g'unu je; gbahaa l'e meru iya l'okpehu. 20Oo ya bu le mu a-machi eka mu; gude iphe, du biribiri, mu e-me le Ijiputu nua phe chiipfuu. Iphe ono -mechaepfo be oo-kwechaa haa unu g'unu lashia.

21“Mu e-me ge ndu Izurelu-a du ndu Ijiputu l'obu; k'ophu bu; unu -lashiepho; unu ta agbaduru eka. 22Nwanyi, nonu a-su onye obutobu iya; ozoo nwanyi, bu l'ulo iya g'o nu iya iphe, e meru le mkpola-ochaa; waa ophu e meru le mkpola-ododo; waa uwe, unu e-ye unwegirima unu. Oo ya bu unu eshi nno kwaa iphe ndu Ijiputu l'okwata gude lashia.”

Iphe-ohumalenya, Mosisu e-me

4 1Mosisu su: “?O -bukwanuru l'ephe te kwetaduru iphe, mu pfuru; ozoo l'ephe te ekwedu ngaberu mu nchi; su l'oo uka le Chipfu ta abyapfutaduru mu-e?”

2Oo ya bu; Chipfu jia ya; su: “?Bu gunu be i gude l'eka ono?”

O su iya l'o kwa mgboro.

3Chipfu su iya: “?ogboedu iya l'ali!”

O togbo iya. O ghoo agwo. O ye okpa l'oso. 4Chipfu su iya: “Machia eka gude iya le mgbodzu!” Mosisu bya amachia eka; zu agwo ono. O nodu iya l'eka; gh-zia buru mgboro g'o shi buru. 5Chipfu su iya: “Mee iphe-a gude mee g'ephe kweta le Chipfu, bu Chileke ke nna phe; mbu onye ono, bu Chileke ke Ebirhamu; buru Chileke ke Ayizaku; bya aburu Chileke ke Jiekopu be byapfutaru ngu nu.”

6Chipfu byakwa asu Mosisu ozo: “Nwua eka le mkputepho ngu!” Mosisu bya eworu eka ye le mkputepho. O wofutashia eka; ekpenta nmawa iya eka swokoswoko; eka chahwa iya roboo.

7Chileke su iya: “Ngwa; yephu iya azu le mkputepho ngu!” Tobudu iya bu; Mosisu bya eyephu eka iya azu le mkputepho iya ono. O wofutashia ya; ekpenta ono mishihuwa; mbu eka dukotawa iya g'ehu iya ibe iya ophu du.

8Noo ya; Chipfu su: “O -buru l'ephe te ekwetadu nkengu; ozoo l'ephe ta angabeduru ngu nchi l'iphe-ohumalenya ke mbu pho be ephe e-kweta-a k'ebo-a. 9Obenu o -buru l'ephe te ekwetaduru; ozoo l'ephe ta angabeduru ngu nchi l'iphe-ohumalenya labo-a; je ekuta mini l'enyimu Nayilu; bya awushi l'ali okponku. Mini ono, i kutaru l'enyimu ono a-gho mee l'ali eka ono.”

10Mosisu su Chipfu; “Oowaa Nnajiuphu; mu ta amakwa g'aasaje opfu. Eshikpo le mbu bya aduru nta-a, iipfu eyeru mube onye-ozu ngu-a be mu buepho onye epfu deneshii bya aburu onye epfu lonu oku.”

11Chipfu su iya: “?Bu onye meru onu nemadzu? ?Bu onye emeje nemadzu l'oda nkuchi; ozo onu kpurukudukuu? ?Bu onye emeje nemadzu

l'oophu uto; ọzoo g'ọ tsua ishi? ?Tọbudu mbedua, bu Chipfu? ¹²Ngwa je! Mu e-yetaru ngu-a eka g'i pfua opfu; bya ezikwa ngu pho iphe, ii-pfu.”

¹³Obenu le Mosisu suru: “Jiko Nnajiuphu mu; zia ya ro onye ozo g'o jee.”

¹⁴Noo ya; Mosisu mee; ehu ghuahaa Chipfu eghu. O su Mosisu: “?Nwune ngu, bukwanu Eronu, bu oshilokpa Liviayi-e? Mu maru le yebedua maru g'epfu opfu. O noakwa l'uzo eka oboya ngu ndzuta. Ozo bu l'obu a-tso iya utso shii me o -huma ngu. ¹⁵Ii-pfuje yeru iya; karu iya iphe, oo-pfu. Mu a-nodua eyeru unu n'ebo eka l'epfu opfu; teme o buru mbedua a-nodu ezije unu iphe, unu e-meje. ¹⁶Oo Eronu be e-pfuchitajeru ngu opfu l'atatiphu ndu Izurelu. Mbụ l'oo-duepho g'ọ bu yebedua bu onu ngu. Teme li due ya pho gi bu Chileke. ¹⁷Ole o g'i gude mgboro-a, i gude l'eka-a; k'ophu ii-gude iya meje iphe-ohumalenya-a.”

Mosisu ala azu le Ijiputu

¹⁸Oo ya bu; Mosisu bya ejepfu Jieturo, bu ogo iya bya asu iya g'o haa ya ge ya jepfu ndibe phe l'ali ndu Ijiputu je amaru ?ephe no-dzukwaduru-a ndzu?

Jieturo kweta bya asu iya g'o tokwa ehu.

¹⁹Teke ono be Chipfu nohawa l'ali ndu Midiyanu; su Mosisu: “Tugbua laphu azu l'ali ndu Ijiputu; noo kele iphe, bu ndu ono, shi acho ndzu ngu ono nwushihuchawaru.” ²⁰Oo ya bu; Mosisu bya eduta nyee ya; waa unwu iya; ephe no-koru l'eli nkafu-igara. O bya ewota mgboro Chileke ono gude l'eka; o buru phe ala ali Ijiputu.

²¹Chipfu su Mosisu: “I -laepho Ijiputu; tukokwa iphe, du biribiri ono, mu yeru ngu l'eka g'i mee ono mekota l'iphu Fero. Ole mu a-kpochi iya okpoma akpo-chi; k'ophu o too kwedu aha ndu ono g'ephe la. ²²Iphe, ii-pfuru Fero bu le mube Chipfu suru l'oo Izurelu bu okpara mu. ²³Mu pfuwaru ngu su gi haa okpara mu ono g'o tugbua; k'ophu oo-je abaru mu eja. I -jika li ti hadu iya g'o tugbua be mu e-gbukwa okpara nkengu.”

²⁴Noo ya; o rwua l'uzo eka ephe kwaru; Chipfu byapfuta Mosisu bya emeahaa g'o gbua ya. ²⁵Zipora wota mkpuma, atsụ nkọ; bya ebuta akpapi nwa iya bya edenyi Mosisu l'okpa su iya: “Nta-a be anyi lūwaru l'ehu mee.” ²⁶Oo ya bu; Chipfu haa ya. Teke ono, Zipora suru l'ephe lūwaru l'ehu mee be iphe, oorwu eka bu k'ebu ubvu.

²⁷Chipfu su Eronu g'o je lechiegu je agba Mosisu ndzuta! Oo ya bu; Eronu gbapfu Mosisu l'ubvu Chileke; je anma iya akpa. ²⁸Mosisu bya akokotaru Eronu iphemiphe, Chipfu ziru iya g'o je epfua; wakwapho k'iphe-ohumalenya ono, Chileke suru g'o meshia ono.

²⁹Mosisu yee Eronu bya ekukota ndu bu ogerenya Izurelu g'ephe ha. ³⁰Eronu bya atuko iphemiphe, Chipfu pfushiru Mosisu pfukotaru phe. O bya emee iphe-ohumalenya ono l'iphu ndu Izurelu; ³¹ephe kweta. Oo

ya bu; ephe nūmaepfo lẹ Chipfu akpa ishi phe; teme waa l'ọ hūmawaru iphe-ehuka, ephe eje; ephe phozeta baaru Chileke eja.

5 ¹E mecha; Mosisu yee Eronu jefu Fero bya asu iya: “Waa iphe, Chipfu, bu Chileke ke Izurelu epfu baa: ‘Haa ndibe mu g'ephe je abooru mu iphe lechiegu!’”

²Fero su: “?Bu onye bu Chipfu k'ophu mu a-ngaberu iya nchi; haa ndu Izurelu g'ephe tugbua? Su: Mu ta amakwa Chipfu; ophu mu ahakwa ndu Izurelu g'ephe tugbua.”

³Ephe su iya: “Chileke ndu Hiburu byapfutakwaru anyi. Jiko hanaa g'anyi wuru je lechiegu jee ije ujiku eto je egweeru Chipfu, bu Chileke anyi ngweja. Odumeka be oo-gudekwa iphe-ememe; ozoo ogu-echi gbu-shia anyi.”

⁴Obenu leze ndu Ijiputu kuru Mosisu yee Eronu; su phe: “?Bu gu-nu kparu iphe unu jeru je achifuta ndu ono l'ozu, ephe eje? Ngwa; unu tugbua laphu azu l'ozu unu!” ⁵O sukwapfo: “Unu lewaro ya! Nta-a be ndu Izurelu hawaa igwerigwe; teme unu gbẹ bya akposhiaha phe ozi, ephe eje!”

⁶O buru mboku ono kwapho be Fero kuru ndu udumali; waa ndu-ishi l'ozu ndu Izurelu; su phe: ⁷“Unu ta anujehe ndu Izurelu eswa, ephe e-gude yoo eja! G'ephe jeje acho eswa chita l'onwophe! ⁸Ole g'unu mekwaa phe g'ephe yotaje iya g'o dzua ole, ephe shiwaa ayotaje iya. Unu te egbubotakwa iphe leja ole, ephe shi ayotaje. Ephe bu ndu enyiru; o buru iphe ono meru g'o gude; ephe nodu echi mkpu su g'a haa phe g'ephe je egweeru Chileke phe ngweja. ⁹Unu kabaa phe akpabe ozi; k'ophu uzu k'eye angabe nchi lasulasu ta adueduru phe.”

¹⁰Tobudu iya bu; ndu udumali; waa ndu-ishi l'ozu ono bya asu ndu Izurelu: “Waa iphe, Fero pfuru baa. O suru g'a ta nujehe unu eswa. ¹¹G'unu jeje achita iya l'onwunu leka unu humaru iya. Ole ozi unu be e tee gbubotakwa iphe menanu.” ¹²Oo ya bu; ndu Izurelu gbakashihu tsoru ali ndu Ijiputu l'ophu cholahaa eswa, ephe e-vuta gude bya ayo eja obu. ¹³Ndu udumali chiahaa phe kpabekpabe; su phe: “Ngwa! Unu yota-dzua eja ole, unu shi ayotaje ujiku lanu teke pho, e shi evutajeru unu eswa pho!” ¹⁴Ndu udumali Fero bya echiahaa ndu-ishi l'ozu ndu Izurelu ono iphe; mbu ndu ono, ephe hotaru dobe g'ephe letaje ndu Izurelu enya ono; su phe: “?Bu gunu kparu iphe, unu ta ayo-dzuduru eja unu unyaphu waa ntanu-a; g'unu shi ayo-dzujehawa iya?”

¹⁵Ndu-ishi l'ozu ndu Izurelu ono bya awuru jefu Fero; su iya: “?Bu gunu be iime anyibe ndu-ozu ngu egube-a? ¹⁶Ndu ozi ngu be e te vuta-jeeduru eswa; teme a sukwapfo g'anyi yoo eja. A nodu echi ndu-ozu ngu iphe; leka o gbẹ buru ndu nkengu be o shi leka.”

¹⁷Fero su: “Oo ke mmanu ono, unu no ono meru iphe; unu pfuaharu g'a haa unu g'unu je egweeru Chipfu ngweja. ¹⁸Ngwa! Unu tugbua nta-a je

eje ozi, unu eje. E tee vutabaeduru unu eswa. Ole mkpakọ bukwa g'unu yota-dzujee eja ole, unu shi ayotaje!”

¹⁹Ndu-ishi l'ozi ndu Ízurelu gbẹ teke ono maru l'ephē nmaru l'agaga g'ephē nūmachaaru l'e tee gubotaduru iphe l'ēja ole, ephē shi ayotaje ujiku ophu. ²⁰Ephē lufutaepho l'ibe Fero; ephē hūma Mósisu; waa Eronu l'eka ephē pfuru echeru phe. ²¹Ephē sū: “Gẹ Chipfu lekwa enya l'iphe-a, unu meru-a; kpee unu ikpe iya! Kele unu kpataru; anyi duchawanu Fero yee ndu-ozī iya ashī. Nta-a bẹ unu wowaru mma ye phe l'eka g'ephē gbusia anyi.”

Chileke ekwe ukwe adzo ndu Ízurelu

²²Mósisu jepfu Chipfu bya asu iya: “Oowaa Nnajiuphu! ?Bụ gunu kparu iphe, iime gẹ ndu-a jee egube iphe-ehuka-a? ?Bụ iphe, i zidoru mu baa?

²³Eshi teke mu jepfucharu Fero je egude epha ngu pfuru yeru iya bẹ o wotaru iphe-ehuka, dū egube-a nmakobe phe l'ishi. Ophu o to dudu iphe, i meru mē nanu gude dzota ndu nkengu.”

6 ¹Noo ya; Chipfu sū Mósisu: “Nta-a bẹ ii-humanu-a iphe, mu e-me Fero. Kele o o okpehu mu bẹ mu e-gude mee l'o haa phe; mbu l'oo okpehu mu bẹ mu e-gude mee l'o chipu phe l'alī iya.”

²Chileke sukwapo Mósisu: “Oo mbedua bu Chipfu. ³Mu heru l'iphu Ebirihamu; bya ehee l'iphu Ayizaku; hekwaapho l'iphu Jiéko; karu phe l'epha mu bu Chileke, bu Okalibe-kangokotaru-nu. Obenu l'epha mu ono, bu Chipfu bẹ mu te emeduru g'ephē maru. ⁴Anyi l'ephe bya agbaa ndzu lẹ mu a-nu phe alī ndu Kėnanu ẹka ephē shi buru gẹ ndu lwaru alwalwa. ⁵Ozo bu lẹ mu nūmawaru ude, ndu Ízurelu atsū; mbu ndu ono, ndu Ijiputu meru ohu ono. Mu nyata ogbandzu mu ono.

⁶“Oo ya bu; unu sū ndu Ízurelu lẹ-a: Oo mbedua bu Chipfu; oo mu a-nafuta unu l'ozi mkponwu-ehu ono, ndu Ijiputu meru; unu nodu eje ono. Mu e-me g'unu nweru onwunu; g'unu ta abuhuru ohu phe. Mu a-machi ẹka mu dzota unu; bya emeshia iphe, dū biribiri gude nua phe aphu. ⁷Mu e-me; unu aburu ndibe mu; mu aburu Chileke unu. Oo ya bu g'unu amaru l'oo mbedua, bu Chipfu bu Chileke unu; bya aburu onye nafutaru unu l'ozi mkponwu-ehu ono, ndu Ijiputu meru; unu nodu eje ono. ⁸Mu e-duta unu je l'alī ono, mu paliru ẹka mu imeli ria nte lẹ mu a-nu Ebirihamu; waa Ayizaku; waa Jiéko-pu ono. Mu a-nu iya unu g'o buru okiphe unu. Oo mbedua bu Chipfu.”

⁹Mósisu bya eje ezia ya ndu Ízurelu; obenu l'ephe te eyeduru iya onu; noo kele meji tofuwaru phe; teme ozi mkponwu-ehu, ephē eje l'eka ono mewaru; o refu phe l'ehu.

¹⁰Chipfu sū Mósisu: ¹¹“Je epfuaru Fero, eze ndu Ijiputu g'o haa ndu Ízurelu g'ephē tugbua lufu l'alī iya.”

¹²Mósisu sū Chipfu: “O -buru lẹ ndu Ízurelu ta angabeduru mu nchi; ?bu ishi gunu bẹ Fero e-gude ngaberu mu nchi gẹ mu bu onye epfu l'onu

ọku-a?”¹³ Noo ya; Chipfu bya epfuaru Mósísu yẹ Eronu opfu ẹhu ndu Ízurelu; waa opfu ẹhu Fero, bu eze ndu Ijiputu; su phe g'ephe dufuta ndu Ízurelu l'alì ndu Ijiputu.

Oshilokpa Mósísu waa Eronu

¹⁴Waa ndu-ishi l'ẹnya-unuphu ibe nna phe.

Unwu ke Rúbenu, bu okpara Ízurelu bu Hanoku; waa Palu; waa Hezonu; waa Kami. Ndu k'ono bukota okpa-ipfu Rúbenu.

¹⁵Unwu ke Simiyonu bu Jiemelu; waa Jiaminu; waa Ohadu; waa Jia-kinu; waa Zoha; teme waa Shawulu, nwa, nwanyi shi Kėnanu nwutaru. G'ephe ha bukota okpa-ipfu Simiyonu.

¹⁶Epha unwu Lívayi le g'e deru phe l'ekwo bu: Geshonu; waa Kohatu; teme waa Merari. Lívayi noru ukporo apha ishii l'apha iri l'esaa.

¹⁷Unwu Geshonu l'ẹnya-unuphu l'ẹnya-unuphu phe bu Libuni; waa Shimeyi.

¹⁸Unwu Kohatu bu Amuramu; waa Izuha; waa Heburonu; waa Uzelu. Kohatu noru ukporo apha ishii l'apha iri l'eto.

¹⁹Unwu Merari bu Mahuli; waa Mushi. Ono bu okpa-ipfu Lívayi le g'e deru iya l'ekwo.

²⁰Amuramu bya alua nwune nna iya, bu Jiokebedu. O nwutaru iya Eronu; waa Mósísu. Amuramu noru ukporo apha ishii l'apha iri l'esaa.

²¹Unwu Izuha bu Kora; waa Nefegu; teme waa Zikiri.

²²Unwu Uzelu bu Mishelu; waa Eluzafanu; teme waa Sitiri.

²³Eronu bya alua Elisheba, bu nwatibe Amínadabu ke nwanyi; bukwarupho nwune Nášonu ke nwanyi. Elisheba ono nwutaru iya Nadabu; waa Abihu; waa Eleyaza; teme waa Itama.

²⁴Unwu Kora bu Asiru; waa Elukana; teme waa Abiyasafu. Ndu k'ono bu oshilokpa Kora l'ipfu l'ipfu.

²⁵Eleyaza nwa Eronu bya alua onye lanu l'ime unwegirima unwanyi ibe Putelu; o bya nwutaru iya Finehasu.

Ndu ono bukota ndu-ishi unuphu ibe Lívayi l'ipfu l'ipfu.

²⁶Oo buru Eronu; yẹ Mósísu ono be Chipfu suru g'ephe dufuta ndu Ízurelu g'ephe hakota l'alì Ijiputu! ²⁷O bukwaru phe pho be bu ndu pfuru Fero, bu eze ndu Ijiputu k'edufuta ndu Ízurelu l'alì ndu Ijiputu. Oo kwa-pho Mósísu yẹ Eronu lanu ono be o bu.

Eronu bu onu, epfuchiru Mósísu

²⁸Noo ya; teke ono, Chipfu pfuru yeru Mósísu l'alì ndu Ijiputu ono ²⁹be o suru iya: “Oo mbedua bu Chipfu. Zikota Fero, bu eze ndu Ijiputu iphemiphe, mu ziru ngu.”

³⁰Obenu le Mósísu suru Chipfu: “Eshi ophu mu epfu l'onu oku; ?denu ge Fero e-mekwanu ngaberu mu nchi?”

7 ¹Ọo ya bụ; Chipfu sụ Mósísu: “Hụma lẹ mu mewaru ngu; ị dū Fero gẹ Chileke. Nwune ngu Erọnu bụ onye a-nọduje epfuchiru ngu opfu. ²Pfukọtakwa iphemiphe, mu pfuru ngu. Nwune ngu Erọnu bụ iphe, oo-pfuru Fero bụ g'ọ haa ndu Ízurelụ g'ẹphe lufu l'alị iya. ³Obenu lẹ mu a-kpọ-chi Fero ọkpoma. Mu e-mee iphe-ọhumalenya; waa iphe-ọhubama, dū igwerigwe l'alị Ijiputu; ⁴ọle ọ tọ byadu angaru unu nchị. Ọ buru teke ono bẹ mu e-byi ndu Ijiputu ẹka l'ẹhu; meshia iphe, dū biribiri gude nua pẹ aphụ; dufuta ndibe mu, bụ ndu Ízurelụ g'ẹphe hakota lẹ Ijiputu. ⁵Ndu Ijiputu bẹ a-maru l'ọo mbedua bụ Chipfu mẹ mu machiepho ẹka mu byia Ijiputu; bya edufuta ndu Ízurelụ l'echilabọ pẹ.”

⁶Mósísu yẹ Erọnu bya emee gẹ Chipfu ziru pẹ. ⁷Mósísu nọwaru ụkporo apha ẹno; Erọnu nọwa ụkporo apha ẹno l'apha ẹto teke ẹphe jeru je epfuru opfu nụ Fero.

Mgboro Erọnu ghoru agwo

⁸Chipfu sụ Mósísu yẹ Erọnu: ⁹“Ọ -buru lẹ Fero suru unu g'unu mee iphe-ọhumalenya gude goshi iphe, unu epfu; l'ị sụ Erọnu g'ọ woru mgboro iya togbo l'atatiphu Fero! Ọ -togboe ya pho; l'ọ ghọo agwo.”

¹⁰Ọo ya bụ; Mósísu yẹ Erọnu bya ejepfu Fero je emekota gẹ Chipfu ziru pẹ. Erọnu togbo mgboro iya ono l'iphe Fero; yẹ ndu-ozí iya; ọ ghọo agwo. ¹¹Fero bya ekukọo ndu mmamiphe; waa ndu emeje omamanshi. Ndu jibya ndu Ijiputu ono shi l'omamanshi ẹphe emeje mekwaapho nno. ¹²G'ẹphe ha byaru atogbochaa mgboro nkepẹ l'alị; ọ ghoshia agwo; ọle kẹ Erọnu bya atuko mgboro nkepẹ lwekota. ¹³Ọle obu Fero kpọ-chileru-a; ọphu o kwedu gaberu pẹ nchị; gẹ Chipfu pfuru pho.

Mini ghoru mee

¹⁴Noo ya; Chipfu sụ Mósísu: “Fero bẹ ọkpoma kpọakwaru mkpọlanu. Ọ jịkaakwaru lẹ ya ta ahadu ndu Ízurelụ g'ẹphe tugbua. ¹⁵Jepfu Fero l'utsu m'ọ jeje l'enyimu. Nodu l'aguga Nayilu kwaberu iya; l'i wota mgboro ono, shi ghọo agwo pho gude l'ẹka. ¹⁶L'ị sụ iya lẹ Chipfu, bụ Chileke kẹ ndu Hiburu zikwaru ngu g'ị bya asụ iya g'ọ haa ndibe iya g'ẹphe tugbua; je a-baru iya ẹja l'echiegu. Ọphu i kwedu byasu nta-a. ¹⁷L'ị sụ iya: ‘Wakwa iphe, Chipfu pfuru baa: “Shita l'iphe-a, bẹ ii-shi maru l'ọo yebedua bụ Chipfu. Mube Mósísu e-woru mgboro ono, mu gude l'ẹka ono chia lẹ mini Nayilu. Mini ono agbanwee buru mee. ¹⁸Emā, nọkota lẹ Nayilu a-nwushihukota. Enyimu ono esihu kẹ swiswiswi. Ndu Ijiputu ta adudu ike angu mini, shi iya nụ.” ’ ”

¹⁹Chipfu sụ Mósísu: “Pfuaru Erọnu g'ọ wota mgboro ono, o gude l'ẹka machia lẹ mini, nọkota l'alị ndu Ijiputu. G'ọ maa ya l'enyimu enyimu; waa lẹ nggele nggele; waa l'okpuru okpuru; waa l'iphe, bụ o-che-mini g'ẹphe tukochaa gbanwee buru mee. Mee a-tukoru ekameka sweta l'alị Ijiputu;

mbu lufuchaa l'iphe, bu iphe, aado mini; ndu ophu a pyiru apyipyi; me ndu ophu a kpuru akpukpu.”

²⁰Mosisu yee Eronu bya emeepho ge Chipfu ziru phe. O bya eworu mgboro iya malia l'atatiphu Fero; yee ndu-ozu iya; bya echia ya l'enyimu Nayilu. Mini, du l'enyimu ono tukoeppo gbanwee buru mee. ²¹Ena, nokota le Nayilu nwushihukota. Mini ono shihueppo ke swiswisiwi; k'ophu bu le ndu Ijiputu ta adudu ike nga mini, shi iya nu. Mee ono toko ekameka sweta l'ali ndu Ijiputu.

²²Ndu jibya ndu Ijiputu ono shi l'omamanshi ephe emeje mekwaapho nno. Oo ya bu; Fero kpo-chile-a obu iya g'o kpo-chiru iya. Ophu o to ngabeduru Mosisu yee Eronu nchi; mbu egube ono, Chipfu pfuhawaru ono. ²³O ghakobe bya alaphushia azu l'ibe iya. Ophu iphe ono erwukpodaru iya nu l'ehu. ²⁴Ndu Ijiputu bya agwoshia obvu l'aguga Nayilu; aka ephe achu mini, ephe a-ngu. Noo kele mini enyimu ono ta adudu k'angungu.

Mbara byaru ogu

²⁵A nepho ujiku esaa e -shi teke Chipfu byiru aka l'enyimu Nayilu; **8** ¹Chipfu su Mosisu: “Jepfu Fero je asu iya: Wakwa iphe, Chipfu epfu baa: Haa ndibe mu g'ephe laa; k'ophu ephe a-baru mu aja. ²O -buru l'i jikaru g'ephe ta lashu; mu egude mbara bya ogu l'ali ngu l'ophu. ³Mbara a-toko enyimu Nayilu sweta; kposihu bya akuru l'ibe ngu; kuru l'ime aka iikwaje; kuru l'oma iphe-azee ngu; kuru l'ulo ndu-ozu ngu; kuru l'ibe ndu ali ngu l'ophu; kuru l'onu epfu, eeshijeru ngu ite; waa l'ochi, eegudeje agwo iphe, e gude emeru ngu buredi. ⁴Mbara ono a-noduje apfu-kogbaa ngu l'ehu; waa l'ehu ndu ali ngu; me l'ehu ndu-ozu ngu l'ophu.”

⁵Chipfu su Mosisu: “Pfuaru Eronu g'o wolia mgboro iya ono; maa l'enyimu enyimu; waa le nggele nggele; waa lokpuru okpuru; mee ge mbara dzuru ali Ijiputu.”

⁶No iya; Eronu bya amachia aka le mini, nokota l'ali ndu Ijiputu. Mbara wufuta bya edzuru ali ndu Ijiputu. ⁷Ndu jibya ono shi l'omamanshi ephe emeje mekwaapho nno. Ephe mekwarupho; mbara wubata l'ali Ijiputu.

⁸Fero kua Mosisu waa Eronu bya asu: “Unu pfuru yeru Chipfu g'o wofuru mu le ndu ali mu l'ophu mbara-a; ge mu ahaa ndibe unu g'ephe je agwaa Chipfu.”

⁹Mosisu su Fero: “Ubvù, mu akwabeg ngu bu g'i pfua teke mu e-pfuru nuru ngu Chileke; waa ndu-ozu ngu; waa ndu ali ngu; k'ophu mbara ta aduedu ngu l'ehu; me l'ibe ngu; a -gufu ndu ophu no l'enyimu Nayilu.”

¹⁰Fero su: “Oo echele.”

Mosisu su: “G'o du g'i pfuru; oo ya bu; g'i shi nno maru l'o to du du onye du ge Chipfu, bu Chileke anyi. ¹¹Mbara ono a-ha ngu; haa ibe ngu; haa ndu-ozu ngu; haa ndu ali ngu. Eka ephe a-phodueppo kpoloko bu l'enyimu Nayilu.”

¹² Oo ya bu; Mosisu yee Erõnu lufuepho l'iphu Fero; Mosisu bya araku Chipfu le ke mbara ono, o meru; o bya ogu l'alì-eze Fero ono. ¹³ Chipfu bya emeeru Mosisu iphe, o rworu iya. Mbara ono nwushihukota l'ulo; waa l'oma-unuphu; waa l'egu. ¹⁴ A bya akua phe l'ikpo l'ikpo. Alì ono l'ophu shihu ke swiswisi. ¹⁵ Obenu le Fero humauerupho le mbara ono ta aduedu; o woru okpoma iya kpo-chia. Ophu o to kweedu angaberu Mosisu yee Erõnu nchi ge Chipfu pfuru ono.

Mkpuruumkpu byaru ogu

¹⁶ Oo ya bu; Chipfu su Mosisu g'o pfuaru Erõnu g'o machia mgboro iya chia l'urwuku, no l'alì; k'ophu urwuku ono a-gho mkpuruumkpu; dzuru alì Ijiputu l'ophu. ¹⁷ Ephe mee nno. Erõnu bya amachia mgboro ono chia l'urwuku, no l'alì. Mkpuruumkpu bya erikpute nemadzu ehu; yee anu. Urwuku, nokota l'alì Ijiputu ono mgburugburu bukotaru mkpuruumkpu. ¹⁸ Ndu jibya bya emeahaa g'ephe shi l'omamansi phe mekwaapho nno. Ophu ephe aduedu ike. Mkpuruumkpu ono tuko ehu nemadzu yee anu ripyabe aata.

¹⁹ Ndu jibya ono su Fero: "Iphe-a be eka Chileke dukwa." Obenu le Fero kpo-chilerua obu iya. Ophu o to kwedu ngabe nchi ge Chipfu pfuru ono.

Ijiji byaru ogu

²⁰ Oo ya bu; Chipfu su Mosisu g'o tehu l'onmewa utsu; jepfu Fero me o -jejeepho l'enyimu; su iya l'owa-a iphe, mube Chipfu pfuru baa: "Haa ndibe mu g'ephe laa; je abaarù mu eja. ²¹ O -buru l'i tji hadu ndibe mu g'ephe tugbua be mu e-zikwa ijiji g'o tsuru duuduuduu; wu-pfuta ngu; wu-pfuta ndu-ozì ngu; wu-pfuta ndu alì ngu; mekwapho l'ulo ngu l'ophu. Ulo ndu Ijiputu be ijiji e-jikota; etsu duuduuduu; mbu mechaa l'alì eka ephe azoje okpa.

²² "Obenu le mboku ono be mu e-me g'alì Goshenu du iche. Mbu l'eka ndibe mu bu be o to dudu ijiji, e-tsu duuduuduu l'eka ono; k'ophu i-marù le mbedua, bu Chipfu no l'alì-a. ²³ Mu a-kpa oke l'eka ndibe mu yee ndibe ngu no. Iphe-ohumalenya-a e-me echele."

²⁴ Chipfu bya emee iphe ono. Ijiji tsuru duuduuduu wubata l'ibe Fero; me l'ulo ndu-ozì iya; me l'alì Ijiputu l'ophu. Ijiji ono tukoeppo alì Ijiputu l'ophu mebyishikota.

²⁵ Fero bya ekua Mosisu yee Erõnu bya asu phe: "Unu je agwaa Chileke unu obu l'alì eka-a!"

²⁶ Obenu le Mosisu suru: "O to dudu ree nno; noo kele iphe, anyi egude-je agwa Chipfu, bu Chileke anyi bu ndu Ijiputu ebyi. O -buru l'anyi gude iphe, bu ebyi l'anya nkephe gwee ngweja; be ephe a-tu-gbukwa anyi le mkpuma! ²⁷ Anyi e-jekwa ije ujiku eto jerwua l'echiegu je egweeru Chipfu, bu Chileke anyi ngweja l'eka ono; egube o turu ekemu su g'anyi mee."

²⁸Fero sù: “Mu a-ha unu g'unu je egweeru Chipfu, bu Chileke unu ngweja l'echiegu. Òle g'unu te ejenukakwa eka du enya. Ngwa; unu pfuru nuru mu Chileke!”

²⁹Mósisu sù iya: “Mu -lufuepho l'ataphu ngu; mu epfuru nu Chipfu; k'ophu ijiji ono, etsu gbiigbiigbi ono a-ha gube Fero; waa ndu-ozu ngu; teme waa ndu ali ngu. Òle ge gube Fero te egudenupho eregede ozo mee ge ndu Ízurelu te je abaru Chipfu eja!”

³⁰Mósisu shi l'ataphu Fero tugbua; je epfuru nu Chipfu. ³¹Chipfu bya emee iphe, Mósisu rworu iya. Ijiji ono paru Fero; waa ndu-ozu iya; waa ndu ali iya haa. Ophu o to dudu me ijiji lanu, ghuduru nu. ³²Fero bya akpo-chikwapho obu iya ozobaa. Ophu o to kwedu ge ndu Ízurelu tugbua.

Onwu iphe-edobe

9 ¹Noo ya; Chipfu sù Mósisu: “Jepfu Fero je asu iya: Waa iphe, Chipfu, bu Chileke ndu Hiburu pfuru baa: ‘Haa ndibe mu g'ephe tugbua; je abaru mu eja!’ ²O -buru l'i jikaru g'ephe ta tugbushi; bya esede phe ³be Chipfu e-gudekwa eka iya zia ejo iphe-ememe; l'o bya atuko iphe-edobe unu gbushia. Mbù l'oo-gbushi inya unu; waa nkafu-igara unu; waa inya-kamelu unu; teme waa eswi unu; waa aturu yee egbu unu. ⁴Òle Chipfu a-kpa oke l'eka iphe-edobe ndu Ízurelu; waa l'eka ke ndu Ijiputu no; k'ophu bu l'o to nwedu anu ke ndu Ízurelu me nanu a-nwuhu nu.”

⁵Chipfu bya epfua teke oo-me iphe ono; su: “Echele be mube Chipfu e-me iphe ono l'ali-a.” ⁶O -rwua le nchitabohu iya; Chipfu mee ya. Iphe-edobe ndu Ijiputu tuko nwushihukota. Obenu l'o to nwedu ke ndu Ízurelu me nanu, nwuhuru nu. ⁷Fero zia ndu jeru je ahuma l'o to dudu iphe-edobe ndu Ízurelu me nanu, nwuhuru nu. Obenu le Fero kpo-chileru-a okpoma; ophu o to kwedu ge ndu Ízurelu tugbua.

Ejo-onwo byaru ogu

⁸Oo ya bu; Chipfu sù Mósisu waa Eronu: “Unu kpota ntù, jiru mkpoji eka l'ovokoku; ge Mósisu phekaşia ntù ono l'imeli l'ataphu Fero. ⁹Oo-phekaşihu dzuru ali Ijiputu l'ophu gurwuku; l'o mee; ejo-onwo aphokashiaha nemadzu lehu yee anu, bu l'ali ono l'ophu. Ejo-onwo ono efushihu; baaha phe onya.”

¹⁰Ephe bya ekpota ntù l'ovokoku; bya apfuru l'ataphu Fero. Mósisu woru ntù ono phekaşia l'imeli. Ejo-onwo bya atuko nemadzu; yee anu wata aphokashi; baahaa phe onya. ¹¹Ophu ndu jibya adudu ike pfuru l'ataphu Mósisu; kele ejo-onwo ono phokwaru phe pho g'o phoru ndu Ijiputu ndu ophu g'ephe ha. ¹²Obenu le Chipfu kpo-chiru Fero obu; ophu o to ngabeduru Mósisu yee Eronu nchi; ge Chipfu pfuru Mósisu ono.

Akamini byaru ogu

¹³Oo ya bu; Chipfu sù Mósisu: “Nmaa ewa l'utsu je apfuru l'ataphu Fero; su iya: Waa iphe, Chipfu, bu Chileke ke ndu Hiburu pfuru baa:

'Haa ndibe mu g'ephe tugbua; je a-baru mu eja. ¹⁴Odumeka be ogiya be mu e-me g'ejo iphe-ehuka, l'a-lo ngu eka le meji byapfuta ngu; gu le ndu-ozu ngu; yee ndu ali ngu. Oo ya bu g'i maru l'o to du du onye du ge mbedua le mgboko l'ophu. ¹⁵Noo kele mu gege amachihawa eka mu gude ejo iphe-ememe gbushia gu le ndu ali ngu; unu achihu le mgboko-a. ¹⁶Obenu l'iphe, kparu iphe, mu gude haa ngu bu k'ophu mu e-goshi ngu g'okpehu mu habe shii. Oo ya bu g'eepfukashi-dzuru epha mu le mgboko l'ophu. ¹⁷Obenu l'iigude opfu ehu ndibe mu eku onwongu; jika li tii hadu phe g'ephe la. ¹⁸Egube nta-a echele be mu a-tu ejo akamini egube teke atu-swee l'ali Ijiputu e -shi teke o beberu du byasu ntanu-a. ¹⁹Zikwaa ozi nta-a g'e je achibata iphe-edobe ngu l'eka iphe e-gbobuta iya; noo kele akamini ono a-tu-gbushikota nemadzu; yee iphe-edobe, no l'egu, a chibataduru unuphu; epe anwushihukota.' "

²⁰Ndu-ozu Fero ndu ophu atsu Opfu Chipfu ebvu bya emee egwegwa chibata ohu phe; waa iphe-edobe phe l'ime ulo. ²¹Obenu le ndu agubeduru Opfu Chipfu iphe be haru ohu phe; waa iphe-edobe phe l'egu.

²²Oo ya bu; Chipfu su Mosisu g'o machia eka l'akpaminigwe g'akamini awata adashi l'ali ndu Ijiputu tu-gbushia nemadzu me iphe-edobe; waa irwu, dukotakpo l'ali Ijiputu. ²³Mosisu machiepho mgboro iya l'akpaminigwe; Chipfu zia egbigwe; yee akamini; o wata adada. Ebemu nodu alo l'akpaminigwe. Chipfu dzee akamini l'ali Ijiputu. ²⁴Akamini yee oku-egbigwe tuko ghaa eghirigha nodu atu gbaagbaa. Ejo oke pherephere, ha shii; nodu ezi. Mbụ l'oo pherephere ono kakota shii le pherephere, zijekporu l'ali ndu Ijiputu e -shi teke e beberu ali ndu Ijiputu du. ²⁵L'ali ndu Ijiputu mgburugburu be akamini ono tu-gbushikotaru iphemiphe, nokota l'egu; nemadzu me iphe-edobe. O tupyashia iphemiphe, futaru l'egu; bya ezijashicha iphe, bu oshi, du l'egu ezijashi. ²⁶Eka o tuduru akamini ono kpoloko bu l'ali Goshenu, bu eka ndu Izurelu bu.

²⁷Noo ya; Fero zia g'e je ekua Mosisu yee Eronu; bya asu phe: "Mu meru iphe-eji. Oo Chipfu be iswi du maa; mbedua, bu Fero; waa ndibe mu achu opfu. ²⁸Pfuru nu Chipfu; noo kele egbigwe ono; yee akamini ono tuta-shiwaru. Mu je a-ha unu g'unu laa; o to gbaeduru g'unu nodukwadu."

²⁹Mosisu su: "Mu -lufuepho le mkpukpu-a; mu achil-ia eka imeli; pfuru nu Chipfu. Egbigwe adabuhu; igwe atu-buhu akamini. Oo ya bu g'i maru le mgboko-a bu ke Chipfu. ³⁰Obenu le mu maru-a le gubedua waa ndu-ozu ngu ta atsuadaa Chipfu, bu Chileke ebvu."

³¹Owu fulakusu; waa balu be akamini ono mebyishichaar; noo kele balu eyeshiwa mebyi; owu fulakusu bukwaduru ige be ootu. ³²Obenu le witi; waa supelutu be o to mebyishiduru; noo l'o to budu teke ono be oomije.

³³Mosisu paru Fero haa; shi le mkpukpu ono tugbua. O bya apaliaru Chipfu eka imeli. Egbigwe; waa akamini tukoru buru ke nyoo; igwe

dzebuhu mini l'alì ono. ³⁴Fero hùmaepfo lẹ mini; waa akamini; waa egbigwe ono bũwaa kẹ nyonyoronyo; o mekwaa iphe-ẹjì ọzo. Yẹbedua yẹ ndu-ozì iya kpọ-chikwa obu phẹ ọzo. ³⁵Ọkpoma Fero bya akpọ-chikwa; ọphu o kwedu aha ndu Ízurelù g'ẹphe tũgbua, bũ iya bũ gẹ Chipfu shihawaa l'ọnu Mósìsù pfua ya.

Igube byaru ọgu

10 ¹Noo ya; Chipfu sù Mósìsù: “Jepfu Fero; noo kẹle mu kpọ-chiru iya obu; kpọ-chia kẹ ndu-ozì iya; k'ọphu mu e-meshigbaa oke iphe-ọhumalenya, dũgbaa biribiri l'echilabọ phẹ; ²k'ọphu unu a-kọru ọnwu unu; mẹ ọnwu nwanwa unu gẹ mu gude kpa ndu Ijiputu ẹhu; tẹmewa gẹ mu gude mee oke iphe-ọhubama nù phẹ. Ọo ya bũ g'unu amaru l'ọ mbedua bũ Chipfu.”

³Ọo ya bũ; Mósìsù yẹ Eronu bya ejepfu Fero sù iya: “Waa iphe, Chipfu, bũ Chileke ndu Hiburu pfuru baa: ‘?Bũ teke ole bẹ ijika-beru ewoze onwongu alì l'atatiptu mu? Haa ndibe mu g'ẹphe la; k'ọphu ẹphe e-je abaarù mu eja! ⁴Ọ -bùru l'ì jìkaru g'ẹphe ta tũgbushi bẹ mu e-gude igube bata l'alì ngu echele. ⁵Ọo-bya atũko alì unu nyinwua; k'ọphu bũ l'ọ tọ dudu ẹka aahuma ọzo l'alì ono. L'ọ tũko iphe, akamini mebyishiphodoru tapyashikota; męchaa iphe, bũ oshi, pfuru l'egu unu. ⁶Ẹphe abya atũko ọlo ngu; mẹ ọlo ndu-ozì ngu; mękpoo alì Ijiputu l'ophu sweta. Iphe ono bũ iphe, nna ngu; mẹ nna ngu oche phẹ teke ahuma-swee l'alì-a; e-shi teke ẹphe lwarù ẹka-a byasù nta-a.’” Mósìsù dakọbe; parù Fero haa; ọ bũru iya atũgbu.

⁷Ndu ozì Fero sù Fero: “?Bũ teke ole bẹ nwoke-a a-chi-beru anyi ọkpukpọhu? Haa ndu-a g'ẹphe tũgbua je abaarù Chipfu, bũ Chileke phẹ eja. ?Tì madù l'alì ndu Ijiputu bũwaa mkpurupyata?”

⁸Noo ya; a bya eduphuta Mósìsù yẹ Eronu azù l'iphu Fero. Ọ sù: “Unu je abaarù Chileke unu eja! Ọle ọ bũ; ?bùlajẹ ndu ole e-je?”

⁹Mósìsù sù: “Anyi l'unwegirima anyi; waa ndu bũ ọgerenya anyi; waa ọnwu anyi kẹ nwoke; waa kẹ nwanyì a-tũkokwa swìru; anyi atũko aturu anyi; waa eswi anyi rwuta. Noo kẹle anyi a-bọru Chipfu anyi ọbo-iphe.”

¹⁰Fero sù phẹ: “Gẹ Chipfu swikwaru unu eswiru ọme ọo kẹ gẹ mu haa unu g'unu l'unwegirima unu swìru tũgbua! Nta-a bẹ mu makpọoru l'ọ ejo-iphe bẹ unu arì k'ememe. ¹¹Waawakwa-o; g'ọ bũru ndu k'unwoke kpọloko bẹ unu e-rwuta gude je abarù Chipfu eja; eshi ọphu ọ bũ iphe ono bẹ unu shi teke-a rwota!” Noo ya; a chifù Mósìsù yẹ Eronu l'iphu Fero.

¹²Chipfu sù Mósìsù: “Machia ẹka maa l'alì Ijiputu; g'igube wubata l'alì ono bya atũko iphe, futaru l'egu l'alì ono tapyashikota; mbù iphe, akamini mebyishiphodoru.”

¹³Ọo ya bũ; Mósìsù bya eworu mgboro iya maa l'alì ndu Ijiputu. Chipfu bya emee; pherephere shi l'uzo ẹnyanwu-awawa wata ezizi. Pherephere

ono zikōta l'alì ono eswe l'enyashi. A fūtashia l'ùtsu; phèrèphèrè ono vubatawa igube l'alì ono. ¹⁴Igube tūko Ijiputu sweta; bya anōpho l'èkameka l'alì ono kè nyimunyimu. Igube teke ekpofutaswe ègube ono; tème ophu o byadu awubataba l'otu ègube ono ozo. ¹⁵Èphe nyinwuepho alì ono l'ophu; k'ophu bụ l'èkameka jihukotaru kè kpakpalu. Èphe bya atūko iphe, phoduru nū g'akamini byachaaru tapyashikota; mbụ iphe, rwutakporu irwu l'ègu; mèchaa akpuru oshi. Èkwo oshi; mē k'iphe, a kōru l'ègu te nwedū mē nanū, phoduru nū l'alì Ijiputu l'ophu.

¹⁶Fero bya ekua Mòsisu yè Eronu ègwègwa; sù phè: “Mu meswewaru Chipfu, bụ Chileke; bya emeswee unu. ¹⁷Jiko gūfuaru mu nvu ugbo lanu owa-a; je epfuru nū Chipfu, bụ Chileke unu g'o wofuru mu èjo iphe-èhuka-a!”

¹⁸Mòsisu parū Fero haa; lufu je epfuru nū Chipfu. ¹⁹Oo ya bụ; Chipfu bya agbanwee phèrèphèrè ono; mee ya; o buru eze phèrèphèrè, ha shii, shi l'uzo enyanwu-ariba bya ezikotachaa igube ono g'o ha je achiru ye lè Eze-enyimu Uswe-uswe. Ophu o tō dudu mē igube lanu, ghuduru l'alì ndu Ijiputu. ²⁰Ole Chipfu kpō-chilerua obu Fero; ophu o kwedu haa ndu Ízurelu g'èphe tūgbua.

Ochii byaru ogu

²¹Noo ya; Chipfu sù Mòsisu g'o machia èka maa l'akpaminigwe; g'ochii bya aso-kpote èkameka l'alì ndu Ijiputu. Ochii, e-me g'èkameka gbahu kè tsukiribaa. ²²Oo ya bụ; Mòsisu bya amachia èka maa l'akpaminigwe. Alì ndu Ijiputu l'ophu gbahukota tsurikitiki; nō abalì èto. ²³Ophu o dudu onye humaru nwibe iya; tème ophu o dudu onye humaru uzo kè g'o shi l'èka o bu kpuriberu; jasū abalì èto ono. Obenu lè ndu Ízurelu bè ìphóró dū l'èka èphe bu.

²⁴Noo ya; Fero kua Mòsisu bya asu: “Unu je abaarū Chipfu eja! Unu dutachaa unwanyi mē unwegirima unu g'unu swiru! Iphe, unu a-ha kpoloko bụ aturu; waa eswi unu.”

²⁵Obenu lè Mòsisu sūru iya: “Ì-hafukwapho anyi g'anyi gude iphe, anyi e-gude nū Chipfu, bụ Chileke anyi ngweja-akpo-oku; waa ngweja mmanu ozo. ²⁶Oo ya bụ l'anyi e-rwuta iphe-edobe anyi. A taa hakwa g'o ka mma l'oo ichiripfu okpa eswi; k'ophu anyi a-haru iphe-edobe ono ha ta gude baaru Chipfu, bụ Chileke anyi eja. Anyi ejerwuduru èka ono bē anyi ta amadu ndu ophu anyi e-gude baaru Chileke eja.”

²⁷Ole Chipfu kpō-chilerua obu Fero; ophu o kwedu haa ndu Ízurelu g'èphe tūgbua. ²⁸Fero sù Mòsisu: “Makwarū onwongu! Gbeshi mu l'iphu! Gè mu ta ahumabaekwa ngu ozo l'atatiphu mu. Mbōchi, ì byabaaru apfuru mu l'iphu bē ì-nwuhukwa!”

²⁹Mòsisu sù iya: “G'o dū nū g'i pfuru. Mu ta abyabaedu ngu apfuru l'iphu ozobaa.”

Mgbu-*onwu* a-bya *ogụ*

11 ¹Noo ya; Chipfu sụ Mósísu: “Mu e-gudefua oke iphe-*ehuka* lanụ byapfuta Fero; yele ndu Ijiputu. E -mechaepho bẹ oo-kwechaa g'unu wufu l'eka-a. Teme o -kweepho ono bẹ ọo-chífukota unu g'unu ha. ²Pfuaru ndu Ízurelu; g'unwoke phe; waa unwanyi phe; jepfu ndu obutobu phe je asụ phe g'ephe nụ phe iphe, e meru le mkpola-ochaa; waa ophu e meru le mkpola-ododo!” ³Chipfu bya emee; ndu Ízurelu tũa ndu Ijiputu l'obu; mekwaapho ge ndu-ozí Fero; waa ndu Ijiputu l'ophu kwabẹ Mósísu l'onwiya eze ùbvù, ha shii.

⁴Ọo ya bụ; Mósísu sụ: “Wakwa iphe, Chipfu epfu baa. Ọ sụru le ya e-gude ụzo echi abalí jedzuru alí Ijiputu l'ophu. ⁵Iphe, bụkota ndu bụ ọkpara le nwoke l'alí Ijiputu bẹ a-nwushihukota nụ; a -gbẹ l'okpara Fero, bụ onye nọ l'aba-eze; je akpaa l'okpara nwanyi, bụ ohu, bụ onye egwejeru iya iphe; mekwapho iphe-edobe, e vuru ụzo nwua l'epho ne iya. ⁶Oke ụzu-ekwa, parụ eka a-tụ l'alí Ijiputu l'ophu. Mbụ ụzu-ekwa, etu iya aduje-duru; ophu ọ byadu l'a-dubaa. ⁷Obenu l'eka ndu Ízurelu bu bẹ ọ tọ dudu g'ọ ka mma l'ọo nkuta bya agbọ ire kpua nemadzu; ọzoo anụ. Ọo ya bụ g'unu amaru le Chipfu kparụ oke; dokaha Ijiputu yee Ízurelu. ⁸No teke ndu-ozí ngu-a a-wu-pfuta mu bya ephozeru mu bya asụ mu: ‘Unu tũgbuwaro-o! Tũkokpoo ndu ndu-unu l'ophu rwuta tũgbua-o!’ Ọ -nwuchaepho nno; mu atũgbua.” No iya; Mósísu gude ehu-eghu lufu-shia l'iphu Fero.

⁹Tobudu iya bụ; Chipfu bya asụ Mósísu: “Fero te ekwekwa angaberu ngu nchi; ge mu eshi nno meshia igwerigwe iphe-ohumalenya l'alí Ijiputu.” ¹⁰Noo ya; Mósísu yee Eronu bya emeshikota iphe-ohumalenya ono l'iphu Fero. Obenu le Chipfu kpo-chileru-a Fero obu; ophu o to kwedu haa ndu Ízurelu g'ephe shi l'alí iya wufu lashia.

Obo Ojehata

12 ¹Chipfu sụ Mósísu yee Eronu l'alí ndu Ijiputu: ²“Onwa-a, a nọ-a; a-bujeru unu onwa mbụ l'apha. ³Pfuaru ndu Ízurelu g'ephe ha l'orwua mboku, onwa-a a-dụ l'abalí iri ge nwoke, nonu kputa nwaturu lanu dobe ke yee ndibe iya. ⁴Ọ -buru le ndibe onye obu hanukaru nwanshi; k'ophu bụ le nwaturu ophu parụ phe eka; ephe ejepfu ndu kachaa phe ebukube ntse; g'ephe gbarụ mgba le nwaturu lanu; m'ephe guchaa onwophe maru ole, ephe dụ. Unu lee enya le g'onymonye a-taberu. ⁵Anụ, unu a-hotà l'a-buru anụ, gbaru apha; buru okee ya; bya aburu ophu adudu eka iphe mebyiru iya. Unu -eshidu l'aturu hotà iya; unu ahota iya l'eghu mmanụ. ⁶Unu leta iya enya gbiriri jasụ mboku, onwa-a l'a-dụ l'abalí iri l'eno. Noo mboku, ndu Ízurelu l'ophu e-gbushikota iya g'ọ ha l'uzenyashi iya. ⁷Ephe aharu mee ya nata techaa l'aguga mgbo; waa l'eli oshi-mgbo, nokota l'ulo, ephe nọ ata anụ nwaturu ono. ⁸Enyashi ono bẹ ephe a-ta

anụ nwaturu, a huru ahuhu l'oku; yee ekwo oshi, atso ilu; waa bure-di, e yeduru iphe, ekoje buredi. ⁹Unu te eshikwa anu ono eshishi; ebe unu atakwa iya l'oyii. Oo epho g'unu hushia ya l'oku; mbu ishi iya; me okpa iya; mechaa iphe-epho iya. ¹⁰G'o to nwekwa ophu unu a-ha g'o bo nchi. O -buru l'o nweru ophu a haru; o noo futu utsu; unu akpo ya oku. ¹¹Waa g'unu e-gude taa ya baa: Unu gude akpo tubuta uwe unu; unu eye akpokpa unu l'okpa; bya ewota mgboro unu paru l'eka. Unu ataa ya wobuwobu; kele oo obo Ojehata ke Chipfu.

¹²"Enyashi ono kwapho be mu e-jedzuru ali Ijiputu; gbushigbua iphe, bu okpara nemadzu me iphe-edobe. Iphe, bukpo agwa ndu Ijiputu l'ophu be mu a-nukota chiipfu. O kwa mbedua bu Chipfu. ¹³Mee ono a-buru iphe-ohubama, e-goshije ulo ophu unu no. Oo ya bu; mu -humaepho mee ono; mu aghata unu. O to nwe du ejo iphe-ememe, e-byi unu eka teke mu a-nodu egbushi ndu Ijiputu ono.

¹⁴"Mboku ono l'a-buru unu mboku obo-iphe, unu e-gudeje nyata iphe-a. E shi l'ogbo sweru ogbo be unu a-boje iya g'o buru obo-iphe ke Chipfu. Ekemu ono a-du jasu le tuutuutu le miiimii. ¹⁵Ujiku esaa be unu a-ta buredi, e yeduru iphe, ekoje buredi. Mboku mbu be unu e-wofukota iphe, ekoje buredi l'ulo unu. Noo kele iphe, bukpo onye taru iphe, e yeru iphe, ekoje buredi; a -gbe le mboku mbu ono jasu le mboku k'esaa ono be ee-bufu le Izurelu. ¹⁶Mboku ke mbu be unu e-nweru ndzuko, du nsu; bya enwekwarupho ozo mboku k'esaa. G'o to dukwa iphe, unu e-je l'ujiku labo ono; gbahaepho nri, unu e-ri be unu e-shije. Noo iphe, unu e-meje bu ono kpoloko.

¹⁷"Unu bo obo-iphe buredi, ekoduru ekoko; noo kele oo mboku ono gedegede be mu dufutaru unu g'unu hakota l'ali Ijiputu. Unu boje mboku ono obo-iphe; g'o buru ekemu, a-no jasu l'ojejeje; e -shi l'ogbo sweru ogbo. ¹⁸Lonwa mbu pho be unu a-taje buredi, e yeduru iphe, ekoje buredi; a -gbe l'uzenyashi mboku, onwa ono du l'abali iri leno jasu l'uzenyashi mboku, o du l'ukporo abali l'abali lanu. ¹⁹Ujiku esaa be a ta abyadu ahuma iphe, ekoje buredi l'ulo unu. Onye rikporu iphe, e yeru iphe ekoje buredi be ee-bufu le ndu Izurelu; m'onye ono bu nlwamulwa; ozo onye a nwuru anwunwu l'ali ono. ²⁰G'o to dukwa iphe, e yeru iphe, ekoje buredi, unu e-de onu. Eka unu e-buhabe; unu taa buredi, ekoduru ekoko!"

²¹Tobudu iya bu; Mosisu bya ekuko ndu bu ogerenya Izurelu g'ephe ha; bya asu phe: "Unu tugbua nta-a nta-a; je ahota anu ophu unu le ndibe unu e-gbu gude bo obo Ojehata k'unu. ²²Unu ewota ekwo isopu, du jipfujipfu tsee le mee anu pho, a nakoberu le gbamugbamu pho tee l'eli oshi-mgbo ono; waa laguga iya ibe k'ebobu. G'o to nwekwa g'unu ha onye a-lufu etezi jasu l'utsu. ²³Oo ya bu; Chipfu -jeshiepho egbushi ndu Ijiputu; l'o huma mee, e teru l'eli oshi-mgbo waa laguga iya ono; l'o ghata onu mgbo k'ono. O too kwedu ge mbugbumadzu ono bata l'ulo unu bya egbushia unu.

²⁴“Unu mejekwa iphe-a g'ò buru nsò, a-dùru unu l'oshilòkpa unu jasù l'ojejeje. ²⁵Unu -bahùephe l'alì ono, Chipfu a-nù unu ono, bù iya bù iphe, o kweru ukwe iya ono; unu mejekwa omelalì ono. ²⁶O -buru l'unwu unu jìru unu sù: ‘?Bù gùnù bè unu emedojeru omelalì ono?’ ²⁷unu asù phe: ‘Òo ngweja egbu anù òbo Ojegahata, eegweru Chipfu, bù onye ghataru ùlo ndu Ízurelù l'alì ndu Ijiputu je egbushia ndu Ijiputu; mbù onye harù unu-phu ibe anyi; òphu o gbuduru ndibe anyi.’” Ndu Ízurelù -nùmaephe iphe ono; ephe phozeta; baarù Chipfu èja. ²⁸Ndu Ízurelù bya emee iphe ono; gè Chipfu toru Mòsisu yèle Erònu òkpa iya; ò buru egube ono bù g'ephe meru iya.

²⁹O -rwua l'echi-abalì; Chipfu bya egbushia òkpara ndu Ijiputu l'ophu; a -gbè l'òkpara Fero, bù onye nò l'aba-eze; jasù l'òkpara onye mkporo, a tù-chiru l'òka-mkporo; wakwaphò nwa ivuzò iphe-edobe. ³⁰Fero; yèe ndu-ozì iya g'ephe ha; waa ndu Ijiputu l'ophu tehu l'enyashi. Ùzu-ékwa nõdu atùwaa l'alì Ijiputu; noo kèlè o to nweđu ùlo, nò l'alì ono l'ophu, nemandzù ata nwùhuduru.

Awufu unwu Ízurelù lè Ijiputu

³¹Fero bya ekua Mòsisu yèe Erònu l'enyashi ono; sù phe: “Unu gbèshi; unu lè ndu Ízurelù; jewarò. Unu parù ndu alì mu haa; tughwaro je abaarù Chipfu èja, bù iya bù iphe, unu epfukpò. ³²Unu rwuta atùru unu; waa eswi unu gude tughua, bù iphe, unu epfu. Òlè unu gòkwaaru mu ònu-òma.”

³³Ndu Ijiputu nõdu alwùru ndu Ízurelù ùlwu g'ephe mee egwegwa lufu l'alì èka ono; kèlè ephe sùru l'òdumeka bè ephebe ndu Ijiputu a-nwùshihukotakwa. ³⁴Ephe kpota iphe, eegudeje eghe buredi kpojia ochi buredi; gude uwe phe kechia ya; nmakobe iya l'ukuvu; òphu ephe eyeduru iya iphe, ekoje buredi. ³⁵Ndu Ízurelù mee gè Mòsisu ziru phe; bya arwòkoo ndu Ijiputu iphe, e meru lè mkpòla-òchaa; waa mkpòla-ododo; waa uwe. ³⁶Chipfu mee; ndu Ízurelù tùba ndu Ijiputu l'obu; k'òphu ephe nùru phe iphemiphe, ephe rwòru phe. Ephe shi nno kwaa iphe ndu Ijiputu l'òkwata gude tughua.

³⁷Ndu Ízurelù shi lè mkpùkpu Ramesèsu jeshia mkpùkpu Sukòtu. Unwoke ndu òphu gude òkpa èje rwuru ùkporo ùnu mgbo ùkporo èto; l'ùkporo ùnu ugbo iri l'ise; a -gùfukwa unwanyi waa unwegirima. ³⁸Ndu òzo, ùkwaphò igwerigwe tsokwaru phe phò; wakwaphò ikpoto iphe-edobe; mbù atùru mè eswi. ³⁹Iphe, eegheje buredi, ephe shi l'alì Ijiputu gude bè ephe gude ghee akara, e yèduru iphe, ekoje buredi. Iphe meru g'ò gude òphu iphe, ekoje buredi adùdu iya bù l'a chifuru phe achifu l'alì Ijiputu; òphu ùzo k'akwakòbe kè nri, ephe e-ri adùduru phe.

⁴⁰Iphe, ndu Ízurelù nõru l'alì Ijiputu bù ùnu apha l'apha ùkporo l'iri. ⁴¹O -rwùephe lè mbòku, ùnu apha l'apha ùkporo l'iri ono bvùru

gedegede; ndibe Chipfu g'ephe ha, bu iya bu ndu Ízurelu; wufukota l'alì ndu Ijiputu. ⁴²Eshi ophu Chipfu nwuru ɛnya l'enyashi ono g'oo-me dufuta phe le Ijiputu be ephebe ndu Ízurelu g'ephe ha a-nwujekwarupho Chipfu ɛnya l'enyashi ono gude kwabe iya ubvu; e shi l'ogbo sweru ogo.

K'eme k'obo Ojegahata

⁴³Chipfu su Mosisu waa Eronu: “Waa g'unu e-meje k'obo Ojegahata baa: “G'o to nwekwa nlwamulwa, l'a-taje anu obo-iphe ono. ⁴⁴Ohu, unu gbataru agbata be unu e-bujeada ubvu; teme lo taa ya. ⁴⁵Ole g'onye, byaru abyabya; ozoo onye e beru ozi ba atajekwa iya.

⁴⁶“Aa-noduje l'ime ulo lanu taa ya. G'o to nwekwa anu obu; ophu ee-gude lufuta etezi. Ophu o dukwa okpu iya me nanu, unu a-nyakwo anyakwo. ⁴⁷Ndu Ízurelu g'ephe ha be a-tukoje bo obo-iphe ono.

⁴⁸“O -buru l'onye lwaru alwalwa, bu le ndunu be o du ge ya yiru l'obo Ojegahata ke Chipfu ono; g'o bushikota ndibe iya ndu k'unwoke ubvu g'ephe ha. Oo ya bu lo yiwaruro boaha ya g'onye a nwuru l'alì ono. G'o to nwekwa nwoke, ebuduru ubvu, a-ta iya nu. ⁴⁹Oo ekemu lanu-a duru onye a nwuru anwunwu l'alì-a; bya aduru onye lwaru alwalwa; unu eya tuko buru.”

⁵⁰Ndu Ízurelu g'ephe ha bya emekota iphe, Chipfu pfuru Mosisu yee Eronu. ⁵¹O buru le mboku ono gedegede be Chipfu dufutaru ndu Ízurelu g'ephe hakota l'alì Ijiputu.

Eye ndu bu okpara l'eka Chileke

13 ¹Chipfu su Mosisu: ²“Doberu mu okpara unu iche. Iphe-mbu, vu-kporu uzo waa ekpa-nwa l'ephe ne iya le Ízurelu: me nemadzu me iphe-edobe; bu nkemu.”

³Noo ya; Mosisu su ndu Ízurelu: “Unu nyata ntanu-a; mbu mboku, unu wufutaru le Ijiputu, bu eka unu shi buru ohu. Ntanu-a bu mboku, Chipfu gude okpehu iya dufuta unu. G'o to dukwa onye a-ta iphe, e yeru iphe, ekoje buredi. ⁴Oo ntanu-a l'ime onwa Abibu-a be unu atugbu. ⁵Teke Chipfu durwuɛrupho unu l'alì ndu Kėnanu; waa ke ndu Hetu; waa ke ndu Amoru; waa ke ndu Hevu; teme waa ke ndu Jiebusu; alì ono, o riburu nna unu oche phe angu le ya a-nu unu; alì, mini ɛra-eswi waa manu-ɛnwu jiru ke pyimu pyimu; unu dobejekwa omelalì-a l'onwa-a. ⁶Ujiku ɛsaa be unu a-takota buredi, e yeduru iphe, ekoje buredi. O -rwua le mboku k'ɛsaa; unu abooru Chipfu obo-iphe. ⁷Unu takotaje buredi, e yeduru iphe, ekoje buredi l'ime ujiku ɛsaa ono. G'o to nwekwa iphe, e yeru iphe, ekoje buredi, aa-huma l'echilabo unu. Teme g'o to dukwa iphe, ekoje buredi, aa-huma l'alì unu. ⁸Mboku ono be unu a-su unwu unu l'iphe, kparu iphe, unu gude eme iya bu iphe, Chipfu meru unu mboku, unu lufutaru l'alì Ijiputu. ⁹G'omelalì ono bukwaru iphe-ohubama, e byiru unu ge mbo l'eka;

dee ya unu g'uri l'iphu; g'e gude nyatajeru unu l'ekemu Chipfu bu iphe, unu a-kpujeru l'onu; kele o Chipfu ono gude okpehu iya dzota unu l'ali Ijiputu. ¹⁰Unu meje ekemu-a me o -rwuepho teke emeje iya; apha g'apha.

¹¹“Chipfu -durwuchaepho unu ali Kénanu ono; bya anu eya pho unu g'o riburu iya unu le nna unu oche phe le nte; ¹²bukwa g'unu nuje Chipfu iphe-mbu, vukporu uzo waa ekpa-nwa l'epho ne iya. Anu mbu, bu okee ya, vuru uzo waa ekpa-nwa l'epho ne iya l'iphe-edobe unu a-buru ke Chipfu. ¹³Iphe, bu nkafu-igara, vuru uzo waa ekpa nwa l'epho ne iya be unu e-gudeje nwaturu gbata. O -buru l'unu ta agbatadu iya agbata; unu aswikwoo ya olu aswikwo. Iphe, bu okpara unu le nwoke be unu a-gbata-jekwapho agbata.

¹⁴“O -be l'ataphu; unu unu -jia unu su: ‘Bu gunu be eemedojuer iphe-a?’ Unu su phe: ‘Chipfu gude okpehu iya dufuta anyi l'ali ndu Ijiputu; mbu dufuta anyi l'eka ono, anyi shi buru ohu ono. ¹⁵Le teke Fero kpo-chiru obu jia le ya ta ahadu anyi g'anyi tugbua be Chipfu gbushiru okpara l'ali ndu Ijiputu; nemadzu me iphe-edobe. Noo iphe, meru g'o gude anyi nodu akputaje anu, bu okee ya, vuru uzo waa ekpa-nwa l'epho ne iya; gbuaru Chipfu; bya egude iphe gbata ndu bu okpara l'epho ne phe le nemadzu.’ ¹⁶G'omelali ono bukwaru iphe-ohubama, e byiru unu ge mbo l'eka; dee ya unu g'uri l'iphu; gude goshi le Chipfu gude okpehu iya dufuta unu l'ali Ijiputu.”

Ndu Izurelu l'awugha Eze-enyimu Uswe-uswe

¹⁷Fero haepho ndu Izurelu; ephe tugbua; ophu Chipfu eduduru phe shia uzo ali ndu Filisitayinu; a makwaru-a l'ono be ka ntse. Noo kele Chipfu suru: “?A maru ?ephe -vubaa ugu be ephe ta agbanwedu nu egomunggo; lashia azu l'ali Ijiputu?” ¹⁸Oo ya bu; Chipfu duru ndu Izurelu gbaa mgburugburu; shia uzo echiegu l'ibe iya k'uzo Eze-enyimu Uswe-uswe. Ndu Izurelu ono shi l'ali Ijiputu wuru tugbua; kwakobe onwophe k'ogu.

¹⁹Mosisu bya achita okpu Jiosefu gude; noo kele Jiosefu meru unu Izurelu; ephe riaru iya nte l'ephe e-me nno. O suru: “Mu maru le Chileke be e-mechaa bya eyeru unu aka. Ole g'unu chitakwa okpu mu l'eka-a me unu tugbushia.”

²⁰Ephe wufuta le Sukotu; je akpobe ulo-ekwa phe le Etamu l'aguga echiegu. ²¹O -rwua l'eswe; Chipfu egude urwukpu, kpuru oronmono edu phe uzo. O -rwua l'enyashi l'o nwuberu phe oku, kpuru oronmono g'ephe gude huma iphoró; k'ophu ephe a-noduje eje ije: eswe l'enyashi. ²²Urwukpu ono, kpuru oronmono ono, oogudeje edu phe l'eswe; waa oku ono, kpuru oronmono ono, oogudeje edu phe l'enyashi ta alufujedu alufu l'ataphu ndu Izurelu.

14 ¹Oo ya bu; Chipfu su Mosisu: ²“Pfuaru ndu Izurelu g'ephe laphu azu je akpobe ulo-ekwa phe le mgboru mkpukpu Pi-Hahirotu, no

lẹ mgbaka mkpukpu Mìgudolu yẹ eze-ẹnyimu. Ephe akpobe ọlo-ẹkwa pẹ ono l'aguga eze-ẹnyimu; g'ọ gha iphu lẹ mkpukpu Belu-Zefonu nhamunha. ³Oo ya bu lẹ Fero a-sù l'unube ndu Ízurelu nmawaru l'agaga; l'unu kwawaru l'echiegu. ⁴Mu a-kpo-chia Fero obu; l'ọ chipfuru pẹ. Obe-nu l'ee-shi l'iphe, a-nwù l'ẹhu Fero; yẹ ndu ojoḡu iya; kwabe mu ùbvù. Oo ya bu; ndu Ijiputu amaru l'ọo mbedua bu Chipfu." Noo ya; ndu Ízurelu mee nno.

⁵A bya epfuaru eze ndu Ijiputu lẹ ndu Ízurelu gbalaakwaru; Fero yẹ ndu-ozì iya gbanwee obu pẹ l'ẹka ephe nọ; sù: "Bù ḡunu bẹ anyi meru egube-a? Anyi gbẹ haa ndu Ízurelu g'ephe tugbua parù ozi, ephe eje haa?" ⁶Oo ya bu; a bya edoziaru Fero ugbo-inya iya ree; o duta ndu ojoḡu yeru onwiya. ⁷O chita ugbo-inya, kachaa ree unu l'ukporo iri; mewaro ugbo-inya Ijiputu g'ọ hakota. O byakwapho eworu ndu-ishi ojoḡu yegbachaa l'ugbo-inya ono. ⁸Chipfu kpọ-chia obu Fero, bu eze ndu Ijiputu; o chipyabe ndu Ízurelu g'ephe azo garamu garamu; awufu. ⁹Inya Fero l'ophu; waa ugbo-inya iya; waa ndu agba l'inya; waa ikpoto ndu ojoḡu iya; mbu ndu Ijiputu l'ophu chipyabe ndu Ízurelu bya agbapfu pẹ l'ẹka ephe kpoberu ọlo-ẹkwa pẹ l'agugu eze-ẹnyimu; lẹ mgboru Pi-Hahirotu, gharu iphu lẹ Belu-Zefonu nhamunha.

¹⁰Fero nodu akpiritaru ntse; ndu Ízurelu palia ẹnya imeli; o buwaru ndu Ijiputu bẹ etso pẹ nù. Ndzù rwuta pẹ; ephe bya araku Chipfu. ¹¹Ephe sù Mosisu: "Bù l'ilu ta adudu l'alì Ijiputu meru g'ọ gude i dufuta anyi g'anyi bya anwushihu l'echiegu? Bunua ḡunu meru; g'ọ gude i dufuta anyi l'alì Ijiputu? ¹²?Anyi ta asuduru ngu l'alì Ijiputu g'i parù anyi haa; g'anyi jeruro ndu Ijiputu ozi? Togo kaduru anyi mma l'anyi ejeru ndu Ijiputu ozi; eme l'anyi nwushihuru l'echiegu?"

¹³Mosisu sù pẹ: "Gẹ ndzù ba agushi unu! Unu pfuru pfushia ike; g'unu ahuma iphe, Chipfu e-me gude dzota unu ntanu-a. Ndu Ijiputu ono, unu ele ẹnya ntanu-a bẹ unu ta ahumabaekwa ozo. ¹⁴Unu nodu nggujungguji; lẹ Chipfu a-lwu-chiru-a unu oḡu!"

¹⁵Oo ya bu; Chipfu sù Mosisu: "Bù ḡunu bẹ ìiraku mu? Karu ndu Ízurelu g'ephe tugbua jeshia iphe, ephe eje. ¹⁶Wolia mgboro ngu; maa l'eze-ẹnyimu ono g'ọ kekaha mini ono ẹbo; k'ophu ndu Ízurelu e-gude okpa pẹ jee ije l'alì okponku l'oma ẹnyimu ono; wughaa. ¹⁷Mu akpo-chia obu ndu Ijiputu; k'ophu ephe e-tsoyabe pẹ. Oo ya bu; l'ee-shi l'iphe, a-nwuru Fero; yẹ ndu ojoḡu iya; waa ugbo-inya iya; me ndu agba l'inya; kwabe mube Chipfu ùbvù. ¹⁸Oo ya bu gẹ ndu Ijiputu eshi nno maru lẹ mu bu Chipfu; mbu teke ee-shi l'iphe, a-nwuru Fero; yẹ ndu ojoḡu iya; waa ugbo-inya iya; me ndu agba l'inya; kwabe mu ùbvù."

¹⁹Noo ya; Ojosi Chileke, shi vuru ọzo edu ndu Ízurelu pho bya atsu-laa azu bya etsoaha pẹ etsotso. Urwukpu pho, kpuru oronmono pho bya eshikwapho l'ataphu laa l'azu; je anodu pẹ l'okotazu; ²⁰je anokaha ndu

ojoḡu ndu Ijiputu; waa ndu Ízureḡu. L'enyashi ono mgburugburu bẹ urwukpu ono gbakotaru oḡhii l'ẹka lanu bya acha oku l'ẹka lanu. Iphe ono mee; oḡhu o dudu ndu oḡhu jekuberu nwibe phe ntse l'enyashi ono l'ophu.

²¹Tobudu iya bu; Mosisu bya amachia ẹka iya l'eli eze-enyimu ono. Enyashi ono l'ophu bẹ Chipfu gude oke pherephere, shi l'uzo enyanwu-awawa ziphu eze-enyimu ono azu; o bya aghoo ali okponku. Mini ono kekaha ebo. ²²Ndu Ízureḡu bya azoo okpa l'ali okponku gude wughaa eze-enyimu ono. Mini eze-enyimu ono kpua g'igbuloo; nodu phe lekutara; waa lekicha teke ephe awugha.

²³Ndu Ijiputu chipyabe phe. Inya Fero; waa ugbo-inya iya; waa ndu agba l'inya tukoo tsoru phe wuba l'ime eze-enyimu ono. ²⁴O -rwua l'uzo nchi-abohu; Chipfu shi l'oku; waa l'urwukpu ono, kpuru oronmono ono lee ndu ojoḡu ndu Ijiputu enya; bya atu phe eberebete. ²⁵O mee; okpa ugbo-inya phe wata agbaphe mgburugburu; k'ophu agbagba iya tsuhaharu phe lehu. Ndu Ijiputu su: "G'anyi halekwaa ndu-a; laphu azu; kele o kwa Chipfu letso anyi oḡu l'iswi ehu phe."

²⁶Oo ya bu; Chipfu su Mosisu g'o machia ẹka maa leze-enyimu ono ge mini ono bya aso-kpute ndu Ijiputu; waa ugbo-inya phe; waa ndu agba l'inya phe. ²⁷Mosisu bya amachia ẹka; maa leze-enyimu ono. O -rwua l'utsu; mini ono sohaa g'o shi aso. Ndu Ijiputu nodu agba g'ephe nahu mini ono; Chipfu zaru phe ye leze-enyimu ono. ²⁸Mini ono bya asogbabe; rikota ugbo-inya ono; yee ndu agba l'inya. Mbụ le ndu ojoḡu Fero, chipyaberu ndu Ízureḡu chia phe jasụ leze-enyimu ono ta adudu g'o ka mma loo onye lanu, lwaru nu.

²⁹Obenu le ndu Ízureḡu jeru ije l'ali okponku ghaa eze-enyimu ono. Mini eze-enyimu ono kpua g'igbuloo; nodu phe lekutara; me lekicha. ³⁰Mboku ono bẹ Chipfu dzotaru ndu Ízureḡu l'ẹka ndu Ijiputu. Ndu Ízureḡu huma ndu Ijiputu g'ephe nwushihuru dabyicharu l'aguga mini. ³¹Ndu Ízureḡu huma ike-okpu, Chipfu gude lwu-kpee ndu Ijiputu; ephe tsuhahaa Chipfu ebvu; bya ekweta nkiya; waa k'onye-ozii iya, bu Mosisu.

Ebvụ Mosisu

15 ¹Noo ya; Mosisu; waa ndu Ízureḡu gụa ebvu-a nu Chipfu su:
Mu a-gu ebvu nu Chipfu;

kele o goshiwaru lo paru ẹka.

Inya me ndu agba iya nu

bẹ o nwuru ye leze-enyimu.

²Chipfu bu okpehu mu

bya aburu onye mu agu-ku lebvụ.

O buru yebedua bu onye dzotaru mu nu.

Oo ya bu Chileke mu; mu a-nodu aja iya ajaja.

O buru iya bu Chileke nna mu;

- mu a-nọdu ekutse ẹpha iya.
- 3 Chipfu bụ ojogu.
Oo Chipfu bụ ẹpha iya.
- 4 Ụgbo-inya Fero yee ndu ojogu iya
bẹ o nwuru ye l'eze-ẹnyimu.
Ndu kachaa ree ẹ ndu-ishi ụgbo-inya Fero
bẹ mini riru ẹ Eze-ẹnyimu Uswe-uswe
- 5 Ogbumini riru pẹ;
ẹphe bụru túbukungu
l'ohu-mini gẹ mkpuma.
- 6 Ẹkutara gụbe Chipfu
bẹ ọkpẹhu,
dụ iya nụ dụ biribiri.
Ẹkutara gụbe Chipfu
bẹ gweru ndu ọhogu ngu uji.
- 7 I gude ọdu-biribiri ngu,
paru ẹka kwatsushia ndu
wu-lihuru etso ngu opfu.
I haa oke ẹhu-eghu ngu,
enwu g'ọku;
ọ bya etsua pẹ g'ọku,
etsu ẹswa ọkponku.
- 8 Oo unme bẹ i ziru l'imi;
eze-ẹnyimu kọo obvudu.
Utso ono pfuru ọọ g'igbulọ.
Ogbumini hụkoo l'ohu eze-ẹnyimu.
- 9 Ndu ọhogu sụru:
“Anyi a-chi pẹ ọso gude.
Anyi a-kwa iphe pẹ l'ọkwata; kee;
gude pẹ mee iphe,
agụ anyi ẹgu ememe.
Anyi a-mita ogu-echi anyi;
tuko pẹ gbushia.”
- 10 Obenu l'i turu unme;
eze-ẹnyimu tuko pẹ rigbushikọta.
Ẹphe bụru túbukungu
l'eze-ẹnyimu g'ota-njele.
- 11 ?Denu agwa,
aturu gụbe Chipfu?
?Bụ onye dụ gẹ ngu?
G'i dụ-be nsọ bẹ dụ biribiri.
G'i dụ-be akpabiri dukwapho ebvu.

Iimeje iphe, dughbaa biribiri.

12 Ẹkutara ngu bẹ ị machiru;
mgboko bya atuko ndu ohogu
anyi lwee.

13 Ndu ị gbafutaru
bẹ ii-gude n-yemobu ngu; dua.
Ọ buru ẹka ono, i bu, dụ nsọ ono
bẹ ii-gude okpehu ngu durwua phe.

14 Ọhamoha, numaru iya nụ
bẹ ndzụ e-rwuta.
Ndzụ e-rwuta ndu Filisitayinu.

15 Ndu-ishi ndu Edomu
bẹ meji a-tofu.
Ẹhu anmaa ndu-ishi Mówabu
anmanma.
Ndu Kėnanu erwushihu.

16 Ndzụ-agugu; waa ẹhu-anmanma
e-gude phe.
Ọ buru okpehu, dụ ngu l'ẹkutara
bẹ ii-gude mee
g'ephe dabyichaaru gẹ mkpuma;
gbiriri jasụ ndibe gube Chipfu wughata;
mbụ ndu ono, ị gbafutaru l'ohu,
ephe shi buru ono.

17 Ii-dubata phe;
bya eye phe l'eli úbvú nkengu;
mbụ ẹka gube Chipfu hotaru
g'ọ buru ibe ngu;
mbụ ụlo, dụ nsọ ophu i
gude ẹka ngu kpua.

18 Ọo gube Chipfu a-buru eze
jasụ lẹ tuutuutuu lẹ m̄imiimii.

19 Teke ịnya Fero; waa ugbo-inya iya; waa ndu agba l'inya bahuru
l'eze-enyimu ono bẹ Chipfu vutaru mini ono so-kpute phe. Obenu lẹ ndu
Ízurelu jeru ije l'alì okponku ghaa eze-enyimu ono. ²⁰ Noo ya; Miriyamu,
nwanyi, epfuchiru Chileke, bụ nwune Eronu bya ewota nkwa; unwanyi
l'ophu wu-tsoru iya; akụ nkwa bya ete iya etete. ²¹ Miriyamu nọdu aguru
phe ebvu ono; asuje:

Unu gụa ebvu nụ Chipfu;
noo kele o goshiwaru l'ọ parụ ẹka.
Ịnya yẹe ndu agba iya nụ
bẹ o nwuru ye l'echi eze-enyimu.

Mini Mara; waa Elimu.

²²Tɔ̀budu iya bụ; Mósísu dua ndu Ízurùlu gbẹ̀ lẹ̀ Eze-ẹnyimu Uswe-uswe duru p̄hẹ̀ bahu l'echiẹgu Shuru. Ẹp̄he jee ije ujiku ẹto l'echiẹgu; ọp̄hu ẹp̄he ahumaduru mini. ²³Ẹp̄he rwua Mara; ọp̄hu ẹp̄he adudu ike ngua mini iya; noo kẹle mini ono atso ilu. Noo ip̄he ono, kparu ip̄he, a guru ẹka ono Mara. ²⁴Ẹp̄he gaharu Mósísu aphu; su: “?Bu gunu be anyi a-ngu?”

²⁵Noo ya; Mósísu raku Chipfu. Chipfu bya egoshi iya mkpirikpu oshi. O wota iya chie lẹ̀ mini ono. Mini ono tsoahaa utso mini.

O kwa l'eka ono be Chipfu turu ekemu nu p̄he; bya atooru p̄he okpa iya. O bukwarupho l'eka ono be o no hua p̄he ama. ²⁶Chipfu su p̄he: “O-buru l'unu ngaberu nchi l'opfu mube Chipfu, bu Chileke unu; bya eme ip̄he, pfuru oto l'anya mu; o-buru l'unu anga nchi l'ip̄he, mu suru g'unu meje; bya etsoep̄ho ip̄he, mu toru okpa su g'unu tsoje; be o to dudu ejo ip̄he-ememe ono, mu gude byapfuta ndu Ijiputu ono, mu bya egude byapfuta unu. Noo kẹle ọo mbedua bu Chipfu onye emeje unu g'unu ka mma l'ip̄he-ememe.”

²⁷E mechaa; ẹp̄he bya ejerwua Elimu; ẹka ogba-mini iri l'ebo no; waa upfu mpfu ukporo ẹto l'iri. Ẹp̄he bya akpobe ulo-ekwa p̄he lẹ̀ mgboru mini ono.

Mana waa okwa

16 ¹Ndu Ízurùlu g'ẹp̄he ha wufu lẹ̀ Elimu; bya erwua echiẹgu Sinu, no lẹ̀ mgbaka Elimu yee ubvu Sayinayi lẹ̀ mboku, onwa k'ebo du l'abalị iri l'ise g'ẹp̄he shichaep̄ho l'alị ndu Ijiputu futa. ²G'ẹp̄he ha guru aphu kpua Mósísu yee Eronu l'echiẹgu ono; ³su p̄he: “Ome Chipfu gude ẹka iya gbushia anyi l'alị Ijiputu; m'ehu akakwa anyi guu! Ẹka ono, anyi shi anọ-pheje ite-anu mgburugburu; eriji epho. Obenu l'unu chifutaru anyi bya edobe l'echiẹgu l'eka-a g'unu kpo-gbushia anyibe igwe oha-a legu.”

⁴Chipfu su Mósísu: “Mu e-shi l'imigwe dzeeru unu nri ge mini. Ge ndu Ízurùlu lufutaje mbokumboku bya ekpota ọp̄hu a-suru p̄he eriri ke mboku ono. Ge mu eshi egube ono hua p̄he ama; maru; ?ep̄he e-kweta-a meje ip̄he, mu turu p̄he ekemu iya. ⁵O -rwua lẹ̀ mboku k'ishii; ẹp̄he eshia nri ọp̄hu ẹp̄he kpotaru. Mboku ono be ẹp̄he e-kpota iya go ha g'ọp̄hu ẹp̄he ekpotajehawa mboku ozo ugbo labo.”

⁶Ọo ya bu; Mósísu yee Eronu su ndu Ízurùlu g'ẹp̄he ha: “Uzenyashi-a be unu a-huma l'ọo Chipfu bu onye dufutaru unu l'alị Ijiputu. ⁷O -rwua l'utsu be unu a-huma ọdu-biribiri Chipfu; noo kẹle o numawaru aphu, unu agu ekpu iya. ?Bu onye be anyibedua bu; ọp̄hu unu a-nođu aguru anyi aphu?”

⁸Mósísu sukwapho: “Unu a-maru l'ọ bu Chipfu eviya. Ọo-nu unu anu, unu

a-ta l'uzenyashi-a; waa nri, a-suru unu eriri l'utsu; noo kele o numawaru aphu, unu guru kpua ya. ?Bu onye be anyi bu? Unu ta agukwaru anyi aphu; o kwa Chipfu be unu aguru iya!”

⁹Mosisu su Eronu: “Su ndu Izurelu g'ephe ha; g'ephe tuko bya l'atatiphu Chipfu. Kele o numawaru aphu, ephe agu.”

¹⁰Erону nodukwadu epfu eyeru ndu Izurelu g'ephe ha; ephe ghaa enya l'echiegu; bya ahuma odu-biribiri Chipfu g'o nwuru ke phoo l'urwukpu ono, kpuru oronmono ono.

¹¹Chipfu su Mosisu: ¹²“Mu numawaru aphu, ndu Izurelu agu. Pfuaru phe l'ephe a-ta anu le nchi-ejihu. O -rwua l'utsu l'e gude nri zu-jia phe ephe. Oo ya bu g'ephe amaru l'oo mbedua bu Chipfu, bu Chileke phe.”

¹³O -rwua l'uzenyashi ono; okwa bya atuko aka ephe kpoberu ulo-ekwa phe dzuru. A futashia l'utsu; iji kwashiwaa ike; kwaphee aka ono, ephe kpoberu ulo-ekwa phe ono mgburugburu. ¹⁴Iji ono phosahuepho; o nweru nwa iphe, wushiru l'ali l'echiegu ono, dugbaa yegeyege; bya adu g'iji, oyi meru; o huko ahuko. ¹⁵Ndu Izurelu humae ya pho; ephe su nwi-be phe: “?Bu gunu baa?” Noo kele ephe te eshidu maru iphe obu.

Mosisu su phe: “Oo nri, Chipfu nuru unu g'unu ria. ¹⁶Waa ekemu, Chipfu turu baa: 'G'onyenonu kpotaje ophu a-suru iya eriri. Ndu bu l'ulo-ekwa unu be unu e-kpotajeru ogbongu lanu ogbongu lanu.’ ”

¹⁷Ndu Izurelu mee g'e pfuru phe. O nweru ndu ophu kpotaru shii; o nweru ndu ophu kpotaru nwanshii. ¹⁸E mecha; ephe gude ogbongu gbaa ya; ophu ndu kpotaru shii; ekpotanukaduru; ophu ndu kpotaru nwanshii; ekpoteduru. Onyenonu kpotarupho ophu suru iya nu.

¹⁹Mosisu su phe: “G'o to nwekwa onye e-dobe nkiya go futu l'utsu.”

²⁰Ole o nweluru-a ndu ophu angabeduru Mosisu nchi, haphodoru nke-phe dobe; o nodu futu l'utsu. A futashia l'utsu; aka jiwa iya ejiji; teme o nodu eshiakwapho ishi. Ehu-eghu iphe ono, ephe meru ono ghuaaha Mosisu.

²¹Utsu mbokumboku; onyenonu ekpota ophu a-suru yee ndibe iya eriri. Teke anwu chishijeeru pho ike; ophu phoduru l'ali azashihu. ²²O -rwua mboku k'ishii; ephe kpotu ophu ha g'ophu ephe ekpotaje mgbo labo. Ogbongu labo be ephe kpotaru onye lanu. Ndu-ishi ndu Izurelu bya epfuaru iya Mosisu. ²³O su phe: “Waa ekemu, Chipfu turu baa: 'Echele bu eswe Sabatu; mbu eswe-atuta-unme, du nsu ke Chipfu. Oo ya bu; unu ghee iphe, du unu k'egheghe; shia, iphe du unu k'eshishi ntanu-a. Unu edobe ophu ghuduru nu jasu l'utsu.’ ”

²⁴Ephe haa ya; o boe nchi, bu iphe, Mosisu pfuru; ophu o shiduru ishi; ophu aka aladuru iya. ²⁵Mosisu su phe: “Unu ria ono ntanu-a! Noo kele ntanu-a bu eswe-atuta-unme ke Chipfu; ophu o to dudu nri, unu a-huma l'etezi ntanu-a. ²⁶Unu e-kpotaje nri ono ujiku ishii; ole o -rwua mboku k'esaa, bu eswe-atuta-unme be o to dudu.”

27Ole o nwelẹru-a ndu tųgburu lẹ mbọchi k'ẹsaa jeshia ekpota nri; obenu l'o to nwedu ọphu ẹphe hųmaru. 28Chipfu sų Mńsisu: “?Bų teke ole bẹ unu a-jikaberu eme ekemu mu; waa opfu mu? 29Nyatakwa l'ọo Chipfu bẹ nųru unu eswe-atųta-unme. Noo iphe, meru g'o gude ọ nọdu abųjeru: o -rwua mbọku k'ishii; l'ọ nų unu nri, a-sųru unu ujiku ẹbo. O -rwua mbọku k'ẹsaa; g'onymonye nọdujeepho l'ẹka ọ nọ. G'o to nwe-shiru onye a-lųfuje alųfu.” 30Oo ya bų; ndu ono dzua ike lẹ mbọku k'ẹsaa.

31Ndu Ízurelu kua nri ono mana. Ọocha ọcha g'akpuru koriyanda; tẹme ọ nọdu atsoje g'ẹcha mbekee, e gude manų-ẹnwu mee. 32Mńsisu sų: “Wakwa iphe, Chipfu epfu baa: ‘Unu kpota ogbongu mana lanų doberu ọgbo ọphu nọ l'iphu. Oo ya bų g'ẹphe ahųma nri, mu nųru unu; unu ria l'echięgu; teke mu dufutaru unu l'alį Ijiputu.’ ”

33Oo ya bų; Mńsisu sų Eronu: “Wota ite; kporu ogbongu mana lanų ye iya. Dobe iya l'atatiphu Chipfu; g'e doberu iya ọgbo ọphu nọ l'iphu.”

34Eronu woru iya dobe l'atatiphu okpoko ono, e yeru ẹkwo ekemu Chipfu ono; k'ọphu ee-dobe iya; gẹ Chipfu pfuru Mńsisu. 35Ndu Ízurelu ria mana ọkporo apha labọ; gbiriri jasų ẹphe jerwua alį ẹka e bu ebubu. Mbų l'ẹphe riru mana gbiriri jasų ẹphe rwua l'oke alį Kėnanu.

36Ogbongu lanų bų oke-lanų-l'ųzo-iri l'iphe, jiru nkweka.

Mini, shi lẹ mkpuma

17 1Ndu Ízurelu g'ẹphe ha bya wulihu l'echięgu Sinu tųgbua; ẹphe -gbẹ l'ibe iya ọphuu; ẹphe abahų l'ibe iya ọphuu; ọ bųerupho gẹ Chipfu ziru phẹ bų gẹ ẹphe eje iya. Ẹphe je akpọbe ọlo-ẹkwa phẹ lẹ Refidimu. Obenu lẹ mini, ẹphe a-ngų ta adųdu l'ẹka ono. 2Oo ya bų; ẹphe baaharų Mńsisu mba sų: “Nų anyi mini g'anyi ngua!”

Mńsisu sų: “?Bų gųnu bẹ unu abarų mu mba? ?Bų gųnu kparų iphe unu ahų Chipfu ama?”

3Obenu lẹ ndu Ízurelu bẹ ẹgu mini agųshi ike; ẹphe nọdu agųru Mńsisu aphy; sų: “?Bųnua gųnu kparų iphe i dufutaru anyi; waa ọnwu anyi; waa iphe-edobe anyi l'alį Ijiputu bya edobe g'ẹgu mini gbushia?”

4Oo ya bų; Mńsisu raku Chipfu sų: “?Dėnu gẹ mu e-me ndu-a? Ẹphe a-byaakwa mu atų-gbu lẹ mkpuma.”

5Chipfu sų Mńsisu: “Vuta ọzo gẹ ndu Ízurelu tso ngu l'azų. Lį harų ndu bų ogerenya Ízurelu duta; l'i wota mgbọro ono, i chiru l'enyimu Nayılı ono gude jeshia. 6Mu a-pfuru ngu l'atatiphu lẹ mkpuma Horebu. I -rwua ẹka ono; chia mgbọro ngu lẹ mkpuma ono. Mini, ndu Ízurelu a-ngų e-shi iya lwashihu.” Mńsisu bya emee nno l'atatiphu ndu bų ogerenya ndu Ízurelu ono. 7O bya agųa ẹka ono “Masa”; gųkwaa ya phọ “Meriba”; noo kele ndu Ízurelu barų mba; bya ahųa Chipfu ama; sų: “?Chipfu nọa l'echilabọ anyi tọo tọo nọdu iya?”

Aalwụ-kpee ndu Amaleku

⁸Ndu Amaleku bya etso ndu Ízurelu oḡu lẹ Refidimu. ⁹Mósisu sụ Jioshuwa: “Haru unwoke anyi hōta g'unu je awōta ndu Amaleku oḡu. Echele be mu e-gude mgboro Chipfu l'eka je apfuru l'eli úbvú.”

¹⁰Oo ya bu; Jioshuwa bya awōta ndu Amaleku oḡu, du ge Mósisu ziru iya. Mósisu; waa Erōnu; waa Huru bya enyihu eli úbvú; je anōdu lẹ mkpakponu iya. ¹¹O nōdu abujeru; Mósisu -chiliēpho eka imeli; ndu Ízurelu alwụ-kpeahaa. Teke o chizetaru eka; ndu Amaleku alwụ-kpeahaa.

¹²A nonyaa; eka tsuhu Mósisu mee; ephe pata mkpuma; bya edoberu iya; o nōdu anōo. Erōnu; waa Huru bya apalia ya eka imeli; onye lanu l'ekutara; onye ophuu l'ekicha. Oo ya bu; eka nōdue ya pho l'imeli egube ono gbiriri jasụ nchi jihu. ¹³Oo ya bu; Jioshuwa phe lwu-kpee ndu Amaleku.

¹⁴Noo ya; Chipfu sụ Mósisu: “Dee iphe-a l'ekwo g'o buru iphe, ee-gude-je nyata iya. Teme l'i mekwaapho ge Jioshuwa numa lẹ mu e-me ge ndu Amaleku chihu lẹ mgboko; g'a ta nyatabahe phe.”

¹⁵Mósisu bya akpua oru-ngweja; bya agua ya “O kwa Chipfu bu onye emeje g'eka mu kangoo l'ogụ”. ¹⁶O sụ: “Iphe, meru iphe, mu guru iya nno bu la chi-liru eka pfuru nu Chipfu l'aba-eze iya. Chipfu a-nōduepho etso ndu Amaleku oḡu; e-shi l'ogbo sweru ogbo.”

Jieturo akpafuta Mósisu

18 ¹Noo ya; Jieturo, onye uke ndu Midiyanu, bukwapho nna nyee Mósisu; bya anumakota iphemiphe, Chileke mekotaru Mósisu waa ndu nkiya, bu Ízurelu; teme waa ge Chipfu gude dufuta ndu Ízurelu l'alị ndu Ijiputu.

²Teke Mósisu dutaru nyee ya, bu Zipora dulaa ibe Jieturo, bu nna nyee ya ono; be Jieturo ono nabataru nyee Mósisu obu; ³waa unwu iya unwoke labo. Onye lanu be ephe iya bu Geshomu; noo kele Mósisu suru: “Mu bu onye lwaru alwalwa l'alị ndu ohozo.” ⁴Ephe onye ophuu buru Eliyēza; noo kele o suru: “Oo Chileke nna mu bu onye yeru mu eka. O dzotaru mu ge Fero te egbu mu.”

⁵Jieturo, bu nna nyee Mósisu duru unwu Mósisu; waa nyee Mósisu obu byapfuta iya l'echiegu l'eka o kpoberu ulo-ekwa lẹ mgboru úbvú Chileke. ⁶Jieturo zihawaru g'e je asu iya: “Mube Jieturo, bu nna nyee ngu be dukwa nyee ngu; waa unwegirima ibe ngu abya.”

⁷Oo ya bu; Mósisu gba iya ndzuta bya ephozeru iya ishi; bya anma iya akpa. Ephe kelechaa; bya bahu l'ulo-ekwa Mósisu. ⁸Mósisu kokotaru nna nyee ya ono iphemiphe, Chipfu meru Fero waa ndu Ijiputu l'iswi ehu ndu Ízurelu; teme waa iphe-ehuka, ephe jekotaru l'uzo; waa ge Chipfu gude dzota phe.

⁹Ehu tsoo Jieturo utso g'o numaru k'iphe, du ree, Chipfu mekotaru Ízurelu; dzota phe l'eka ndu Ijiputu. ¹⁰O sụ: “G'ajaja buru ke Chipfu, bu

onye nafutaru ngu l'eka ndu Ijiputu; yele eka Fero; mbu onye nafutaru ndu Izurelu l'eka ndu Ijiputu. ¹¹Nta-a be mu maru le Chipfu be kakota agwa l'ophu shii. Noo kele o ndu nmaru ndu Izurelu phulaphula be o meru iphe-a." ¹²Noo ya; Jieturo, bu nna nyee Mosisu bya egweeru Chipfu ngweja-akpo-oku; gwekwaarū iya pho ngweja ozowaro. Eronu duta ndu bu ogerenya Izurelu bya g'ephe le Jieturo ria nri l'ataphu Chileke.

Aahota ndu l'e-doshijeru ndu Izurelu opfu

¹³O -rwua nchitabohu iya; Mosisu bya eje anodu l'eka onoduje; kpeaharu ndu Izurelu ikpe. Ephe shi l'utsu no-pee ya mgburugburu jasū l'uzenyashi. ¹⁴Nna nyee Mosisu bya ahuma iphe, Mosisu emeru ndu Izurelu; o su: "Bu gunu be iimeru ndu Izurelu egube ono? Bu gunu kparu iphe, o bu gubedua nwekinyi ngu a-noduje ekperu ndu ono ikpe; ke g'ephe shije l'utsu no-pee ngu mgburugburu jasū l'uzenyashi?"

¹⁵Mosisu su iya: "O kwa phe abyaje mu akpata ishi iphe, bu uche Chipfu. ¹⁶Teke o bu l'oo opfu adaru phe; ephe ewotaru mu iya; mu edoshiaru phe iya; bya akaru phe iphe, Chipfu toru okpa su g'e tsoje; waa ekemu iya."

¹⁷Nna nyee Mosisu su iya: "Iphe, iime ta adudu ree. ¹⁸Oo egbugbu be gubedua; waa ndu ono, awu-pfutaje ngu nu ono egbu onwunu. Ozi ono kariru ngu eka; i tii jekotadu iya nwekinyi ngu. ¹⁹Ngabe nchi ge mu kpoziaru ngu uzo g'ii-meje iya. Ge Chipfu swikwaru ngu. Oo gubedua a-nochi enya ndu-a l'ataphu Chileke. Ii-wotaje iphe, adaru phe nu dooru iya. ²⁰Zia phe iphe, Chipfu toru okpa su g'e tsoje; waa ekemu iya; bya egoshi phe uzo, ephe e-tsoru; waa iphe, gbaru phe l'ememe. ²¹Li bya eshi l'ime ndu Izurelu g'ephe ha hota ndu ike du; mbu ndu atsū Chileke ebvu, bu ndu e gude ire phe eka; bya aburu ndu te eridu uphalazu. Hota phe g'ephe buru ndu-ishi unu umadzu labo l'ukporo iri iri; waa ndu-ishi umadzu ukporo ise ise; waa ndu-ishi umadzu ukporo ebo l'iri iri; teme waa ndu-ishi umadzu iri iri. ²²Hota phe g'ephe doshikotajeru ndu Izurelu opfu tekenteke. Ole g'ephe wotajeru ngu opfu ophu shihuru ike. Ephe edoshije opfu ophu du nphe nweka phe. Ono e-me g'ivu ngu ka nphe; noo kele unu l'ephe tukoru evu iya. ²³I -mee ya nno; o -buru uche Chileke; be ii-dukwa ike vua ivu-erwa ono; teme ndu ono -nodu ala unuphu; ephe egude ehu-utso ala."

²⁴Mosisu ngaberu nna nyee ya ono nchi; bya emekota iphemiphe, o pfuru. ²⁵O bya ahota ndu okpehu du l'echilabo Izurelu l'ophu; bya emee phe ndu-ishi ndu du unu labo l'ukporo iri iri; waa ndu-ishi ndu du ukporo ise ise; waa ndu-ishi ndu du ukporo ebo l'iri iri; teme waa ndu-ishi ndu du iri iri. ²⁶Ephe nodu anoduje edoshikotaru ndu Izurelu opfu. Opfu ophu shihuru ike be ephe ewotajeru Mosisu. Opfu ophu du nphe be ephe edoshije nweka phe.

²⁷Noo ya; Mosisu haa nna nyee ya ono; o lashia ali iya.

Úbú Sayınayi

19 ¹O be mbòku, kwe ndu Ízurelu onwa ẹto gẹdegede, ẹphe wufuru l'alì Ijiputu; ẹphe byarwuta echiegu Sayınayi. ²Ẹphe shi lẹ Refidimu bya erwua echiegu Sayınayi, bya akpòbe ọlò-ẹkwa phẹ l'ẹka ono l'òkpa úbú ono.

³Mósisu nyihu eli úbú ono nyipfu Chileke. Chipfu bya agbẹ l'úbú ono kua ya sù: “Waa iphe, ii-zi ndu ọnu-ọlò Jiékọpu baa; mbú iphe, ii-pfuru ndu Ízurelu: ⁴‘Unubẹdua l'onwunu hùmaru iphe, mu meru ndu Ijiputu; waa gẹ mu gude hee unu g'ugo, he nwa iya; hepfuta onwomu. ⁵Ọ -bùru l'unu ngabẹru mu nchi; bya edobe ọgbandzu mu bẹ unu a-bùru okiphe, dùru mu iche l'echilabọ ọhamoha. A makwaru-a lẹ mgboko l'ophu bù nkemu; ⁶ọle unu a-bùru mu alì-eze ndu-uke; waa ọha, dù nsọ.’ Noo iphe, ii-pfuru ndu Ízurelu bù ono.”

⁷Ọo ya bù: Mósisu bya alaphu azù; bya ekukọo ndu bù ọgerenya ndu Ízurelu; bya atùko iphemiphe ono, Chipfu ziru iya g'ọ pfua ono; pfukọtaru phẹ. ⁸Ndu Ízurelu tùko zùha mgbede sù: “Iphemiphe, Chipfu pfuru bẹ anyi e-mekọta.” Ọo ya bù; Mósisu bya egude ọnu, ẹphe yeru jepfu Chipfu ọzo.

⁹Chipfu sù Mósisu: “Mu a-nọdu l'urwukpu, jihuru kpakpalu byapfuta ngu; k'ophu ndu Ízurelu a-nọdu anù ẹka mu epfu eyeru ngu; g'ẹphe a-chìru upfu kwẹwaro l'ẹka ì nọ.” Ọo ya bù; Mósisu bya epfuaru Chipfu ọnu, ẹphe yeru.

Edobe ndu Ízurelu nsọ

¹⁰Chipfu sù Mósisu: “Jepfu ndu Ízurelu je edoo phẹ nsọ ntanù-a; waa echele. G'ì pfuaru phẹ g'ẹphe saa uwe phẹ asasa. ¹¹O -rwutashia mbòku k'ẹto; g'ẹphe kwakòbe-ghewa; noo kẹle mbòku ono bẹ Chipfu e-nyizeta bya anọdu l'úbú Sayınayi; ndu Ízurelu ahumakota iya g'ẹphe ha. ¹²Kpaarù phẹ oke l'úbú ono mgburugburu. Pfuaru phẹ g'ẹphe letakwa ẹnya g'òkpa phẹ te jekubekwa mgboru úbú ono ejekube; ọphu ọ bùro k'enyihu iya enyihu. Onye ẹhu iya rwutaru l'úbú ono bẹ ee-gbu egbugbu. ¹³G'a tųgbua ya lẹ mkpuma; ọzo gbagbua ya l'apfù; g'e te denyikwa iya ẹka. Ọ -bù nemadzù; ọzoo anù; g'e te kwekwa g'ọ nọdu ndzù. Ọ bùepho teke a nonyaru; e gbua opu bẹ ẹphe e-bebe jekube úbú ọbu.”

¹⁴Mósisu shichaepho l'eli úbú ono nyizeta byapfuta ndu Ízurelu. Ọ bya edoo phẹ nsọ g'ẹphe dùru Chileke iche; ẹphe bya asashia uwe phẹ. ¹⁵Ọ sù phẹ: “O -rwutashia mbòku k'ẹto; unu kwakòbechaakwa onwunu! Unu hawkwaa ejepfu nwanyi!”

Mósisu enyipfu Chileke l'úbú Sayınayi

¹⁶O belephọ l'ùtsu mbòku k'ẹto ono; ebemu-igwe wata akù kẹ phoo-phoo; egbigwe nọdu ada; tẹme urwukpu, jihuru kpakpalu sọ-kputa eli úbú ono. Opu, adashì ọda ike shi l'úbú ono ada. Onyemonye, nọ

l'ulo-ekwa iya phuhu ke kpaakpaakpaa. ¹⁷Mosisu bya edufuta phe l'eka ephe kpoberu ulo-ekwa phe g'o duru phe byapfuta Chileke. Ephe bya tuko pfuru l'okpa ubvu ono. ¹⁸Enwuru-oku tuko ubvu Sayinayi sweta; noo kele Chipfu gude oku nyizeta l'ubvu Sayinayi ono. Enwuru-oku ono nodu akpu ke tututuutu zelihi g'enwuru shi l'oku, enwu phoophoophoo. Ubvu ono l'ophu nodu anmakota jijijijii ehuka ehuka. ¹⁹Oda opu ono nodu aka shii eje. Mosisu nodu epfu opfu; a nodu anukwapho olu Chileke eka oopfu eyeru Mosisu.

²⁰O buru iya bu le Chipfu enyizeta l'eli ubvu Sayinayi; bya ekua Mosisu g'o nyipfuta iya le mkpakponu ubvu ono. Mosisu nyihu eli ubvu ono. ²¹Chipfu su iya: "Nyizeta l'ali je anmaaru ndu Izurelu okwa g'ephe ta akpape uzo g'ephe huma Chipfu; odumeka be ephe a-dukwa igwerigwe laa l'iyi. ²²Mbukponu ndu-uke, eme g'ephe byakube mube Chipfu ntse be e-do onwophe nso g'ephe duru mu iche; odumeka mu anpa phe aphu."

²³Mosisu su Chipfu: "Ndu Izurelu te enyitakwa ubvu Sayinayi; noo kele i turu anyi ekemu su g'anyi dobe ubvu ono nso; teme anyi akpaa ya oke gbaphee mgburugburu."

²⁴Chipfu su: "Nyizeta l'ali je eduta Eronu g'unu l'iya swiru. Ole ge ndu-uke; waa ndu Izurelu ophu ta akpaghatakwa oke ono byapfuta mube Chipfu; odumeka be mu a-nukwa phe aphu."

²⁵Mosisu nyizeta bya epfuaru ndu Izurelu iphe, Chipfu pfuru.

Ekemu iri, shi l'eka Chileke

20 ¹Chipfu bya epfukota iphemiphe-a; su: ²"Oo mbedua bu Chipfu, bu Chileke unu, bu onye dufutaru unu l'ali Ijiputu; mbu ali eka ono, unu shi buru ohu ono.

³"Unu ta adukwa iphe, unu a-bajeru eja; gbahaa mube Chileke kpurumu.

⁴"Unu te emetakwaru onwunu ntekepe, e meru; o yee iphe, no l'imigwe; ozoo iphe, no le mgboko-a; me iphe, bu le mini-ime-ali. ⁵Unu ta abajekwaru phe eja; ophu unu ejejekwaru phe ozi. Noo kele mube Chipfu, bu Chileke unu eko okophoo. Mu nodu anuje ndu mu du ashi aphu k'iphe, du eji, ephe meru mu; gude iya nua unwu phe aphu; me unwu nwanwa phe; me unwu nwanwanwanwa phe. ⁶Obenu l'iphe, bukpo ndu yeru mu obu bya emeje iphe, mu pfuru be mu emejekwanu ge n-yemobu mu buru o-je-le-nwanwa l'ehu phe.

⁷"Unu te ekujekwa epha mube Chipfu, bu Chileke unu l'uzo, apfuduru-oto. Noo kele mube Chipfu ta ahakwa ndu eme nno; ge mu ta nu phe aphu.

⁸"Unu nyataje mee mboku Sabatu, bu eswe-atuta-unme g'o du nso. ⁹Oo ujiku ishii be unu e-seje akanya; jekota ozi unu; ¹⁰Obenu le mboku k'esaa bu eswe atuta-unme ke Chipfu, bu Chileke unu. G'o to dukwa ozi,

unu e-jeje mboku onoya. Ophu unu ekwekwa ge nwa unu; m'onye unu gbaru ohu; me iphe-edobe unu; m'onye lwaru alwalwa, bu l'ibe unu; jee ozi mboku ono. ¹¹Noo kele oo ujiku ishii be mube Chipfu meru igwe; bya emee eliphe; yee eze-enyimu; me iphemiphe, dukota iya nu. O be le mboku k'esaa; mu tuta unme. O buru iphe ono kparu iphe, mube Chipfu goru onu-oma nu eswe-atuta-unme; bya emee ya; o du nso.

¹²“Unu kwabejekwa ne unu me nna unu ubvu. Oo ya bu g'unu enweru ndzu ogologo; buru l'ali ono, Chipfu, bu Chileke unu abya unu anunu ono.

¹³“Unu te egbukwa ochi.

¹⁴“Unu te erijekwa ogori.

¹⁵“Unu te ezijekwa iphuru.

¹⁶“Unu ta adzujekwa aka kpua nemadzu ibe unu.

¹⁷“G'ulo nwibe unu; me nyee ya; me ohu, o gbataru agbata; me iphe-edobe iya; mekpoo iphe, o nweru enweru g'o ha ta adujekwa unu ga sa loo unu nwe iya.”

¹⁸Ndu Izurelu humaephe egbigwe; waa ebemu; bya anuma opu; bya ahuma g'ubvu ono akpushi enwuru-oku; ephe nmahu ke rwuurwu le ndzu-agugu. Ephe pfuru uzanya; ¹⁹su Mosisu: “Pfuju yeru anyi gubedua; anyi a-ngabe-a nchi. Ge Chileke te epfuhewa opfu yeru anyi lonwiya; odumeka be anyi a-nwushihukwa.”

²⁰Mosisu su ndu Izurelu: “Ge ndzu ba agushi unu. Chileke byaru g'o hua unu ama; k'ophu unu a-nodu atsuje iya ebvu; haa eme iphe-eji.”

²¹Ndu Izurelu pfuru uzanya; Mosisu bya ejekube ochii ono ntse, bu aka Chileke no.

Aakupu oru-ngweja Chipfu

²²Chipfu su Mosisu: “Su ndu Izurelu le-a: Unu humawaru lonwunu le mu shi limigwe pfuru yeru unu. ²³G'o to dukwa agwa, unu e-meta swikube mu. Unu te egudekwa mkpola-ochaa; ozoo mkpola-ododo meta agwa doberu onwunu.

²⁴“O buru eja, shi l'ali be ee-gudeje kparu mu oru-ngweja, bu aka ee-gbuje aturu; waa egbu; waa eswi; gude gweeru mu ngweja-akpo-oku; waa ngweja-ehu-guu. Ekameka mu meru ga noduje; nyata epha mu be mu a-byapfutaje unu bya ekebe unu loma. ²⁵O -buru l'unu gude mkpuma akparu mu oru-ngweja; unu te egudekwa mkpuma, a rwaru arwarwa. Noo kele unu -kua ya ongu be unu turwuwaru iya. ²⁶Ophu unu akpukwa oru-ngweja ono g'o du leli; tua ya ocho k'ophu ee-nyihuje iya enyihu; a nonyaa; unu jia onwunu uwele l'oru-ngweja ono.”

Ndu Hiburu, a gbaru ohu

21 ¹“Waa ekemu, ii-zi phe baa:

²“O -buru li gbaru onye Hiburu ohu be iphe, oo-geru ngu ozi bu apha ishii. O -be l'apha k'esaa l'o nweru onwiya; a taa pfudu ugwo l'ishi iya. ³Teke o bu l'o swi nwekinyi iya teke o byaru; l'o laa nwekinyi

iya. Ọ -bụkwanuru lẹ yẹ nyee ya swị teke ọbya; nyee ya ono etsoru iya mę ọ lashia. ⁴Teke ọ bụ lẹ nnajjuphu iya lutaru iya nwanyị; ọ nwutaru iya ụnwegirima; nyee ya ono mę ụnwegirima iya ono a-tụko bụru kę nnajjuphu iya. Ọ buerupho nwoke a-la nwekinyi iya.

⁵“Obenu ọ -bụru l'ohu ono sūru lẹ ya yeru nnajjuphu iya obu; bya eye nwanyị ono, ọolu ono; waa ụnwegirima iya; ọphu ya alufudu eje enweru onwiya; ⁶g'onye nwe iya nū duru iya je l'iphu ndu-ikpe. L'ọ duru iya je l'onu-mgbo; ọzo l'okpa mgbo; je egude oji kpo-fua ya nchi. L'ọ bụru ohu iya jasū g'oo-nọ-beru.”

⁷“Ọ -būru lẹ nwoke reru nwa iya nwanyị g'ọ būru ohu; a ta abyadu aha iya g'ọ laa g'aahaję unwoke pho. ⁸Teke e reru iya onye arị kę g'ọ luru iya; a nonyaa; ọphu ọ duedu iya ree; g'ọ hakwaa g'a gbata iya. Ọ tọ gbakwaru gę nnajjuphu iya ono ree ya ndu ọhozo; noo kele o to meeduru ohu iya ọbu iphe, o kweru ukwe iya. ⁹Ọ -būru l'ọo nwa iya nwoke bę ọ zū-doru iya g'ọ luru; g'ọ mejekwa nwamgboko ọbu gę nwa, ọ nwuru anwunwu. ¹⁰Ọ -būru lẹ nwoke lutaru nwanyị ọzo; g'ọ nujekwa nyee ya kę mbu nri; nmajeru iya ekwa; emeru iya iphemiphe, eemejeru nwanyị, aalu alulu. ¹¹O -būru l'ọ too meduru iya uto iphe eto ono; gę nwanyị ono lufu; ọle g'ọ tọ dukwa mę afu, aa-pfu nwoke ono.”

Emeka onye ọzo iphe

¹²“Onye chiru nemadzū iphe chigbua ya; g'ọ lakwaa l'ochi iya. ¹³Ọle ọ -būru l'ọ to lekebeduru ęnya chigbua ya; ọ -būru l'ọo Chileke haru iya g'ọ nwua nno; bę o nweru ęka mu e-goshi unu g'onye dū nno gbajeru laa. ¹⁴Obenu; ọ -būru lẹ nemadzū lekeberu ęnya; gude ęregede gbua nemadzū ibiya; unu kputa onye ọbu kpuru lufu l'oru-ngweja mu; je egbua l'ęka ọzo.”

¹⁵“Onye tsoru ne iya; ọzoo nna iya ọgu bę ee-gbu egbugbu.”

¹⁶“Onye paru nwibe iya je eree; ọzoo l'ọ nokwadu iya l'ęka teke e guderu iya; g'e gbua onye ọbu egbugbu.”

¹⁷“Onye phuru ne iya iphu; ọzoo nna iya; g'e gbukwaa onye ono egbugbu.”

¹⁸“Ọ -būru l'unwoke labo bę opfu adaru; onye lanu tua onye ọphu mkpuma; ọzoo l'ọ pfupfuberu ęka tsua ya; ọphu onye ono anwuhudu-ru anwuhu; ọ būru iphe bę o mekaru iya; ọ zęru iya azę; g'ọ tọ dukwa iphe, ee-me onye ono, mekaru iya iphe ono; ¹⁹m'ọ būru l'onye ono mecharu-a; ọ nodu aduje ike gude mgboro ejephe l'etezi. Ọle onye ọphu mekaru iya iphe, a-pfukwanu iya ugwo azę ono, o shi zę kę mmanu ono; bya aghakwaa ya pho jasū l'ọ kaębe mma ree.”

²⁰“Ọ -būru l'ọ nweru onye chiru ohu iya iphe; m'ọ bū ohu iya kę nwoke; ọzo kę nwanyị; ohu ono shi l'iphe ono, e chiru iya ono nwuhu; g'a nükwaa onye ono, chigburu iya nū ono aphu. ²¹Obenu l'ọ -būru l'ohu ono nọru

ujiku ẹbo; ọzoo ẹto bya ewekoroḥu; g'ọ tọ dukwa iphe, ee-me onye chiru iya iphe; eshinu ohu ono bu ẹku iya be o bu.”

22 “Ọ -buru l'o nweru unwoke, alwu ọgu; ẹphe meka nwanyi, du ime iphe; mee k'ophu ẹpho lufuru iya; ọphu o dudu ẹka a kwataru meka iya iphe ọzo; g'e retakwaa onye ọphu mekaru iya iphe ọbu nre le g'odu ji nwanyi ono ree; waa ge ndu-ikpe kpeburu. 23 Obenu; o -buru l'e mekaru iya iphe shii; ge ndzu laaru ndzu; 24 g'anya laaru ẹnya; eze alaaru eze; ẹka alaaru ẹka; ọkpa alaaru ọkpa. 25 Ọ -buru ọku be o huru iya; l'a hulata iya. Teke o mefuru iya ọnyá l'ehu; l'e melata iya. Teke o tsuru mkpukpu-mee ye iya l'ehu; l'e tsukwarupho mkpukpu-mee ye yebedua l'ehu.”

26 “Ọ -buru l'o nweru onye chiru ohu iya iphe l'anya; k'ophu o chipyaru iya ẹnya lanu; g'onye ono hakwaa ohu ono g'ọ laa; je enweru onwiya; g'ọ buru ugwo ẹnya ono, o chipyaru iya ono. 27 Ọ -buru l'o chikwofuru iya eze lanu; g'ọ hakwaa ohu ono g'ọ laa je enweru onwiya; g'ọ buru ugwo eze iya ono.”

28 “Ọ -buru l'oke-eswi gude mpu du-gbua nemadzu; g'a tugbua eswi ono le mkpuma; teme g'a ta takwa anu iya atata; ole g'ọ tọ dukwa iphe, ee-me onye nwe iya nu. 29 Obenu; o -buru l'oke-eswi ọbu eme ẹna; e pfuhawaru iya onye nwe iya nu; ọphu o tọ kpo-chiduru iya l'oka; ọo ya bu; o -buru l'ọ du-gburu nemadzu; l'a tugbua eswi ono le mkpuma; onye nwe iya nu alaa l'ochi onye o du-gburu. 30 Ole o -buru l'ọ du ndu ono g'ẹphe gbuaru onye nwe eswi ono nre; g'ọ pfukotakwa iphemiphe, e gbuburu iya; shi nno gbata onwiya. 31 Eke-mu ono bukwapo iphe lanu m'o -buru l'oke eswi du-gburu nwokoro; ọzoo nwamgboko. 32 Ọ -buru l'oke-eswi ono be du-gburu ohu; g'onye nwe eswi ono pfua onye nwe ohu ono okpoga mkpola-ochaa, ẹrwa iya rwuru ukporo shekelu le shekelu iri; teme l'a tu-gbukwaapho eswi ono le mkpuma.”

33 “Ọ -buru le nemadzu kpufuru iphe le nsu; ọzoo l'onye ono turu nsu; ghebe onu; oke-eswi; ọzoo nkapfu-igara je adalahu iya; nwuhu; 34 g'onye nwe nsu ono pfukwaa ugwo anu ono. Mbua; g'onye ono pfukwaa onye nwe anu pho dalahuru le nsu pho ugwo iya; patawaro ono, nwuhuru nu ono.

35 “Ọ -buru le nemadzu be oke-eswi iya du-gburu oke-eswi onye ọzo; g'umadzu labo ono gbaru mba ree oke-eswi ọphu dzu ndzu; kee aswa iya ẹnya-nhamunha. Ẹphe ekekwaapho anu iya ọphu nwuhuru anwuhu ẹnya-nhamunha. 36 Ole o -buru l'onye nwe oke-eswi ono maru l'oke-eswi iya eme ẹna; ọphu o tọ kpo-chiduru iya l'oka; g'onye nwe oke-eswi ono kpee onye ọphu oke-eswi ọzo; pata ọphu nwuhuru nu pho.”

Akwaberu ẹku ẹnya

22 1 “Teke o nweru onye kpuru eswi; ọzoo aturu onye ọzo l'oshi; gbua; ọzoo l'o reru iya erere; g'ọ gude eswi ise pfua ugwo eswi ono. Ọ -buru aturu; l'ọ buru aturu eno.

2 “Ọ -buru l'a humaru iphuru l'eka ootsukpo ulo onye ọzo ge ya ba-hu; e meka iya iphe; o shi nno nwuhu; be onye ono, gburu iya nu ono te

egbuduru ochi. ³Obenu; o -buru l'iphe ono nwuru g'enyanywu wachaaru be onye chigburu iya nu gbukwaru ochi.

"Onye oshi pfufutaje ugwo iphe, o zitaru. Teke o bu l'o to nweduru iphe, o nweru; l'e ree yebedua lonwiya; gude aswa iya pfua ugwo iphe, o zitaru.

⁴"O -buru l'iphe ono, o zitaru ono be a humaru iya l'eka; iphe obu nodukwadia ndzu; o bu oke-eswi-o; ozoo nkafu-igara; me aturu; g'onye ono pfua ugwo iya mpukwase.

⁵"O -buru le nemadzu chiru iphe-edobe iya ye; o je ataa iphe e meberu l'opfu onye ozo; ozoo opfu-vayinu onye ozo; ozoo lo haru iya eka; o je ataa iphe e meberu l'opfu onye ozo; g'onye nwe iphe-edobe ono gude iphe, kachaa ree, shi l'opfu iya; ozoo opfu-vayinu iya; gude pfua onye ophuu ugwo iphe iya.

⁶"O -buru l'oku nahuru laa l'egbudu; k'ophu o tsuru ereshi, e gburu egbugbu; ozoo ophu pfuru apfuru; ozoo lo tsugburu opfu ono l'ophu; g'onye turu oku ono pfua ugwo iya.

⁷"O -buru lo nweru onye nuru onye ozo okpoga; ozoo iphe ozo g'o doberu iya; a bya ezita iya l'ulo ibe onye ono; o -buru l'e guderu onye-oshi ono; lo pfua ugwo iya mpukwase. ⁸Teke o bukwanu l'e te egudeduru iphuru obu; g'onye nwe ulo ono futa l'atatiphu ndu-ikpe; bya egude epha Chipfu gua enwa g'a maru lo to budu iya kpamiru iya. ⁹O -buru lo duru iphe, tuphahuru etuphahu; a huma iya onye ozo l'eka; mbu iphe, du g'eswi; ozoo nkafu-igara; ozoo aturu; ozoo iphe eye l'ehu; mbu iphe, bukpo iphe, eenwejeru enweru; l'e duta umadzu labo, adzo iphe ono bya l'atatiphu ndu-ikpe. Onye ophu ikpe nmaru lo pfua onye ophuu mpukwase.

¹⁰"O -buru lo nweru onye kperu onye ozo nkafu-igara; ozoo oke-eswi; ozoo aturu; mewaro anu ozo g'o doberu iya; o nwuhu; ozoo l'e mekaru iya iphe; ozoo lo tuphahuru; ophu o dudu onye maru iphe, meru iya nu; ¹¹g'eeshi doshia opfu ono bu g'onye ono bya l'atatiphu Chipfu je agwa enwa lo to makwa iphe, meru eku onye ophuu. G'onye nwe iya nu kwetakwa nno; g'a ta pfukwa iya ugwo iya. ¹²Ole o -bukwanuru l'a kpuru iya k'iphuru l'ibe onye ono, e doberu iya ono; g'onye ono pfukwaa onye nwe iya nu ugwo iya. ¹³O -buru loo anu-egbudu gburu iya; lo wota anu iya ophu o taphodoru je ego-shi; g'a maru loo anu-egbudu gburu iya. G'a ta asukwa g'o pfua ugwo iya.

¹⁴"O -buru lo nweru onye rwotaru iphe-edobe onye ozo; iphe-ehuka meka iya; ozoo lo nwuhuru teke onye nwe iya nu ta nodu l'eka ono; g'onye rwotaru iya nu pfukwaa ugwo iya. ¹⁵Obenu; o -buru l'onye nwe iya nu no l'eka ono teke ono; g'onye jeru arwota iya nu ta pfushi ugwo iya. Teke o bu lo pfuru ugwo; nguta eswi ono; g'okpoga ono, a pfuru ono no-chiwaro uburu obu."

Iphe, gbaru l'ememe

¹⁶"O -buru lo nweru onye kparu nwamgboko, nwoke teke ejepfuswee; ophu o dudu onye ejewa iya alulu; epe l'iya kwaa; g'o kwaru aswa nu

ndibe phe; duta iya je aluru. ¹⁷Q -buru le nna nwamgboko ono jikaru su le ya te ekedu iya ya; g'o kwaakwapho aswa, aakwaje l'ishi nwamgboko, nwoke teke ejepfuswee; nu nna iya.

¹⁸“Unu ta ahajekwa nwanyi, eme omamanshi g'o nodu ndzu.

¹⁹“Onye jepfuru anu; ephe l'ia kwaa be ee-gbuje egbugbu.

²⁰“Onye gweru ngweja nu iphe ozo, abudu mbedua, bu Chipfu nwekinyi mu be ee-gbu egbugbu.

²¹“Unu ta akpajekwa ndu lwaru alwalwa eh; ophu unu emejekwa phe ewere; noo kele unu shi buru ndu lwaru alwalwa l'ali Ijiputu.

²²“Unu te emejekwa unwanyi, ji phe anodedu; waa unwu-ogbee ewere. ²³Teke unu meru phe ewere; ephe -wolia olu; raku mube Chipfu be mu a-numakwa olu phe. ²⁴Ehu a-watakwa mu eghushi egbu ike; mu egude ogo bya atoko unu gbuabe. Unyomu unu aburu unwanyi, ji phe anodedu; unwegirima unu aburu ndu enweedu nna.

²⁵“Q -buru l'unu jieru ndu ke mube Chipfu, mkpa byaru ugwo l'echilabo unu; unu te emekwa ge ndu ejije ugwo-ntukwase. Unu ta asukwa g'ephe tukwase iya iphe. ²⁶Q -buru le nwibe unu yeru unu uwe l'itumo; unu wolaaru iya ya temanu enyanwu ariba. ²⁷Noo kele oo uwe ono bu iphe, oogudeje gbobuta eh iya. ?Buhunu gunu be oo-gude kuru mgbenya? Q -raku mube Chipfu be mu a-numakwa olu iya. Noo kele mu aphuje obu-imemini.

²⁸“Unu ta anmakwa Chileke phulaphula; ophu unu ephukwa ndu bu ndu-ishi ali unu iphu.

²⁹“Unu ta ahakwa egweru mube Chipfu ngweja, shi l'akpuru iphe, unu kpataru l'opfu; waa ophu shi le mee, unu pyitaru apyita.

“Unu kujeru okpara unu nwoke nu mu. ³⁰Unu mekwaapho eswi unu; waa aturu unu nno. Unu haje phe g'ephe noo l'ehu ne phe ujiku esaa. O -rwua mboku k'esato; unu akputa iya wotaru mu.

³¹“Unu a-buru ndu duru mu nsu. Unu ta atajekwa iphe, anu-egbudu gburu. Unu togojeru iya nkuta.”

Ekemu, a turu swibe ikpe, pfuru oto; waa k'obu-imemini

23 ¹“Ta asujekwa asulasu. Ta agbajekwa ejo ekebe gude eyeru ejo nemadzu aka.

²“Te etsojekwaru igwe-oha ye aka l'eme iphe, adudu ree. Teke i pfuru l'iphu ndu-ikpe; te egudekwa l'iime g'i pfua iphe l'a-du oha ree; woru ikpe nma onye iswi du mma. ³Te egudekwa le nemadzu bu onye ukpa; gbaaru iya odzori l'iphu ndu-ikpe.

⁴“Q -buru l'i humaru oke-eswi; ozoo nkafu-igara onye ohogu ngu aka ootupahawa etupahu; kputa iya kpu-jeru iya. ⁵Q -buru l'i humaru nkafu-igara onye i du ashi aka ivu, o vu nyi-tsutaru iya; ta ahakwa iya. Tugbukwaa je eyeru iya aka.

6“Ta jikakwa ekperu onye ukpa ikpe, pfuru oto l'ulo-ikpe. 7G'a ta anmajekwa onye e boru ibo ikpe; teme ophu eemegbujekwa onye pfube-rekoto, adudu iphe, o meru. Noo kele onye meru ejo-iphe, du nno be mu ta ahadu ge mu ta anma iya ikpe.

8“Ta anatajekwa iphe-uphalazu; kele iphe-uphalazu emejekwa g'a tua enya mkpu l'iphe, e gege ahuma; teme o nodu emeje g'a nmaa onye pfu-berekoto ikpe.

9“Unu ta akpajekwa ndu lwaru alwalwa ehu; kele unu maru g'o duje onye lwaru alwalwa; noo kele unu shiwaa buru ndu lwaru alwalwa l'ali Ijiputu.”

Ekemu eswe-atuta-unme

10“Apha ishii be unu a-koje ali unu; kpata iya iphe, e meberu iya. 11O -be l'apha k'esa; unu ahaa ali ono g'o to dukwa iphe, unu a-ko iya; k'ophu ndu Izurelu ndu ophu akpa nri e-je akpa l'eka ono; teme anu-egbudu erifu-fuwaro ughudu iya. Unu mekwapho opfu-vayinu; waa egu olivu unu nno.

12“Ujiku ishii be unu e-jeje ozi; o -be le mboku k'esa; unu te ejekwa ozi. Oo ya bu g'oke-eswi unu; waa nkapfu-igara unu edzutaje ike; teme waa g'ohu, a nwuru l'ibe unu; m'onye lwaru ibe unu alwalwa a-tutakwapho unme.

13“Unu kwabekwa enya mekota iphemiphe-a, mu pfushiru unu-a. Unu ta adukwa iphe, bu iphe, aagwa agwagwa, unu a-kpo-kuje. Unu te ephotajekwa epha iya ephota ophu.”

Uzo obo-iphe eto

14“Ugbo eto l'apha be unu a-bojeru mu obo-iphe.

15“Unu boro obo-iphe buredi, ekoduru ekoko. Ujiku esaa be unu a-taje buredi, e yeduru iphe, ekoje buredi, bu iphe, mu turu unu l'ekemu. Unu meje iya teke ono, aaboje obo-iphe ono l'onwa Abibu; noo kele oo l'onwa ono be unu lufutaru l'ali Ijiputu.

“G'o to nwekwa onye a-gbajeru eka bya l'atatiphu mu.

16“Unu gudeje mebyi-iphe-mbu, iphe unu meberu l'ali mitaru; gude boro Obo Mebyi-iphe-mbu.

“Unu boro Obo-Mkpù l'ishi apha; me unu metajepho iphe, unu meberu l'ali.

17“Ugbo eto l'apha be unwoke unu g'ephe ha a-tukoje bya l'atatiphu Nnajiuphu, bu Chipfu.

18“Unu ta adukwa iphe, e yekoberu iphe, ekoje buredi, unu e-yekobe le mee anu, unu gude egweru mu ngweja. Ophu o dukwa eba-anu ono, e gude abo obo-iphe ono, aa-ha g'o boro nchi.

19“Iphe-mbu, vuru uzo kaa l'opfu unu be unu e-gudeje bya l'ulo Chipfu, bu Chileke unu.

“Unu te egudejekwa mini-era ne eghu shia nwa iya.”

Ojozi Chileke bẹ a-bọru ndu Ízurelu ọzo

²⁰“Unu huma lẹ mu e-zi ojozi-imigwe g'o vutaru unu ọzo; eche unu nche; waa g'o dua unu durwua ẹka ono, mu kwakọbewaru akwakọbe ono. ²¹Unu ngabẹjeru ojozi-imigwe ono nchi; mee iphemiphe, ọ sọru g'unu mee. Unu te kwefukwaru iya ike; kele ọ tọo gụkwaru unu nvu; eshinu ọ bu ẹpha mu bẹ o gude eje. ²²Ọ -bọru l'unu jikpọerupho obu oyi; ngabẹ nchi l'iphemiphe, o pfuru; bya emekọta iphe, mu sọru g'unu meje; mu aburu ọhogu ndu ọhogu unu; ẹphe adu mu ashị; mbu ndu unu du ashị. ²³Ojozi mu e-vuta ọzo duru unu bahu l'alị ndu Amoru; waa ke ndu Hetu; waa ke ndu Pérezu; waa ke ndu Kénanu; waa ke ndu Hevu; waa ke ndu Jiebusu; teme mu atukọepho ndu ono mee g'ẹphe chihu l'alị ono. ²⁴Unu te ephozejekwaru iphe, bu iphe, aagwa agwagwa; ophu unu abajekwaru iya eja; ophu unu etsojekwaru phe mee omelalị phe. Unu mebyishia agwa phe; unu etsukpọshia mkpuma, ẹphe doberu l'oru-ngweja phe. ²⁵Unu bajeju mube Chipfu, bu Chileke unu eja. Mu e-meru unu iphe-oma lẹ nri waa lẹ mini; bya ewofu iphe-ememe l'echilabo unu. ²⁶L'alị unu te enwedunwanyi, ẹpho bya alufu; ọzoo onye ata atsudu ime. Mu e-me g'unu kaje nka okpobe akaka.

²⁷“Mu e-me g'a tsuje unu ebvu. Iphe, bu ohamoha, unu l'ẹphe alwu ọgu bẹ mu e-meje g'ẹphe mehu botorii. Mu emee ndu ọhogu unu g'ẹphe ghakọbeje; gbaaru unu ọso. ²⁸Mu e-ye evu g'o vuru ọzo je je agbaa ndu Hevu; yee ndu Kénanu; yee ndu Hetu gbakashia phe g'ẹphe gbeshiru unu. ²⁹Ọle mu ta achifu-gbudu phe l'apha lanu; noo kele alị ono a-bya buru okorobo-egu; teme anu-egbudu apanukaru iya unu ẹka. ³⁰Mu a-tokpọepho nwehu achishi phe; gbiriri jasu unu aka igwerigwe; du ike nwekotaru alị ono.

³¹“Mu emee g'oke alị unu gbẹ lẹ Eze-enyimu Uswe-uswe je akpaa l'eze-nyimu ndu Filisitayinu; lo bya agbe l'echiegu noo jasu l'enyimu Yufurétisu. Mu eworu ndu bu l'alị ono ye unu l'eka; g'unu chifu phe l'atatiphu unu. ³²G'unu l'ẹphe; ọzoo agwa phe ta agbakwa ndu. ³³Unu te ekwekwa g'ẹphe buru l'alị unu; ọdumeka bẹ ẹphe a-kpatakwa; unu emee iphe-ẹji meswee mube Chipfu. Noo kele unu -baaru agwa phe eja bẹ unu nmalahukwaru l'onyà.”

Eme g'ogbandzu nguru anguru

24 ¹Ọo ya bu; Chipfu su Mosisu: “Ge gubedua; waa Eronu; waa Nadabu; waa Abihu; waa ndu bu ogerenya Ízurelu ukporo umadzu eto l'umadzu iri nyipfuta mube Chipfu; bya anodu ọzenya; baaru mu eja. ²Ọo Mosisu nwekinyi iya bu onye a-byapfuta mube Chipfu; ge ndu ophu be ejekwa mu akpitaru ntse; ophu ndu Ízurelu etsokwa Mosisu nyikota imeli.”

³Mosisu bya eje epfukotaru ndu Ízurelu iphe, Chipfu pfushiru; waa eke-mu iya. ẹphe tukọ gude olu lanu zu; su: “Iphemiphe, Chipfu pfuru bẹ anyi e-mekota.” ⁴Mosisu bya atuko iphemiphe, Chipfu pfuru dekota l'ekwo.

Ọ gbeshi l'ọnmewa utsu; bya akpua ọru-ngweja l'okpa úbvú; bya apfube mkpuma iri l'ẹbo, nọ-chiru ẹnya okpa-ipfu iri l'ẹbo ndu Ízurelu. ⁵Ọo ya bu; ọ bya ezia unwokoroby a ndu Ízurelu; ephe je egwee ngweja-akpo-oku nu Chipfu; bya egbushikwaapho unwu oke-eswi gude gwee ngweja-ẹhu-guu nu Chipfu. ⁶Mósisu bya ekee mee anu ono ẹbo woru nanu wuru ye le gbamugbamu; bya ewota ophuu phee l'oru-ngweja. ⁷Ọ bya ewota Ekwo Ogbandzu ono guaru ndu Ízurelu. Ephe zia mgbede su: "Iphemiphe, Chipfu pfuru be anyi e-mekota; mbu l'anyi e-mekotajekpoephe iphemiphe, o pfuru." ⁸Mósisu bya ewota mee ono phee ndu Ízurelu l'ehu bya asu: "Waa mee, egoshi ogbandzu, Chipfu meru; unu l'iya gbaa le k'opfu, o pfuru-a."

⁹Mósisu; yee Eronu; waa Nadabu; yee Abihu; waa ndu bu ogerenya Ízurelu ukporo umadzu eto l'umadzu iri bya enyihu eli úbvú ono; ¹⁰bya ahuma Chileke ndu Ízurelu. Iphe, o pfuru l'eli iya buru iphe, e meru le mkpuma, aswa du, bu safaya; o doephe risaa g'akpaminigwe. ¹¹Ophu o dudu iphe, Chileke meru ndu bu ogerenya Ízurelu; ephe huma Chileke; bya eria nri; ngua iphe, aangu angungu.

¹²Chipfu su Mósisu: "Nyipfuta mu l'úbvú-a bya anodu l'eka-a ge mu nu ngu mkpuma, du bachibachi, mu deru ekemu; waa iphe, mu suru g'ephe meje, a-noduje akpo-ziru phe ọzo."

¹³Noo ya; Mósisu; yee Jioshuwa, bu onye eyejeru iya eka gbalihu swiru; je enyihu úbvú Chileke. ¹⁴Mósisu su ndu bu ogerenya ono: "Unu nodu l'eka-a ngaberu anyi gbiriri jasute teke anyi a-byapfuta unu ozo. Eronu yee Huru be unu l'ephe no l'eka-a; onye opfu dapfutaru; g'o jepfufe phe."

¹⁵Mósisu nyihuẹpho úbvú ono; urwukpu so-kpute iya. ¹⁶Ogbunwii Chipfu bya atuko úbvú Sayinayi ono sweta. Urwukpu ono nokota l'úbvú ono ujiku ishii. O be le mboku k'esa; Chipfu gbẹ l'urwukpu ono kua Mósisu oku. ¹⁷Ogbunwii Chipfu ono duepho ndu Ízurelu g'oku, enwu enwunwu l'eli úbvú ono. ¹⁸Mósisu nodu enyiribearu l'úbvú ono; o nodu abahuba l'ime urwukpu ono. O noo l'eli úbvú ono ukporo abali labo eswe l'enyashi.

Iphe, ee-gude mee ulo-ekwa

(Awu 35:4-9)

25 ¹Chipfu su Mósisu: ²"Pfuaru ndu Ízurelu g'ephe shi l'iphe, ephe nweru enweru hata iphe bya anu mu. Iphe, ii-nataje bu iphe, onye gude obu iya wota bya anu. ³Iphe, ephe a-nu bu mkpola-ododo; waa mkpola-ochaa; waa onyirubvu; ⁴waa owu urwukpu-urwukpu; waa ophu eke mee-mee; waa ophu du uswe-uswe; waa okpobe owu ochaa; waa eji egu; ⁵waa akpo ebili, a tseru l'uswe; waa akpo umoro-enyimu; waa oshi akesha; ⁶waa manu olivu, ee-gudeje anwu oku; waa iphe, eeyeje le manu k'awu l'ishi g'o shia mkpo; me ophu eeyeje l'unwu-isensu g'o shia kweekweek; ⁷waa mkpuma onikusu; mewaro mkpuma ozo, aswa dugbaa.

Mkpuma ono bẹ ee-mechaa gbapyabẹ l'uwe-ukuvu onye-ishi ndu-uke; yẹ-le uwe-ọkpoma iya.

⁸“Pfuaru phẹ g'ẹphe kpuaru mube Chipfu ọlo, du nsọ; gẹ mu eburu l'echilabo phẹ. ⁹Unu mekwa ọlo-ekwa ono; yee iphemiphe, a-nodukota l'ime iya g'ọ duẹpho gẹ mu e-goshi unu g'e mee ya.”

Okpoko Ọgbandzu

(Awu 37:1-9)

¹⁰“G'ẹphe gudekwa oshi akeshaa kua okpoko. G'ogologo iya du nkwo-eka labo le mkpirikpu iya. Osa iya adu nkwo-eka lanu le mkpirikpu iya. Eli iya adukwapho nkwo-eka lanu le mkpirikpu iya. ¹¹Li wua okpobe mkpola-ododo l'ime iya; waa l'azu iya. Li gudekwapho mkpola-ododo wu-pee mgbureku iya mgburugburu. ¹²Li kpata echi mkpola-ododo eno depfubegbaa l'okpa iya ephen'eno; mbu gi wota ebo depfube l'ibe lanu; wota ebo k'ophuu depfube l'ibe iya ophuu. ¹³Li gude oshi akeshaa pyita mgboro labo; wua ya mkpola-ododo. ¹⁴Li woru mgboro ono ephenebo pyochaa l'echi ono, e depfubegbaaru le mgbureku okpoko ono g'ọ buru iphe, ee-gudeje apa iya. ¹⁵Mgboro ono a-noduwaro l'echi okpoko ono. G'e te wofubaekwa iya ewofu. ¹⁶Li woru iphe, e deru ekemu mube Chipfu, bu iphe, mu e-mechaa nu unu dobe l'ime okpoko ono.

¹⁷“Li gude okpobe mkpola-ododo meta opfu okpoko; eka aapfufe ugwo iphe-aji, nemadzu meru. G'ogologo iya du nkwo-eka labo le mkpirikpu iya. Osa iya adu nkwo-eka lanu le mkpirikpu iya. ¹⁸Li gude mkpola-ododo mee chierobu labo, a-noduchaa l'ishi opfu okpoko ono. G'ọ buru mkpola-ododo, e tsusaru etsusa be ii-gude mee ya. ¹⁹Li woru chierobu lanu dobe l'ishi ibe lanu; woru ophuu dobe l'ishi iya ophuu. Li mee gẹ chierobu labo ono, nogbaa l'ishishi okpoko ono ephenebo yeke okpoko ono buru iphe lanu. ²⁰Chierobu ono be ee-me g'ọ jashia nkù l'uzo imeli; k'ophu nkù iya ono e-kpuchite opfu okpoko ono. G'ẹphe ghagbabe iphu tuko lee enya l'eli okpoko ono kwapho. ²¹Li wota opfu okpoko ono kpu-chia ya; woru iphe ono, e deru ekemu mu ono, bu iphe, mu e-mechaa nu unu ono; yekwapho l'ime okpoko ono. ²²O buru l'eli opfu okpoko ono; mbu le mgbaka chierobu labo ono, no l'eli okpoko ono, bu iya bu eka ono, e doberu iphe, e deru ekemu mu ono be mu a-byapfuta ngu bya akaru ngu iphemiphe, ndu Izurelu e-meje.”

Teburu ono

(Awu 37:10-16)

²³“Gude oshi akeshaa meta teburu. G'ogologo iya du nkwo-eka labo. Osa iya adu nkwo-eka lanu. Eli iya adu nkwo-eka lanu le mkpirikpu iya. ²⁴Li wua ya okpobe mkpola-ododo; bya egudekwapho mkpola-ododo wu-pee le mgbureku iya mgburugburu. ²⁵Li wota werere oshi, osa iya

ha g'òbochi-ẹka wụ-phee mgbureku iya mgburugburu; bya egudekwapho mkpola-ododo kpụ-phee oshi ono. ²⁶Kpụta echi mkpola-ododo ẹno de-pfubegbaa lẹ mgbureku okpa teburu ono. ²⁷Echi ono a-nọ-kubechakwaa wẹrere oshi pho; k'ophu ọo-dụkwanu ike gudeshia mgboro, ee-gudeje apa teburu ono. ²⁸L'i gude oshi akesha pyishia mgboro ono; wụa ya mkpola-ododo g'ò buru mgboro, ee-gudeje apa teburu ono. ²⁹L'i gude okpobe mkpola-ododo meshia gbamugbamu; waa ite; waa okoro; mę nkweka ee-gudeje gweeru mu ngweja-mee. Iphemiphe ono bu iphe, aa-tu-kobeje l'eli teburu ono. ³⁰G'e dobeje buredi l'iphu mu. O buru l'eli teburu ono be aa-tu-kobeje iya; k'ophu ọo-duje l'iphu mu tekenteke."

Iphe, aapfubeje oroku

(Awu 37:17-24)

³¹"Gude okpobe mkpola-ododo, e tsusaru etsusa mee iphe, aapfubeje oroku. Mee ya g'o nweru oshi; waa ekali. L'o nweru ochi; nweru nkwo iya; nweru iphe, du ge nwopu okoko; waa iphe, du g'okoko, jawaru ajaja. Tukokwa iphemiphe ono mee ge yele iphe ono, aapfubeje oroku ono dze-pfua buru nanu. ³²Oshi iya ono e-nweru ekali ishii. G'ekali eto nodu le mgbureku iya lanu; eto k'ophuu anodu le mgbureku iya ophuu. ³³G'ekali iya lanu nwejeru okoro eto. Okoro ono be ee-mechaa g'o dugbaa g'okoko oshi alumundu. Le mekwaapho nwopu okoko ye iya; ye okoko ophu jawaru ajaja. Noo g'oo-dukota l'ekali iya ono ephe n'ishii, dzepfugbaaru l'oshi iya ono. ³⁴G'oshi iya ono nwekwaru okoro eno, e meru; o du g'okoko oshi alumundu. L'o nwekwarupho iphe, e meru; o du ge nwopu okoko; ye iphe, du g'okoko ophu jawaru ajaja. ³⁵Nwopu okoko lanu be ee-me g'o nodu le mkpula ekali iya labo ono, no l'uzo ali iya. K'ebo anodu le mkpula ekali iya labo k'echi. K'eto anodu le mkpula ekali iya labo k'uzo eli. Mbụ l'oo-noduchaa le mkpula ekali iya ono ephe n'ishii. ³⁶Nwopu okoko iya ono; ye ekali iya ekali iya ono be ee-me ge yele oshi iya toko dzepfuru. O buru okpobe mkpola-ododo, e tsusaru etsusa be ee-gude mee ya.

³⁷"L'i bya emeta oroku esaa pfubegbaa l'eli iphe ono, aapfubeje oroku ono. G'e dobekwa iya k'ophu iphoro iya a-ngakotaje iphu eka o no. ³⁸Akpaa ya; waa iphe, aagujeru oku iya ye bukwa okpobe mkpola-ododo be ee-gude mekwaa ya pho. ³⁹Iphe, aapfubeje oroku ono; ye ngwa iya g'o hakota bu okpobe mkpola-ododo, erwa iya du talentu lanu be ee-gude mee ya. ⁴⁰Letakwa enya g'e mee iphemiphe ono g'o du g'e goshiru ngu iya l'eli ubvu ono."

Mkpù-ékwa

(Awu 36:8-38)

26 ¹"Ozoo bu le-a; ii-meta ulo-ekwa. Gude owu ocha, a swiru udo; waa ophu du urwukpu-urwukpu; waa ophu du uswe-uswe; ye

ophu eke mee-mee; kwee ekwa kweta iya upfu ekwa iri. G'onye maru eme ona gude owu ono kwee chierobu ye l'upfu ekwa ono. ²G'upfu ekwa ono tukokwa haru enya nhamunha. G'ogologo iya du nkwo-eka ukporo lesato. Osa iya adu nkwo-eka eno. ³Li wota upfu ekwa ono ise gbagbabe go buru nlochiru lanu; li wotakwapho uzo ise ophuu gbagbabe nanu. ⁴Nlochiru iya ono ke mbu be ii-gude owu, du urwukpu-urwukpu yeshia ya nkoloba l'igburonu upfu ekwa iya ono k'ikpazu. Li bya emekwapho nno l'upfu ekwa k'ikpazu le nlochiru iya k'ebbo. ⁵Nkoloba ukporo labo l'iri be ii-ye l'ishishi nlochiru lanu; li yekwapho nkoloba ukporo labo l'iri l'ishishi nlochiru lanu ophuu. Nkoloba ono a-tuko ghagbabe iphu. ⁶Gude mkpola-ododo meta iphe, kweru nko ishi labo uzo ukporo labo l'iri. Li gude iya dzegbabe nlochiru ekwa ono ephenebo go tuko buru nanu.

⁷“Li bya egude eji eghu kwee ekwa; kweta iya upfu ekwa iri le nanu, ee-gude phu-chite eli ulo-ekwa ono. ⁸G'upfu ekwa ono ephe n'iri le nanu tukokwa haru enya nhamunha. G'ogologo iya du nkwo-eka ukporo l'iri. Osa iya adu nkwo-eka eno. ⁹Li bya achita upfu ekwa ono ise gbagbabe go buru nlochiru lanu; chita uzo upfu ekwa ishii ophuu gbagbabe kwapho nanu. Upfu ekwa lanu ophu meru nlochiru lanu; o du upfu ishii pho be ii-pyaji ebo dobe go gboru l'atati phu ulo-ekwa ono. ¹⁰Nkoloba ukporo labo l'iri be ii-ye l'ishishi nlochiru lanu; li yekwapho nkoloba ukporo labo l'iri l'ishishi nlochiru lanu ophuu. ¹¹Li gude onyirubvu meta iphe, kweru nko ishi labo uzo ukporo labo l'iri. Li gude iya kotagbaa nkoloba nlochiru ekwa ono ephenebo; gude iya dzegbabe ulo-ekwa ono go buru nanu. ¹²A bya l'upfu ekwa, tsufuru l'ulo-ekwa ono; mbu nkeru-ebo upfu ekwa ono be ee-me go wu-zeta lazū ulo-ekwa ono. ¹³Nlochiru upfu ekwa ono, e gude phu-chite nlochiru k'ime iya pho be e-gudekota nkwo-eka lanu ka k'ime iya pho osa le mgbureku iya ibekeboebo. Ndu k'ono be aa-ha go wu-zeta l'uzo ali iya g'e gude iya kwechia mgbureku iya. ¹⁴Li wota akpo ebili, a tseru l'uswe mee iphe, ee-gude phu-chia eli ulo-ekwa ono ozo. Li bya egudekwapho akpo umoro-enyimu mee iphe, ee-gude kwechite eli akpo k'ebili ono.

¹⁵“Gude oshi akesha metachaa oshi, ee-gudeje kpo be ulo-ekwa ono. ¹⁶Oshi ono be aa-ruchaa go dugbaa nkwo-eka iri l'eli. Osa iya adu nkwo-eka le mkpirikpu iya. ¹⁷Oshi ono be aa-pyitachaa okpa labo ye l'ibekeboebo. O buru egube ono be ii-mekota oshi ulo-ekwa ono go ha. ¹⁸A bya l'ulo-ekwa ono ibiya ophu gharu iphu l'uzo ohali; bu ukporo oshi be ii-ruta yegbaa ya. ¹⁹Li gude mkpola-ochaa meshia enya eka aa-kpogbaaru okpa oshi ono ye. Li meta iya uzo ukporo labo. Iphe, bu oshi ono go ha e-nweru enya eka labo, aa-kpojeru okpa iya ye. ²⁰A bya l'ibiya ophuu; mbu ibiya ophu gharu iphu l'uzo isheli; bukwapho ukporo oshi be ii-ruta; yeshia ya. ²¹Gude mkpola-ochaa meshia enya eka aa-kpogbaaru okpa oshi ono ye. Li meta iya uzo ukporo labo. Iphe, bu oshi ono go ha e-nweru enya eka labo, aa-kpojeru okpa iya ye. ²²A bya l'okotazu

ulo-ekwa ono; mbu ibiya ophu gharu iphu l'uzo enyanwu-ariba bu oshi ishii be ii-ruta; yeshia ya. ²³Li metachaa oshi ebo ebo; yechaa le mgbureku mgbureku ulo-ekwa ono l'uzo okotazu iya ono. ²⁴Oshi labo ono, ee-yechaa le mgbureku iya ono be a-dugbaa nkwegba ebo ebo. Oo-shi l'uzo ali du nkwegba ebo jasu l'imeli. Tem e buru echi lanu be aa-kube iya. Ephenebo a-tuko dukota nno. ²⁵Oo ya bu l'oo-du oshi esato l'uzo okotazu ulo-ekwa ono. Le gude mkpola-ochaa meshia enya eka aa-kpogbaaru okpa oshi ono ye uzo iri l'ishii. Iphe, bu oshi ono g'o ha e-nwegbaar enya eka labo, aa-kpojeru okpa iya ye.

²⁶“Gude oshi akesha rwashia oshi, dugbaa gberere, ee-gude swebushia l'oshi ono. Uzo ise be ii-swebe l'oshi mgbureku ulo-ekwa ono ibe lanu; ²⁷Li swebe-kwapho uzo ise ozo le mgbureku ibe iya ophu. Uzo ise ozo aburu k'okotazu ulo-ekwa ono; ibiya ophu gharu iphu l'uzo enyanwu-ariba. ²⁸Oshi ophu ee-swebe lechi iya be aa-rwa g'o gb'e l'ishi lanu lufu l'ishi iya ophu. ²⁹Li wukota mkpola-ododo l'oshi ono, eegudeje kpobe ulo-ekwa ono. Li gudekwapho mkpola-ododo meshia echi, e-gudeshigbaa oshi ono, dugbaa gberere ono. Tem li wukwapho mkpola-ododo le gberere oshi ono.

³⁰“Rukwaa ulo-ekwa ono g'a turu ngu onu iya l'eli ubvu Sayinayi.

³¹“Li gude owu, du urwukpu-urwukpu; waa ophu du uswe-uswe; waa ophu eke mee-mee; yee owu ochaa, a swiru udo; kwee ekwa. G'onye maru eme ona gudekwa owu ono kweshia chierobu ye lekwa ono. ³²Li gude oshi akesha rwaa itso eno; waa ya mkpola-ododo. Li woru itso ono kpobechaa lenya eka e meshiru le mkpola-ochaa. Li gude iphe, kweru nko, e gude mkpola-ododo mee kobe ekwa ono l'itso ono ³³le mkpula iphe pho, kweru nko ishi labo pho, e gude dzegbabe nlochiru ekwa pho, e gude phu-chite eli ulo-ekwa ono. Li woru okpoko-ekemu ono sibe leka ono, e kobutaru ekwa ono. Ekwa ono be ee-gude kekahaa eka-du-nsa; yee eka-kakota-adu-nsa. ³⁴Le woru opfu okpoko ono, bu eka aapfuje ugwo iphe-eji, nemadzu meru ono; kpube l'eli okpoko-ekemu ono, a siberu leka-kakota-adu-nsa ono. ³⁵Li pata teburu pho sibe l'iphu ekwa ono, e gude kobuta eka-kakota-adu-nsa ono. Eka aa-sibe iya bu l'ime ulo-ekwa ono l'ibiya ophu gharu iphu l'uzo isheli. Li woru iphe pho, aapfubeje oroku pho sibe l'ibiya ophu gharu iphu l'uzo ndohali; g'ephe le teburu pho ghagbabe iphu.

³⁶“G'onye gude ngga ekwe ekwa gude owu, du urwukpu-urwukpu; waa ophu eke mee-mee; waa ophu du uswe-uswe; yee owu ochaa, a swiru udo; kwee ekwa, ee-gudeje kochite onu-abata ulo-ekwa ono. ³⁷Li gude mkpola-ododo meshia iphe, kweru nko, ee-gude kobe ekwa ono l'itso. Li gude oshi akesha rwata itso ise; wukwaa ya pho mkpola-ododo; gude onyirubvu kpushia enya eka aa-kpobegba itso ono ephe n'ise.

Oru-ngweja-akpo-oku

(Awu 38:1-8)

27 ¹“Gude oshi akesha ruta oru-ngweja. G'eli iya du nkwo-eka eto. G'ogologo iya waa osa iya tukokwa haru enya nhamunha. Iphe,

o-*d*uchaa bu nkwo-*ę*ka ise ise. ²Li *r*utachaa mpu mobechea l'ishi ishi mgbureku iya epheneno. Ge mpu ono; yee o-*r*u-ngweja ono rwagbakwaa buru nanu. I -*m*echaa ya nno; l'i woru onyirubvu wua ya. ³Li gude onyirubvu meshia iphemiphe, ee-gudeje eje ozi l'o-*r*u-ngweja ono, bu iya bu ite ekpo ntụ; waa iphe, eegudeje ekpo ntụ eye l'ite ono; waa gbumgbamu; waa oji; me iphe, aaguje oku. ⁴Li gude onyirubvu meta iphe, du nggafu-nggafu g'ugbu; bya enweru mgbureku eno. Li gudekwapho onyirubvu meta echi eno hebechea le mgbureku iphe ono. ⁵Li wota iphe ono kwechia uzo ali mgbureku o-*r*u-ngweja ono. G'a gbela uzo ali iya kwechia ya jasul'echilabo iya. ⁶Li gude oshi akeshia pyita mgboro labo, ee-gudeje apa iya. Li wukwapho mgboro ono onyirubvu. ⁷Le wocharu mgboro ono nwua lenya echi pho ibekeboebo. Mgboro ono ephenebo a-*n*odujecha le mgbureku iya ephenebo me a -*n*odu apa iya. ⁸Gudekwa ibiribe oshi mee o-*r*u-ngweja ono g'uzo du iya lechi. Mee ya g'o du ge mu goshiru ngu iya l'eli ubvu ono.”

Oma-unuphu ono

(Awu 38:9-20)

⁹“Meeru ulo-*ę*kwa ono oma-unuphu. Gude owu ocha, a swiru udo; kwee *ę*kwa, du ukporo nkwo-*ę*ka ise l'ogologo; g'e gude gebuta ibiya ophu oma-unuphu ono gharu iphu l'uzo ndohali. ¹⁰Li gude onyirubvu meta ukporo itso, aa-kpobe iya; yee enya *ę*ka aa-kpobechaa itso ono. Li gude mkpola-*o*chaa meshia iphe, kweru nko, ee-gude kobe *ę*kwa ono l'itso ono; yee iphe, ee-swebe l'itso ono. ¹¹Uzo isheli iya bukwaphe *ę*kwa, du ukporo nkwo-*ę*ka ise l'ogologo be ee-kwe; gude gebuta iya. Itso, aa-kpobe l'uzo isheli ono; yee enya *ę*ka aa-kpobe itso ono a-*d*uchaa ukporo ukporo. O bukwarupho onyirubvu be ee-gude metachaa ya. O bukwanuru mkpola-*o*chaa be ee-gude meshia iphe, kweru nko, ee-gude kobe *ę*kwa ono l'itso ono; yee iphe, ee-swebe l'itso ono.

¹²“A -*b*ya l'osa oma-unuphu ono l'uzo enyanwu-ariba iya; bukwa *ę*kwa, du ukporo nkwo-*ę*ka labo le nkwo-*ę*ka iri l'ogologo be ee-kwe; gude gebuta iya. G'e meta itso iri, aa-kpobe l'uzo enyanwu-ariba ono; metakwaphe enya *ę*ka aa-kpobechaa itso ono uzo iri. ¹³Osa oma-unuphu ono l'uzo enyanwu-awawa iya a-*d*ukwaphe ukporo nkwo-*ę*ka labo le nkwo-*ę*ka iri l'ogologo. ¹⁴Le kwee *ę*kwa, du nkwo-*ę*ka iri l'ise l'ogologo; gude gebuta aguga onu-abata oma-unuphu ono ibe lanu. Itso, aa-kpobe iya; yee enya *ę*ka aa-kpobechaa itso ono a-*d*uchaa eto eto. ¹⁵A -*b*ya l'eka aguga onu-abata oma-unuphu ono ibe iya ophu; bukwaphe *ę*kwa, du nkwo-*ę*ka iri l'ise l'ogologo be ee-kwe; gude gebuta iya. Itso, aa-kpobe iya; yee enya *ę*ka aa-kpobechaa itso ono a-*d*uchakwaphe eto eto.

¹⁶“Le gude owu, du urwukpu-urwukpu; waa ophu eke mee-mee; waa kuswe-uswe; yee owu ocha, a swiru udo; gude kwee *ę*kwa, du nkwo-*ę*ka

ùkporo l'ogologo; gude gebuta ònu-abata òma-unuphu ono. G'ò bükwaru onye maru egude ngga kwee èkwa bè e-me iya nù. Ònu-abata iya ono bè ee-meta-ru itso èno; waa ènya èka aa-kpòbechaa itso èno ono. ¹⁷Iphe, ee-swebegbaa l'itso, ee-gude kpò-buta òma-unuphu ono mgburugburu; yèe iphe, kweru nko, ee-gudechaa kobe èkwa ono l'itso ono bükota mkpòla-òchaa bè ee-gude meta iya. Tème ènya èka aa-kpòbechaa itso ono bè ee-gude onyirubvu mekòta. ¹⁸Òma-unuphu ono a-dù ùkporo nkwo-èka ise l'ogologo; dù ùkporo nkwo-èka labò l'iri l'òsa. Ee-gude èkwa, e kweru l'owu òchaa, a swìru ùdo; gebuta iya. Eli èkwa ono a-dù nkwo-èka ise. Tème l'a wükota onyirubvu l'ènya èka aa-kpòbechaa itso iya. ¹⁹Iphemiphe òzo, ee-gudejekpò eje ozi l'ùlo-èkwa ono; m'òbeta ò buru gùnu bè e gude iya eme; je akpaa lè nggu, ee-libegbaa eri ùlo-èkwa ono; mèkwapho k'òma-unuphu ono; bè ee-gude onyirubvu mekòta.”

Manù oròku ono

(Uke 24:1-4)

²⁰“Pfiaru ndu Ízurelu g'èphe wotaru ngu òkpobe manù olivu, a tsù-ru l'ikwe, ee-yeje l'oròku; g'òku oròku ono nwuje mkpùrumkpuru. ²¹Gè Erònu; yèlè ùnwu iya yeje òku l'oròku ono l'atatiphu Chipfu l'ime ùlo-èkwa-ndzukò ono; mbù l'okotazù èkwa phò, e gude kobuta okpoko-ekemu phò. G'èphe mejekwa oròku ono g'ò shije l'ùzenyashi nwuje jasù l'ùtsu. Gè ndu Ízurelu dobekwa ekemu-a; a -gbè l'ògbo sweru ògbo.”

Uwe ndu-uke

(Awu 39:1-7)

28 ¹“G'e shi l'echilabò ndu Ízurelu dufutaru ngu nwune ngu, bù Erò-nu; yèlè ùnwu iya, bù Nadabu; yèe Abihu; waa Eleyaza; yèe Itama; g'èphe bùru ndu-uke; jejeru mu ozi. ²L'a kwaarù nwune ngu, bù Erònu uwe, dù nsò; g'e shi nno mee ya g'ò dù akpabiri l'ènya; k'òphu aa-kwabeje iya ùbvù. ³Pfiaru ndu maru eme òna; mbù ndu mu meru g'èphe nweru mmami-phe g'èphe maru eme iphe, dù nno; g'èphe kwaarù Erònu uwe, ee-gude doo ya nsò; k'òphu òo-bùru onye uke; jejeru mu ozi. ⁴Wakwa ègube uwe, èphe a-kwagbaaru iya bù òwa-a: uwe-òkpoma; yèe uwe-ukuvu; waa uwe-mgbalanù; yèe uwe ime-èhu; waa okpu-èkwa; yèe èkwa-atù-buta-l'upfu. G'èphe kwaarù nwune ngu, bù Erònu; waa ùnwu iya; uwe ono, dù nsò; k'òphu èphe a-bùru ndu-uke; jejeru mu ozi. ⁵Iphe, èphe e-gude kwee èkwa uwe ono bù owu, e meru lè mkpòla-ododo; yèe owu, dù urwukpu-urwukpu; waa òphu eke mee-mee; waa k'uswe-uswe; yèe owu òchaa, a swìru ùdo.

Uwe Ukuvu

(Awu 39:2-7)

⁶“G'onye maru eme òna gude èkwa, e kweru l'owu mkpòla-ododo; waa owu, eke urwukpu-urwukpu; waa òphu eke mee-mee; waa k'uswe-uswe;

waa k'ochaa, a swiru udo; kpaaw uwe-ukuvu. ⁷G'a kwaa uwe ukuvu ono; woru werere ekwa labo yechaa ya l'ishi ukuvu iya ibe eka ebo. Le gudeje werere ekwa ono ephenebo lita k'ataphu yee k'azu. ⁸Le kwekwapho werere ekwa, ee-gudeje tu-butu iya l'upfu ye iya. Werere ekwa ono be yee uwe-ukuvu ono a-tuko buru iphe lanu. Iphe, ee-gude kwaa ya bu owu, e meru le mkpola-ododo; yee owu, du urwukpu-urwukpu; waa ophu eke mee-mee; yee k'uswe-uswe; yee owu ochaa, a swiru udo.

⁹“Wota mkpuma onikusu labo; deshia epha unwu Izurelu l'eli iya. ¹⁰Deshia epha ono le g'e gude nwushia phe. Epha ishii be ii-de le mkpuma lanu. Li dee epha ishii ophu le mkpuma k'ophuu. ¹¹Oo g'onye apyije mkpuma, vu oke aswa akashije iya epha; gude mee ya iphe-ohubama-a bu g'ii-kakota epha unwu Izurelu l'ophu l'eli mkpuma labo ono. Li wu mkpola-ododo l'igburonu mkpuma ono mgburugburu. ¹²Li dzupyabe mkpuma labo ono l'eli uwe-ukuvu pho ephenebo; k'ophu mube Chipfu e-gudeje iya nyata unwu Izurelu. Epha unwu Izurelu ono a-du l'ukuvu Eronu ephenebo go buru iphe, mu e-gudeje nyata phe. ¹³Li wu mkpola-ododo l'igburonu mkpuma ono. ¹⁴Li gude owu okpobe mkpola-ododo swita udo gwogirigwo labo. Li woru gwogirigwo ono ephenebo lipfubechaa le mkpola-ododo ono, a wuru l'igburonu mkpuma ono.”

Uwe-Okpoma

¹⁵“G'onye maru eme ona kwee uwe-okpoma, ee-gudeje achu iphe, bu uche mube Chipfu. G'e gude iphe ono, e gude kwee uwe-ukuvu ono kwee ya, bu iya bu owu, e meru le mkpola-ododo; yee owu, du urwukpu-urwukpu; yee ophu eke mee-mee; waa k'uswe-uswe; waa owu ochaa, a swiru udo. ¹⁶G'e kwekwaa ya go nweru mgbureku eno; du nkwegba labo. Ge mgbureku iya ono ephen'eno tukokwa haru enya nhamunha. G'ogologo iya du nkwo-eka lanu; osa iya adukwapho nkwo-eka lanu.

¹⁷“Dzupyabe mkpuma, vu oke aswa go kpo giriri uzo eno lekwa ono. Mkpuma, a-nodu l'ogiri ke mbu bu rubi; yee topazu; waa berilu. ¹⁸O -be l'ogiri k'ebo; bu tokwasu; yee safaya; waa emeraludu be ee-do iya. ¹⁹O -bekwa l'ogiri k'eto; le doo ya jiasintu; yee agetu; waa amitisutu. ²⁰Teke o beru l'ogiri k'eno; le doo ya kirisolayitu; yee onikusu; waa jiasupa; la wu mkpola-ododo l'igburonu mkpuma ono. ²¹Iphe, oo-du bu mkpuma iri l'ebo. Gephe ha nanu nanu no-chichaa enya unwu Izurelu. G'e dechaa epha unwu Izurelu ono le mkpuma ono go du g'iphe-ohubama nochia enya okpa-ipfu iri l'ebo ndu Izurelu.

²²“Li gude okpobe mkpola-ododo swishia udo gwogirigwo, ee-lipfubegbaa l'uwe-okpoma obu. ²³Li gude mkpola-ododo meta echi labo; yechaa l'ishi uwe-okpoma ono. ²⁴Li woru gwogirigwo pho libechaa l'echi ono, e yegbaaru l'ishi uwe-okpoma ono. ²⁵Le wota ishi gwogirigwo ono ishi iya ophu lipfubekwapho le mkpola-ododo pho, a wuru l'igburonu mkpuma

labo pho, e lipfuberu l'eli uwe-ukuvu pho. ²⁶Li gude mkpola-ododo meta echi labo ozo; lipfube l'ishi uwe-okpoma pho l'uzo ali iya. Lipfubekwa iya l'ime uwe-okpoma obu; ibiya ophu tukoru l'eli uwe-ukuvu ono. ²⁷Li gude mkpola-ododo metafua echi labo ozo; libechaa l'ishishi werere ekwa labo pho l'uzo ali iya; mbu werere ekwa ono, e liberu l'eli uwe-ukuvu ono. Libekwa iya l'eli aka ono, a nmaru werere ekwa, a tu-butaru l'upfu uwe-ukuvu ono. ²⁸Echi k'uwe-okpoma pho be ee-gude eri, e gude owu, du urwukpu-urwukpu swia; libechaa l'echi uwe-ukuvu obu; k'ophu o-nodu le mgboru werere ekwa, atu-butu l'upfu pho; g'uwe-okpoma pho ta nodu-jeshi aku peepee l'eli uwe-ukuvu ono.

²⁹“Oo ya bu; g'o buru teke Eronu abahu l'eka-du-nsa; epha unwu Izurelu anodu iya l'obu; mbu l'epha ono a-nodu l'uwe-okpoma, eegudeje achu iphe, bu uche Chileke; shi nno mee ge Chipfu gudeje iya nyata phe teke-teke. ³⁰Li yekobefukwapho ido, Urimu waa Tumimu l'uwe-okpoma obu; g'o tu-kojeru Eronu l'obu l'iphe, bukpuo teke oobya l'ataphu Chipfu. Noo ge Eronu e-gudeje paru iphe, eegudeje achu iphe, bu uche Chileke l'ehu ndu Izurelu bya l'ataphu Chipfu tekenteke bu ono.”

Uwe ozo, ndu-uke e-yeje

³¹“Gude ekwa, du urwukpu-urwukpu kwee uwe mgbalanu, ee-yeje uwe-ukuvu ono l'eli iya. ³²Kwekwaa ya g'eka, eepyoje iya ishi nodu iya l'echilabo. Li swia igburonu iya onu g'eeswije olu uwe-a; g'o to lakahu. ³³Gude owu, du urwukpu-urwukpu; waa ophu eke mee-mee; yee ophu du uswe-uswe; kpacharu akpuru itorokuma; dophee onu uwe ono mgburugburu. Li gudekwapho mkpola-ododo meshia okunmengu dokahaje iya l'echilabo. ³⁴G'okunmengu mkpola-ododo ono; waa itorokuma ono; no-phekwa igburonu uwe ono mgburugburu. Le dongakota phe edonga l'onu uwe ono. ³⁵Ge Eronu yeje iya m'o nodu eje ozi l'ataphu Chipfu; g'o to nwuhu. Oda okunmengu ono be aa-noduje anu m'o nodu abahu l'eka-du-nsa ono; waa m'o lufutashia.

³⁶“Gude okpobe mkpola-ododo meta iphe, du g'okwekpu; dee ya iphe geedeje gude mee iphe-ohubama-a. Iphe, ee-de iya bu: Onye-a duru Chipfu nso. ³⁷Li wota eri, e gude owu, du urwukpu-urwukpu swia; libe l'iphe ono, du g'okwekpu ono; woru iya lipyabe l'ataphu okpu-ekwa pho. ³⁸Erону -kpuru okpu-ekwa ono; g'o nodu iya legedegege onu-iphu; g'o buru yebdua be oo-tu-koru l'ishi; mbu aturwu, a aturwuru iphe, ndu Izurelu doberu Chipfu nso; m'obeta o buru iphe, du idu-agma be ephe doberu mu nso obu. Iphe ono, du g'okwekpu ono a-nodujeepho Eronu legedegege onu-iphu; g'iphe ono, e doberu nso ono adukwanu mube Chipfu ree k'anata.

³⁹“Li gude owu ocha kwee uwe ime-ehu pho; yee okpu-ekwa pho. G'o bukwaru onye maru egude ngga kwee ekwa be e-me ekwa-atu-butu-l'upfu

pho. ⁴⁰A -bya l'ehu unwu Erõnu; kweeru phe uwe-ime-ehu; yee ekwa-atu-butu-l'upfu; waa okpu ndu-uke; g'e shi nno mee phe g'ephe du akpabiri l'anya; k'ophu aa-kwabeje phe ubvu. ⁴¹I -yechaepho nwune ngu Erõnu; waa unwu iya uwe ono; l'i wua phe manu l'ishi; gude mee g'ephe buru ndu-uke. L'i dobe phe iche g'ephe buru ndu-uke; jejeru mu ozi.

⁴²"Li gude ekwa ocha metaru phe nwiba, ephe e-yeje. G'ephe yeje iya g'o gbephe l'upfu rwua phe l'utapfu. ⁴³Ge Erõnu; yee unwu iya yejekwa nwiba ono m'ephe nodu abahu l'ulo-ekwa-ndzuko ono; ozoo l'ephe eje ejeru mube Chipfu ozi l'oru-ngweja, no l'eka-du-nsõ; k'ophu ephe tee metadu iphe-uta kpua onwophe; shi nno nwushihu.

"G'ekemu ono dukwaru Erõnu; yee awa iya jasu le tuutuutu le mijimiimii."

Edobe ndu-uke nsõ

29 ¹"Waa iphe, ii-me gude dobe phe nsõ; k'ophu ephe a-buru ndu-uke; jejeru mu ozi bu owa-a: Kputa nwa oke-eswi lanu; waa ebili labo, enwedu eka ntucha du iya l'ehu; ²l'i gude ukpokutu iphe, e yeduru iphe, ekoje buredi; gude ghee buredi. Hatakwa iya pho gwoo le manu; gude ghee akara. Li gudekwa iya pho ghee echa-mbekee, a gbashiru manu. ³L'i tukõ iya gweru ye le nkata pataru mu; ephe l'oke-eswi pho; yee ebili labo pho. ⁴E -mechaa nno; l'i duta Erõnu; yee unwu iya bya l'onu-abata ulo-ekwa-ndzuko; gude mini wua phe eh. ⁵L'i chita uwe ndu-uke pho yee Erõnu. Vuru uzo yee ya uwe ime-ehu pho; teme l'i yee ya uwe mgbalanu pho, ee-ye uwe-ukuvu l'eli iya pho. L'i gbephe teke ono yee ya uwe-ukuvu ono l'onwiya; mofua uwe-okpoma pho. Li gude werere ekwa pho, e kweru g'e gudeje tu-butu uwe-ukuvu ono; gude tu-butu iya. ⁶Li wota okpulishi-ekwa pho kpube iya; wota iphe, du g'okwekpu pho, e doberu nsõ pho libe l'okpulishi ono. ⁷Li wota manu, aawuje l'ishi wua ya l'ishi gude mee ya onye uke. ⁸Li duta unwu iya yeshia phe uwe mgbalanu; ⁹bya ewochaaru okpu ndu-uke kpubegbaa phe l'ishi. Li wotakwapho ekwa-atu-butu-l'upfu pho; webegbaa Erõnu; yee unwu iya l'upfu. Ekemu, mube Chipfu turu phe bukwa g'ephe buru ndu-uke jasu le tuutuutu le mijimiimii. Nokwa g'ii-gude mee Erõnu; yee unwu iya g'ephe buru ndu-uke bu ono.

¹⁰"E -meebachaa nno; l'i kputa oke-eswi pho gude bya l'onu-abata ulo-ekwa-ndzuko ono. Ge Erõnu; yee unwu iya byabe iya eka l'ishi; ¹¹l'i nodu l'iphu Chipfu gbu ya l'onu-abata ulo-ekwa-ndzuko ono. ¹²Li meta mee oke-eswi ono gude mkpushi-eka ngu tee ya le mpu, nogbaa l'oru-ngweja ono. Li woru ophu ghuduru nu wushia l'okpali oru-ngweja ono. ¹³Tukõ eba, nokota l'iphe-epho iya g'o ha heta. L'i botakwapho anya iya; waa akpuru iya ephenebo; yee eba, nokota iya nu; kpoõ oku l'oru-ngweja ono. ¹⁴Anu oke-eswi ono; waa akpo iya; yee nshi iya be ii-gude je akpoõ oku lazõ eka ndu Izurelu kpoberu ulo-ekwa phe.

15 “Lì kpùta ebili phò nanù gude bya gè Erõnu yèe unwu iya byabè iya èka l'ishi; 16 Lì gbua ya; nakòbe mee ya; pata mee ya ono phedzuru lè mgbureku oru-ngweja ono mgburugburu. 17 Lì bushia anù ebili ono iphiriba iphiriba; chita iphe-epho iya; yèe okpa iya; saa asasa. Lì woru iphe-epho iya ono; yèe okpa iya ono; chikobe l'ishi iya; yèe iphiriba iphiriba iya phò. 18 Lì tũko anù ebili ono g'ò ha kpòo oku l'oru-ngweja ono. G'ò buru ngweja, a kpòru oku nù Chipfu; mkpò iya dù iya ree.

19 “Lì kpùta ebili ophuu gude bya gè Erõnu yèe unwu iya byabekwa iya phò èka l'ishi; 20 Lì gbua ya; harù mee ya meta; tee Erõnu; yèe unwu iya l'atakpa-nchi èkutara; waa lè mkpùshi-èka ezeke-èka èkutara; waa lè mkpùshi-okpa ezeke-okpa èkutara. Lì woru mee ono phedzuru lè mgbureku oru-ngweja ono mgburugburu. 21 Lì meta mee ono, sùru l'oru-ngweja ono; metakwaphò manù awù l'ishi phò phedzuru Erõnu l'èhu; phekòta iya l'uwe iya; phedzukwaru iya phò unwu Erõnu; mè l'uwe phe. Noo g'ee-shi mee gè Erõnu; yèe unwu iya; waa uwe phe; dù nsò bù ono.

22 “Ebili ono bè ii-heshikòta èba; hetachaa èba, dù l'upfumòdzu iya; waa èba, nòkòta l'iphe-epho iya g'ò ha; bòtakwaphò anya iya; waa àkpùrù iya ephenebo; yèe èba, nòkòta iya nù. Lì wota utapfu okpa èkutara iya tũkwase iya. Ebili ono bukwa ophu e gude eme Erõnu yèe unwu iya g'èphe buru ndu-uke. 23 Lì je lè nkata ono, e yeru buredi, e gudedu iphe, ekoje buredi ghee ono, nòwaa l'iphu Chipfu ono; hata iya ishi buredi lanù; hatakwaphò ishi akara lanù l'akara ono, a gwòru lè manù ghee ono; waa ècha-mbekee lanù. 24 Lì tũko iphemiphe ono g'ò ha dèe Erõnu; yèe unwu iya l'èka g'èphe woru iya maa l'atatihiphu Chipfu g'ò buru ngweja-amama. 25 E -mechaa nno; l'ì nata phe iphemiphe ono; l'ì tũko yèle ngweja-akpò-okù phò kpòo oku l'oru-ngweja ono; g'ò buru ngweja, a kpòru oku; nù Chipfu; mkpò iya dù iya ree. 26 E -mechaa; l'ì wota òdù ebili ono, e gude mee Erõnu g'ò buru onye uke ono; woru maa l'iphu Chipfu g'ò buru ngweja-amama. Ono a-buru oke iya nkengu.

27 “Anù ebili ono, e gude mee Erõnu g'ò buru onye uke ono bè ii-do nsò; mbù èka ono, rwuberu Erõnu; yèe unwu iya ono, bù iya bù òdù iya phò, a màru amàmà phò; waa utapfu iya phò, e doberu mùbe Chipfu phò. 28 Ndu Ízurelu -gude iphe ngweja bya; gè òdù iya; waa utapfu iya bujekwaru oke, aa-heje Erõnu yèe unwu iya. Ono bù okiphe ophu ndu Ízurelu e-do-bejeru mùbe Chipfu iche m'èphe bya egwe ngweja-èhu-guu.

29 “Uwe, dù nsò kè Erõnu ono bè a-bukwarupho k'awa iya. O buru uwe ono bè ephe e-yeje teke aawù phe manù gude eme phe g'èphe buru ndu-uke. 30 Gè nwa Erõnu onye ophu eeme g'ò nòchia enya iya l'òkwa uke; jeje l'ulo-èkwa-ndzukò; je jeje ozi l'èka-dù-nsò; yejekwa uwe ono ujiku esaa.

31 “Wota anù ebili ono, e gude mee Erõnu; o buru onye uke ono; je eshia l'èka dù nsò. 32 Gè Erõnu yèe unwu iya nòdu l'onu-abata ulo-èkwa-ndzukò taa anù ebili ono; waa buredi phò, e yeru lè nkata phò. 33 O kwa

ephebedua a-ta anu ngweja ono, e gude pfua ugwo iphe-eji phe; teke aawu phe manu l'ishi; e shi nno dobe phe nsò g'ephe buru ndu-uke. G'ò tò dukwa onye ozo, a-ta iya nu; noo kele o du nsò. ³⁴O -buru l'ò duru anu ebili ono, e gude mee Eronu; o buru onye uke ono; ozo buredi pho; ophu a taphodoru; o kwaa akwakwa futa l'utsu; g'e jekwa akpo ya oku. G'ò tò dukwa onye a-ta iya nu; kele o du nsò.

³⁵“Su-a; mekwaaru Eronu yee unwu iya iphe, mu turu ngu ekemu su gi meeru phe-a. Gude ujiku esaa mee phe g'ephe buru ndu-uke. ³⁶Gbuje-kwa oke-eswi mbokumboku l'ime ujiku esaa ono g'ò buru ngweja-iphe-eji, e gude apfu ugwo iphe-eji. Nokwapho g'ii-gwe ngweja-iphe-eji gude pfua ugwo iphe-eji; shi nno safu emeswe, du l'oru-ngweja ono. Teme l'i wukwaa ya pho manu gude mee ya g'ò du nsò. ³⁷Gude ujiku esaa gwee ngweja, e gude apfu ugwo iphe-eji; shi nno safu nturu, du l'oru-ngweja ono; k'ophu oo-du nsò. Oo ya bu g'ò du nsò shii; k'ophu iphemiphe, rwuru iya nu a-du nsò.

³⁸“Mbokumboku bu iphe, ii-gudeje gwee ngweja ono l'oru-ngweja ono bu nwaturu labo, nogbaaru mgbarapha. ³⁹Gbu nanu l'utsu; l'i gbua nanu ophu l'uzenyashi. ⁴⁰Aturu ke mbu pho be ii-yekobeje ukpokutu iphe je egwee; mbu uzo lanu l'ime nkweka ukpokutu iphe, e keru uzo iri; gwoo le manu, a tsuru l'ikwe; manu, e-ji eze ekpemu eno. Li wotakwapho nkeru-eno otu-lupfu otumu mee; ye iya g'ò buru ngweja-mee. ⁴¹O -be l'uzenyashi; l'i kpata aturu ophu gbua. Li yekobekwa iya pho ngwejanri; waa ngweja-mee g'e yeru le k'utsu pho; g'ò buru ngweja, a kporu oku nu Chipfu; mkpo iya du iya ree.

⁴²“G'e gwejekwa ngweja-akpo-okua tekenteke l'onu-abata ulo-ekwandzuko, bu iya bu l'ataphu mube Chipfu; e -shi l'ogbo sweru ogbo. Oo l'eka ono be mu a-byapfuta ngu bya epfuru yeru ngu. ⁴³O bukwarupho eka ono be mu a-byapfuta ndu Izurelu; ogbunwinwii mu emee eka ono l'ò du nsò.

⁴⁴“Noo ge mu e-shi mee g'ulo-ekwandzuko ono; yee oru-ngweja ono; du nsò; mekwapho ge Eronu; yee unwu iya; du nsò; buru ndu-uke; jejeru mu ozi. ⁴⁵Teke ono; mu eburu l'echilabo ndu Izurelu buru Chileke phe. ⁴⁶Oo ya bu g'ephe amaru l'oo mbedua bu Chipfu, bu Chileke phe; onye dufutaru phe l'alì Ijiputu ge mu eburu l'echilabo phe. Oo mbedua bu Chipfu, bu Chileke phe.”

Oru-ngweja unwu-isensu

(Awu 37:25-28)

30 ¹“Gude oshi akesha kua oru-ngweja, bu eka aa-kpoje unwu-isensu oku. ²G'ogologo iya waa osa iya tukokwa haru enya nhamunha. Iphe, oo-duchaa bu nkwo-eka lanu. Eli iya adu nkwo-eka labo. Ge mpu iya; yee oru-ngweja ono rwagbakwaa buru nanu.

³Wụkotakwa eli iya; yee mgbureku iya; waa mpu iya okpobe mkpola-ododo. Li gudekwapho mkpola-ododo kpụ-pee mgbureku iya mgburugburu. ⁴Li meta echi mkpola-ododo ẹbo ẹbo yegbaa le mgbureku iya ibekeboebo. Yekwa iya g'ọ nọduchaa le mkpula iphe ono, a kpụ-phe-ru iya mgburugburu ono. O bụru l'echi ono be ee-yeje mgboro, ee-gudeje apa iya. ⁵Gude oshi akeshia pyita mgboro ono; wua ya mkpola-ododo. ⁶Li dobe oru-ngweja ono l'iphu ekwa pho, e gude kochite okpoko-ekemu; mbu opfu okpoko pho, aa-noduje apfu ugwo iphe-eji pho, e gude kpuchia okpoko-ekemu. Oo aka ono bu aka mu a-byapfutaje ngu.

⁷"Ge Eronu kpojekwa unwu-isensu, eshi mkpo oku l'oru-ngweja ono l'utsu me o -jeshia emezi oroku pho. ⁸G'ọ kpojekwapho unwu-isensu oku l'oru-ngweja ono l'uzenyashi me o -jeshia eye oku l'oroku ono; k'ophu oku unwu-isensu a-noduje enwu l'ataphu Chipfu; e -shi l'ogbo sweru ogbo. ⁹G'ọ to dukwa unwu-isensu ozo, gbaru iche, ee-gudeje bya akpo oku l'oru-ngweja ono. Ophu e gudejekwa ngweja-akpo-oku; ozoo ngweja-nri; ozoo ngweja-mee bya l'oru-ngweja ono. ¹⁰Ugbo lanu l'apha be Eronu eteje mee le mpu oru-ngweja ono gude pfua ugwo iphe-eji. O buri mee anu ngweja-iphe-eji, e gude apfu ugwo iphe-eji; be ee-teje le mpu ono aphagapha. G'e mejekwa iya nno; e -shi l'ogbo sweru ogbo. Eka ono bu kwa aka kachaa aduru mube Chipfu nsu."

Utu ulo-ekwa-ndzuko

¹¹Noo ya; Chipfu su Mosisu: ¹²"Teke ii-gu ndu Izurelu ogu gi maru g'ephe ha; g'onyenonu pfujekwa mube Chipfu aswa ishi onwiya gude gbata onwiya; me a gue ya pho. Oo ya bu g'ọ to du ejo iphe-ehuka, a-byapfuta phe nu teke aa-gu phe ogu obu. ¹³G'onye a guru pfujekwa okpoga mkpola-ochaa, erwa iya rwuru nkeru-ebo shekelu; teme l'o jepfu ndu ophu a guwaru. Gerwa shekelu ono, onye ono a-nu ono bukwaru iphe, eegudeje atu erwa iphe leze-ulo mube Chileke be ee-gude tua ya. Erwa shekelu lanu bu ukporo gera. O buri nkeru-ebo erwa shekelu ono be a-buru iphe, ee-doheru mube Chipfu iche. ¹⁴Iphe, bu onye a guru ogu; a -gbẹ l'onye noru ukporo apha kwaseru be a-nu mube Chipfu iphe. ¹⁵Ge ndu nweru iphe ta nughatakwa nkeru-ebo erwa shekelu ono; ophu ndu ukpa anu-petekwanu iya; me unu -nodu anu mube Chipfu iphe unu gude pfua ugwo iphe-eji, unu meru. ¹⁶Nata okpoga ndu Izurelu ono, e gude apfu ugwo iphe-eji phe ono; gude jee ozi l'ulo-ekwa-ndzuko ono. Ono bu iphe, mube Chipfu e-gude anyata ndu Izurelu; bya aburu iphe, ee-gude pfua ugwo iphe-eji, ephe meru."

Eze gbamugbamu ono

(Awu 38:8)

¹⁷Noo ya; Chipfu su Mosisu: ¹⁸"Gude onyirubvu mee eze gbamugbamu, ee-gudeje wua eh. Gudekwa iya pho mee okpa iya. Li sibe iya le

mgbaka ɔlo-ekwa-ndzuko ono; yee ɔru-ngweja ono; kuru mini ye iya. ¹⁹Gɛ Eronu; yee unwu iya kwoje eka yee okpa le mini ono. ²⁰Ephe -nodu abahu l'ulo-ekwa-ndzuko ono; ozoo l'ephe ejekube ɔru-ngweja ono eje anu mube Chipfu ngweja, aakpo oku; g'ephe kwoshijekwa onwophe mini; k'ophu ephe ta anwushihudu. ²¹Mbu-a; g'ephe kwojekwaa eka yee okpa; k'ophu ephe ta anwushihudu. Ono bu ekemu, a-duru Eronu; yee awa iya; e-shi l'ogbo sweru ogbo.”

Manu awu l'ishi

(Awu 37:29)

²²Noo ya; Chipfu su Mosisu: ²³“Wota okpobe iphe, eshi mkpo gude bya. Iphe, ii-wota bu: Meru mini ophu erwa iya du unu shekelu l'ukporo shekelu ise; waa sinamonu, eshi mkpo ophu erwa iya du ukporo shekelu iri l'ebo le shekelu iri, bu iya bu nkeru-ebo meru pho; waa oshi omanko, eshi mkpo ophu erwa iya du ukporo shekelu iri l'ebo le shekelu iri; ²⁴waa kashiya ophu erwa iya du unu shekelu l'ukporo shekelu iri. G'o ha bukwaru iphe, eegudeje atu erwa iphe leze-ulo mube Chileke be ee-gude tua ya. Li wotakwapho manu olivu, jiru eze ekpemu eno. ²⁵G'onye maru eme manu-mbeleke tuko iphemiphe ono gwakobe g'o buru manu, du ns'o bya eshi mkpo, aawuje l'ishi. Oo-buru manu, du ns'o, aa-wuje l'ishi. ²⁶Li gude manu ono wu-dzuru ulo-ekwa-ndzuko; waa okpoko-ekemu; ²⁷waa teburu; yee iphemiphe, nokota iya nu; waa iphe, aapfubeje oroku; yee ngwa iya g'o ha; waa ɔru-ngweja unwu-isensu; ²⁸waa ɔru-ngweja, bu eka eegweje ngweja-akpo-oku; yee ngwa iya g'o ha; waa eze gbamugbamu; yee okpa iya. ²⁹Tuko iphemiphe ono doo ns'o; g'o buru iphe, kakota ns'o; g'o buru iphe, rwutakporu iya nu; l'o dukwapho ns'o.

³⁰“Wua Eronu; yee unwu iya manu l'ishi; doo phe ns'o; k'ophu ephe aburu ndu-uke jeahaaru mube Chipfu ozi. ³¹Pfuaru ndu Izurelu l'owa-a bu manu mu, du ns'o, aa-wuje l'ishi; e-shi l'ogbo sweru ogbo. ³²G'a ta wujekwa iya nemadzu mmanu; teme ophu agwajekwa manu ozo g'o du g'owa-a. O kwa manu, du ns'o. Oo ya bu g'e dobeje iya ns'o. ³³O -duru onye gwaru manu ozo; o du ge manu owa-a; ozoo l'o wuru iya nemadzu mmanu l'ishi, abudu onye uke; g'e bufukwa iya le ndu nkiya.”

Unwu-isensu

³⁴Noo ya; Chipfu su Mosisu: “Wota iphe, eshi mkpo gude bya. Iphe ii-wota bu: etse; yee onika; waa galubanumu; yee okpobe furankisensu. Tua ya l'iphe, eegudeje atu erwa iphe g'o tuko haru enya nhamunha. ³⁵G'onye maru eme manu-mbeleke tuko iphemiphe ono gwakobe g'o buru unwu-isensu, eshi mkpo. G'a pyashi iya unu. G'o bukwaru iphe ono, a gushiru ono kpoloko be ee-gude mee unwu-isensu obu. Oo-buru unwu-isensu, du ns'o. ³⁶Haru iya gwee egwegwe dobe l'atatiphu okpoko-ekemu, no

l'ulo-ekwa-ndzuko, bu iya bu eka ono, mu a-byapfuta unu ono. G'ò bu-kwaru unu ùnwù-isensu, kakaota adu nsò. ³⁷Unu te emekwa ùnwù-isensu k'unu g'ò du g'owa-a. Unu doberu iya mube Chipfu nsò. ³⁸Ò -duru onye meru ùnwù-isensu ozo, du g'owa-a; doberu onwiya ge manu-mbeleke; g'e bufukwa iya le ndu nkiya.”

Bezalelu; waa Oholiyabu

31 ¹Noo ya; Chipfu su Mosisu: ²“Lenu; mu hotawaru Bezalelu nwa Uri, bu nwanwa Huru; onye okpa-ipfu Jiuda; ³bya emewaa; unme mube Chileke ji iya ehu; g'o nweru mmamiphe; yee nkwa menya; g'iphe edoje iya enya ree; k'ophu oo-makotaru g'eemema iphemiphe emema; ⁴g'o maru g'eemeje iphe-erengete le mkpola-ododo; yee mkpola-ochaa; waa onyirubvu; ⁵makwarupho gaawa mkpuma, aswa du; waa gaawuje mkpola-ododo l'igburonu iya; bya amakwarupho gaapyije iphe apyipyi; mewaro geeshije eme ona ozo, dugbaa iche iche. ⁶Temu mu hotafuakwaru Oholiyabu nwa Ahisamaku; onye okpa-ipfu Danu; g'o yeru iya eka; bya anukotakwapho ndu maru eme ona g'ephe ha ike g'ephe mekota iphemiphe, mu suru g'unu mee. ⁷Iphe, ephe e-me bu: ulo-ekwa-ndzuko; waa okpoko-ekemu; yee opfu okpoko ono, aanoduje apfu ugwo iphe-eji ono; mewaro iphemiphe ozo, eegudeje eje ozi l'ime ulo-ekwa ono; ⁸dunaa ge teburu; yee iphemiphe, nokota iya nu; waa iphe, aapfu-beje oroku, e meru l'okpobe mkpola-ododo; yee ngwa iya g'o ha; waa oru-ngweja unwu-isensu; ⁹waa oru-ngweja-akpo-oku; yee ngwa iya g'o ha; waa eze gbamugbamu; yee okpa iya; ¹⁰wafua uwe, e kweru ekwekwe; mbu uwe, du nsò, Eronu, bu onye uke e-yeje; waa uwe, unwu iya e-yeje gude eje ozi ndu-uke; ¹¹waa manu awu l'ishi; waa unwu-isensu, eshi mkpo k'eka-du-nsò. Ò buepho g'ephe mee ya g'o du ge mu suru ngu g'e mee ya.”

Eswe-atuta-unme

¹²Noo ya; Chipfu su Mosisu: ¹³“Waa iphe ii-pfuru ndu Izurelu baa: Unu ba adukwa iphe unu e-jeje l'eswe-atuta-unme ke mube Chipfu. Owaa aburu iphe-ohubama, a-nodu l'echilabo mu l'unu; e -shi l'ogbo sweru ogbo. Oo ya bu g'unu amaru l'ò mbèdua bu Chipfu, bu onye eme unu g'unu du nsò.

¹⁴“Unu nyataje eswe-atuta-unme; noo kele mboku ono duru unu nsò. Ò -duru onye dakaru iya nu; g'e gbukwaa onye obu egbugbu. Iphe, bu onye jeru ozi mboku ono be ee-bufu ebufu le ndu nkiya. ¹⁵Òo ujiku ishii be unu e-gudeje jee ozi unu. Mboku k'esaa bu eswe Sabatu, bu iya bu eswe-atuta-unme; bya aburu mboku, duru mube Chipfu nsò. Ò -duru onye jeru ozi l'eswe-atuta-unme; g'e gbukwaa onye obu egbugbu. ¹⁶Ge ndu Izurelu dobeje eswe-atuta-unme; mee ekemu iya; e -shi l'ogbo sweru ogbo; g'o

būru iphe, a-nōdu egoshi oḡbandzu mu l'unu jasū l'ojejoje. ¹⁷Ōo-būru iphe-ōhubama, a-nōdu lē mgbaka mu lē ndu Ízurelu jasū lē tuutuutu lē mīimiimii; noo kēle oḡ ujiku ishi bē mūbe Chipfu gude mee igwe; yēe alì. O -rwua lē mboku k'ēsaa; mu haa ozi; tūta unme.”

¹⁸Noo ya; Chipfu pfughechaepho opfu nū Mōsisu l'eli úbvú Sayinayi; bya anū iya bachibachi mkpuma labo, e deru Ekemu. Mkpuma ono bụ Chileke gude mkpūshi-ēka iya dee ya iphe nwēkiya.

Nweswi, a kpuru lē mkpōla-ododo

32 ¹Ndu Ízurelu nōnyaa bya asū lē Mōsisu anōnukawa oḡdu l'eli úbvú ono; ephe bya edzukōbe gbaphee Eronu mgburugburu bya asū iya: “Ngwa; metaru anyi Chileke, a-nōdu edu anyi! Ō -būru Mōsisu-a, dufutaru anyi l'alì ndu Ijiputu-a bē anyi ta amakwa iphe, meru iya nū.”

²Eronu sū phē: “Unu yeshia iphe-nchì mkpōla-ododo, unyomu unu; waa unwu unu unwoke; mē k'unwanyi unu yeru lē nchì; chītaru mu!”

³Noo ya; ndu ono g'ephe ha bya eyeshia iphe-nchì phē bya achijeru Eronu. ⁴Ō bya achita iphe ono, ephe nūru iya ono gude meta agwa; bya akpua ya; o dū gē nweswi; bya egude ngwa oru mee ya ona. Noo ya; ephe sū: “Unubē ndu Ízurelu; waa Chileke unu baa; mbū onye dufutaru unu l'alì Ijiputu!”

⁵Noo ya; Eronu hūmaepho iphe ono bya akpua oru-ngweja latatiphu nweswi ono bya araa sū: “Echele bē a-bō Chipfu!” ⁶Ōo ya bū; o rwua nchitabōhu iya; ndu Ízurelu tehu l'onma-ēwa-ūtsu; bya egwee ngweja-akpo-oku; bya egweeru iya ngweja-ēhu-guu. E -mechaa; ephe bya anōshia ria nri; bya angua mē; bya awū-lihu meahaa ēmereme.

⁷Noo ya; Chipfu sū Mōsisu: “Nyize l'alì; noo kēle ndu nkengu ono; mbū ndu i dufutaru l'alì ndu Ijiputu ono bē merwushiwaru onwophe. ⁸Ephe meru ēgwegwa gbado ekemu ono, mu tūru phē ono; bya emetawaru onwophe agwa, ephe kpuru; o dū gē nweswi. Ephe phozewaru ishi baaru iya eja; bya agwawaa ya agwagwa sū: ‘Unubē ndu Ízurelu; waa Chileke unu, bū onye dufutaru unu l'alì Ijiputu baa!’ ”

⁹Chipfu sū Mōsisu: “Mu hūmawaru lē ndu-a būnukaru ndu ejo-ōkpo-ma. ¹⁰Nta-a bukwa g'ì haa mu gē mu gude oke ēhu-eghu mu dapfu phē bya emebyishia phē. Mu eworu gūbe Mōsisu mee oha, parū ēka.”

¹¹Mōsisu rwōahaa Chipfu, bụ Chileke iya sū: “Jiko Chipfu; g'ēhu te eghunūkashi nū ngu egu nno l'opfu ēhu ndu nkengu ono, i gude okpehu ngu dufuta l'alì Ijiputu ono nō! ¹²Gē ndu Ijiputu ta asū l'iphe, kparū iphe, i gude dufuta ndu nkengu bū g'ì bya egbushia phē l'úbvú úbvú-a g'ēphe chīhu lē mgboko. Jiko gbanaa mini l'obu; parū haa; te emebyishishi nū ndu nkengu. ¹³Nyatanū ndu-ozu ngu, bụ Ébirihamu; waa Áyizaku; waa Ízurelu, bū ndu i gude epa ngu riaru nte sū l'ii-me awa phē g'ēphe ha gē kpokpode, nō l'igwe; tēme l'ì nū awa phē alì-a, i kwekotaru phē ukwe

iya-a; l'ò bụwa okiphe phẹ jasụ lẹ tuutuutuu lẹ m̄imiimii.”¹⁴ Noo ya; ego-munggo lwa Chipfu azụ; o woru ẹjo iphe-ẹhuka ono, o shi epfu l'oo-gude byapfuta phẹ ono parụ haa.

¹⁵ Mósisu bya aghachi nyizetashia l'eli úbvú ono; yẹe mkpuma labọ ono, dụ bachibachi, e deru ekemu ono, o gude l'ẹka ono. Mkpuma ono bẹ e deru iphe l'iphu; dee ya l'azu. ¹⁶ Mkpuma ono bụ Chileke gude ẹka iya mee ya. Iphe ono, e deru iya ono, bụru Chileke gude ẹka iya dee ya l'eli mkpuma ono.

¹⁷ Noo ya; Jioshuwa n̄maepfo ụzu, ndu Ízurelu atụ; ọ sụ Mósisu: “Aatukwa ụzu ọgu l'ẹka anyi kpọberu ụlo-ẹkwa anyi.”

¹⁸ Mósisu sụ iya:

“Ọ tọo dakwa g'ụzu ndu lwụ-kperu l'ọgu;
 ọphu ọ tọo dakwanụ g'ụzu ndu a lwụ-kperu.
 Iphe, mu anụ bụkwa ụzu ebvu.”

¹⁹ Mósisu bya erwua lẹ mgboru ẹka a kpọberu ụlo-ẹkwa ono; bya ahụma nweswi ono; waa ndu ete ebvu ono. Ẹhu kwatakpọo ghushia ya eghu ike; o woru mkpuma ono, ọ gude l'ẹka ono tükposhia l'ọkpa úbvú ono.

²⁰ Ọ bya ewota nweswi ono, ẹphe kpuru ono tsua ọku bya egwee ya; ọ dụ gẹ ntụ; bya awuru iya ye lẹ mini; mee ndu Ízurelu; ẹphe ngua ya.

²¹ Ọ sụ Erọnu: “?Bụ gunu bẹ ndu-a kabekpoo mee ngu; meru g'ọ gude i duru phẹ ye l'eme iphe-ẹji, habe ẹgube-a?”

²² Erọnu sụ iya: “Jiko g'ẹhu te eghukwa ngu eghu; nnajiuphu mu. I mahawarụ gẹ ndu-a bụ-be ndu gharu iphu l'eme ẹjo-iphe. ²³ Ẹphe suru gẹ mu metaru phẹ Chileke, a-nọdu edu phẹ nụ! Kẹle Mósisu, bụ onye dufutaru phẹ l'alị Ijiputu bẹ ẹphe ta amakwa iphe, meru iya nụ. ²⁴ Ọo ya bụ; mu sụ phẹ: ‘G'onye nwekpọoru iphe, e meru lẹ mkpọla-ododo; yefuta iya.’ Noo ya; ẹphe chitaru mu mkpọla-ododo ono; mu chiru iya ye l'ọku; iphe, shi iya nụ futa bụru nweswi-a.”

²⁵ Mósisu bya ahuma lẹ ndu Ízurelu zụwaru onwophe l'ẹka nafụ; lẹ Erọnu mewaru phẹ; ọphu ẹphe ekweedu g'a chikobe phẹ; ẹphe nọdu emewaa phukuphuku l'iphu ndu ọhogu phẹ; ²⁶ ọ bya apfuru l'ọnu-abata ẹka a kpọberu ụlo-ẹkwa ono bya asụ: “Onye bụ kẹ Chipfu byapfuta mu!” Ndu Lívayi g'ẹphe ha wụ-pfuta iya.

²⁷ Noo ya; ọ sụ phẹ: “Waa iphe, Chipfu, bụ Chileke kẹ ndu Ízurelu pfuru baa: ‘G'onyenonu kebe onwiya ogu-echi iya l'upfu; jee lokotazụ; waa latatiphu; mekpoo l'ẹkameka l'ẹka a kpọberu ụlo-ẹkwa ono. G'onyenonu gbushia nwanna iya; waa ọnyà iya; mẹ obutobu iya.’” ²⁸ Oshilokpa Lívayi bya emee gẹ Mósisu ziru phẹ. Ndu nwushihuru nụ mbọku ono bẹ rwuru iphe, dụ g'unu umadzu ẹsaa l'ukporo iri.

²⁹ Noo ya; Mósisu sụ: “A hotawaru unu doberu Chipfu iche ntanụ-a; noo kẹle unu tsoru unwu unu; mẹ unwune unu ọgu. Teme ọ gowaru onu-oma nụ unu ntanụ-a.”

³⁰ Ọ -rwua nchitabọhu iya; Mósisu sụ ndu Ízurelu: “Unu mekwaru eze iphe-ẹji, parụ ẹka. Nta-a bẹ mu ejepfuwa Chipfu. ?A maru; mu a-dụ ike rwọ-buta iya g'ọ guaru unu nvụ l'iphe-ẹji ono, unu meru ono?”

³¹Ɔo ya bụ; Mósísu bya ejepfu Chipfu bya asụ: “Oowaa! Iphe-ẹji, ndu-a meru kwatakwa paa ẹka! Ẹphe gudewaa mkpòla-ododo metaru onwophe agwa. ³²Ɔle jiko gũaru phe rọ nvụ l'iphe-ẹji ono; teke ọ dudu hufukwa ẹpha mu l'ẹkwo, i deru ẹpha ndu nkengu.”

³³Chipfu sụ Mósísu: “Ɔo onye mesweru mu nụ bẹ mu e-hufu ẹpha iya l'ẹkwo mu. ³⁴Ngwa; tũgbua nta-a je edurwua ndu Ízurelụ ẹka mu pfuru opfu iya ono; lẹ Ojosi mu a-nọdu edu unu. Ɔle o -rwuepho teke mu a-nụ phe aphụ; mu anụa phe iya k'iphe-ẹji phe.”

³⁵Chipfu bya egude ejo iphe-ememe byapfuta ndu Ízurelụ; k'iphe ono, ẹphe gude nweswi ono, Eronu kpuru ono mee.

33 ¹Ɔo ya bụ; Chipfu sụ Mósísu: “Unu tũgbua l'ẹka-a; unu lẹ ndu ono, i dufutaru l'alị ndu l'jiputu ono! Tũgbua jeshia l'alị ono, mu kweru ukwe bya eriru nte yeru Ẹbirihamu; waa Áyizaku; waa Jiékọpụ sụ: ‘Mu a-nụ iya awa unu.’ ²Mu e-zi ojosi g'ọ duru unu je; je achishiaru unu ndu Kénanu; waa ndu Amọru; waa ndu Hetu; waa ndu Pérezu; waa ndu Hevu; waa ndu Jiebusu. ³Unu tũgbua jeshia l'alị ono, bụ ali, mini ẹra-eswi; waa manụ-ẹnwu asọ gborogboro. Ɔle mu te etsoduru unu; noo kele unu bụnukaru ndu ejo-ọkpoma; kele ọ -bũru gẹ mu tsoru unu bẹ o nwekwaru g'ọo-dụ; mu emebyishia unu l'uzo.”

⁴Ndu Ízurelụ nũmaepho njo-nzi ono; ẹphe waa ẹkwa; ophu ọ dudu onye kwaru onwiya akwa. ⁵Noo kele Chipfu sũru Mósísu: “Pfuaru ndu Ízurelụ l'ẹphe bụnukaru ndu ejo-ọkpoma. Mbụ l'ọ -bũru gẹ mu tsoru unu hata mẹ ntụ-ọkpa lanu bẹ o nwekwaru g'ọo-dụ; mu emebyishia unu. Ngwa; unu kwashia onwunu akwa, unu kwaru gẹ mu chia idzù iphe, mu e-me unu.” ⁶Noo ya; ndu Ízurelụ woru akwa phe kwashia l'úbvú Horebu.

Mkpù-ẹkwà Ndzuko

⁷Mósísu shi aphutaje ọlo-ẹkwa je akpọbe ụzenya l'azụ ẹka ndu Ízurelụ kpọbechaaru ọlo-ẹkwa nkephe; kua ya “ọlo-ẹkwa-ndzuko.” Iphe, bụ onye eje akpata ishi l'iphu Chipfu nọdu ejeje l'ọlo-ẹkwa-ndzuko ono, nọ l'azụ ẹka ndu Ízurelụ nọ ono. ⁸Ɔ nọdu abujeru; Mósísu -gbalihu jeshia l'ọlo-ẹkwa-ndzuko ono; ndu Ízurelụ gẹphe ha awulihu je apfugbaaru l'ọnu-abata ọlo-ẹkwa nkephe elekpọepho Mósísu ẹnya; gbiriri jasụ l'ọobahu l'ọlo-ẹkwa-ndzuko ono. ⁹Ɔ nọdu abujeru; Mósísu -bahuchaepho l'ọlo-ẹkwa ono; urwukpu ono, kpuru oronmono ono alwazeta bya anọ-chia ọnu-abata teke Chipfu epfu anụ Mósísu. ¹⁰Ndu Ízurelụ hũmaepho urwukpu ono, kpuru oronmono ono g'ọ nọ l'ọnu-abata ọlo-ẹkwa ono; ẹphe atũko gbeshi baaru Chipfu eja. Onyenonu nọdu anọduje l'ọnu-abata ọlo-ẹkwa nkiya baaru Chipfu eja ono. ¹¹Chipfu nọdu epfuje eyeru Mósísu l'iphu l'iphu gẹ nemadzụ yee ọnyà iya anọduje abọ ụja-a. Teke e mechaaru; Mósísu alwaphuta azụ l'ẹka ndu Ízurelụ nọ; ophu nwokoro-bya ono, bụ onye n-yemeka iya ono, bụ Jioshuwa nwa Nunu alufujedu alufu l'ọlo-ẹkwa ono.

Mósisu yee ogbunw̄inwii Chipfu

¹²Mósisu s̄u Chipfu: “I shiepho teke-a pfutaru mu ge mu dua ndu-a; oḷe i tiki mekp̄oḷaa ge mu maru onye ii-yeru mu ge mu l'iya sw̄iru. I s̄uru l'i maru epha mu; teme mu d̄u ngu l'obu. ¹³O -b̄uru ph̄o ḷe mu d̄u ngu l'obu k'eviya; goshinu mu ẁo ngu; k'ophu mu a-maru ngu; teme mu ad̄u ngu l'obu kwas̄eru. Nyatakwa l'oha-a b̄u ndu nkengu.”

¹⁴Chipfu s̄u iya: “Mu e-tsoru-a unu l'onwomu; teme mu emee ge meji nmapfuru ngu.”

¹⁵No iya; Mósisu s̄u iya: “O -b̄uru l'i tii tsoduru anyi l'onwongu; te emekwa g'anyi hata okpa ahata t̄ugbua l'eka-a! ¹⁶?D̄enu g'ee-shi maru ḷe mb̄eḷua; waa ndu nkengu d̄u ngu l'obu; ab̄udu l'i tso anyi? ?B̄u ḡunu ozo e-goshi ḷe mb̄eḷua waa ndu nkengu d̄u iche l'eka ndu mgboko l'ophu n̄o?”

¹⁷Oo ya b̄u; Chipfu s̄u Mósisu: “Mu e-meepho iphe ono, i s̄uru ge mu meeru ngu ono. Noo keḷe i d̄u mu l'obu; teme mu maru epha ngu.”

¹⁸Mósisu s̄u iya: “Jiko goshinu mu ogbunw̄inwii ngu.”

¹⁹T̄obudu iya b̄u; Chipfu s̄u iya: “Mu e-me g'i h̄uma ge mu d̄u-be ree; teme mu an̄odu l'atatiḷu ngu kua onwomu iphe, mu aza. Onye o d̄u mu ge mu meeru eze-iphe-oma; mu emeeru iya ya; onye o d̄u mu ge mu ph̄aru obu-imemini; mu aph̄aru iya ya. ²⁰Oḷe i t̄i h̄umadu iphu mu; noo keḷe o to nwed̄u onye gude eḷya iya h̄uma mu, a-n̄odu ndz̄u.”

²¹Chipfu s̄u: “O nweru eka n̄o-kube mu n̄u, īi-pf̄uru ḷe mkpuma. ²²Teke ogbunw̄inwii mu ghataj̄erupho; mu eworu ngu doḷe ḷe mgbaka agbara-mkpuma; bya egude eka mu gbobuta ngu; gbiriri jas̄u mu aghata-gbua. ²³Mu agb̄e teke ono wofu eka; l'i h̄uma mu okpurukpu. O -b̄uru iphu mu b̄e a taa h̄umajekwa ah̄uma.”

Bach̄ibachi mkpuma k'eb̄o

34 ¹Chipfu s̄u Mósisu: “Je awata bach̄ibachi mkpuma lab̄o ozo, a-d̄u ge ke mb̄u ph̄o. Ge mu dekwaa ya iphe, shi n̄odu ḷe ke mb̄u ph̄o, i t̄ukporu ph̄o. ²Kwak̄obe l'utsu echele; nyikota úbv̄u Saȳinayi; bya ego-shi mu onwongu l'eli úbv̄u ono. ³G'o to nwekwa onye e-tsoru ngu n̄u; ozo onye aa-h̄uma l'úbv̄u ono l'ophu l'ophu; g'o to nwekwa at̄uru; ozo eswi, a-n̄odu ata nri l'atatiḷu úbv̄u ono.”

⁴Noo ya; Mósisu mee ge Chipfu ziru iya; bya awata bach̄ibachi mkpuma lab̄o ozo, dukwa ph̄o ge ke mb̄u ph̄o; bya egude nyihu úbv̄u Saȳinayi l'onmewa utsu. O par̄u bach̄ibachi mkpuma lab̄o ono l'eka. ⁵Noo ya; Chipfu bya an̄odu l'urwukpu nyizeta; bya araa ya arara l'epha iya b̄u Chipfu. ⁶O bya aghata l'atatiḷu Mósisu etushi onwiya epha s̄u: “Oo mu b̄u Chipfu; oo mu b̄u Chipfu; bya ab̄uru Chileke k'obu-imemini; bya ab̄ukwarupho Chileke k'eze-iphe-oma. Onye ehu ete eghuj̄edu eḡu egwegwa; onye n-yemobu iya; waa apf̄ushi ike iya par̄u eka. ⁷Unubuku unwu-eliphe

bẹ mu anọduje egoshi lẹ mu yeru obu. Mu agujeru phe nvu l'ejo-iphe, epe meru; me l'atupya, epe tupyaru mu; waa l'iphe-eji, epe meru mu. Ode mu ta ahajekwanu onye-ikpe nmaru ge mu ta ahụ iya ahụhù. Ndu ejo-iphe bẹ mu ahùje ahùhù k'ejo-iphe, epe meru mu; hu-rwua ya l'eka unwu nwanwa phe no; waa l'eka nwanwanwanwanwa phe no; hu-rwua phe l'ogbo k'eno."

⁸Mosisu bya ephoze iphu l'alì teke ono teke ono bya abaarù Chipfu eja. ⁹O su: "Gube Chipfu; o -buru lẹ mu du ngu l'obu eviya; jiko ge gube Chipfu tsonuru anyi. A makwaru-a lẹ ndu-a bunukaru ndu ejo-okpoma; ode jiko gunaru anyi nvu l'ejo-iphe; waa iphe-eji anyi; wotarọ anyi g'anyi buru okiphe ngu."

¹⁰Tobudu iya bu; Chipfu su: "Anyi lẹ ngu a-gba ndzu. Latatiphu ndu nkengu l'ophu bẹ mu e-me oke iphe, du biribiri, mu teke emeswe l'ohamo-ha, no lẹ mgboko l'ophu. Ndu ono, unu bu l'echilabo phe ono a-humakota g'iphe, mube Chipfu e-mekota du-be ebvu. ¹¹Unu ngabe nchi mee eke-mu-a, mu aturu unu ntanu-a. Mu a-chifuru unu ndu Amoru; waa ndu Kenu; waa ndu Hetu; waa ndu Perezu; waa ndu Hevu; teme waa ndu Jibusu. ¹²Ode g'unu kwabe enya g'unu lẹ ndu bu l'alì ono, unu ala ono ta agba ndzu; odumeka bẹ epe e-mechakwaa buru onya nmata unu. ¹³Unu gbukposhia oru-ngweja phe; teme unu etsukposhia mkpuma, epe doberu nso. Teme unu aphokashikwapho itso, e doberu agwa phe, bu Ashera. ¹⁴Unu ta adukwa iphe ozo, unu a-bajeru eja gbahaa mube Chipfu kpurumu. Noo kele mube Chipfu, epha iya bu Okophoo bẹ bukwa Chileke, ekoje okophoo.

¹⁵"Unu kwabekwa enya g'o to dushi ndu bu l'alì ono, unu l'ephe a-gba ndzu. Noo kele epe -nodu agwa agwa phe ono; bẹ epe e-zi unu lẹ nri; unu eje eria iphe, epe gude gwaa iphe ono. ¹⁶O -buru l'unu haru unwada phe lutaru unwu unu g'ephe buru unyomu phe; ndu ono nodu agwa agwa phe ono bẹ epe e-dukwarupho unwu unu; epe eje emee nno.

¹⁷"Unu ta akpukwa ntẹkpe!

¹⁸"Unu boje obo-iphe buredi, ekoduru ekoko. Ujiku esaa bẹ unu a-taje buredi, e yeduru iphe, ekoje buredi egube ono, mu suru g'unu meje iya. Unu boje obo-iphe ono teke ono, e doberu iya ono l'onwa Abibu; noo kele o l'onwa ono bẹ unu shi l'alì ndu Ijiputu wufuta.

¹⁹"Iphe-mbu, vuru uzo waa eka ne iya bu ke mube Chipfu. Iphe, bu nwa mbu iphe-edobe unu nwuru, bu oke ya yichakwaa ya; mo bu eswi; ozoo aturu; ozoo egbu. ²⁰Unu gudeje nwaturu gbata nkapfu-igara, bu ke mbu l'epho ne iya. Obenu lo -buru l'unu ta agbataduru iya agbata; unu aswikwoo ya olu.

"Go to nwekwaru onye a-gbajeru eka bya l'atatiphu mu.

²¹"Ujiku ishii bẹ unu e-jeje ozi unu; o -rwua mboku k'esaa; unu edzua ike. Unu te ejejekwa ozi lẹ mboku k'esaa; m'obeta o buru aako okoro; ozoo teke aakpata iphe, e meberu l'egu.

22 “Witi-mbù, unu vuru ọ̀zo kpata bẹ unu e-gudeje bọ Ọ̀bo-Idzu. Unu abọ ọ̀bo-iphe, a kpatarù l'opfu lẹ mbvùcha apha.

23 “Ugbo ẹ̀to l'apha bẹ unwoke unu g'ẹ̀phe ha a-kpakoje bya l'atatiphu Nnajiuphu, bụ Chipfu. 24 Mu a-chìshiru unu ọ̀hamoha; bya emee g'alì unu kabaa shii. Ophu ọ̀ dudu onye bya eme g'ọ̀ nata unu alì unu ono; mẹ unu jeje l'iphu Chipfu, bụ Chileke unu; mbù ophu unu ejeje ugbo ẹ̀to l'apha.

25 “Unu ta adùkwa iphe e yekọberu iphe ekoje buredi, unu e-yekọbe lẹ mee anù, unu gude egweru mu ngweja.

“Tẹme ophu ọ̀ dùkwa anù ngweja ono, e gude abọ ọ̀bo Ojeghata, aa-ha g'ọ̀ bọ nchi.

26 “Iphe-mbù, vuru ọ̀zo kaa l'opfu unu bẹ unu e-gudeje bya l'ulo Chipfu, bụ Chileke unu.

“Unu te egudejekwa mini-ẹ̀ra ne egbu shia nwa iya.”

27 Noo ya; Chipfu sù Mòsisu: “Dekọta opfu ono g'ọ̀ ha l'ẹ̀kwo. Noo kele ọ̀ opfu ono bẹ mu lẹ gùbedua; mẹ ndu Ízurelu gude gbaa ndzù.” 28 Mòsisu bẹ yẹ Chipfu nọru l'ẹ̀ka ono ọ̀kporo abalì labọ; eswe l'enyashi; ophu o riduru nri; ẹ̀be ọ̀ ngùtaduru mẹ mini. Ọ̀ bya edee opfu oghandzu ono, bụ iya bụ ekemu iri ono, shi l'ẹ̀ka Chileke ono l'eli bachìbachi mkpuma ono.

Iphe Mòsisu egbu nwìnwii

29 Mòsisu shiẹ̀pho l'úbvù Sayìnayi nyizeta; yẹ bachìbachi mkpuma labọ ono, e deru ekemu Chipfu ono, o gude l'ẹ̀ka; ophu ọ̀ madù l'iphu egbu iya nwìnwii; noo kele ẹ̀phe lẹ Chipfu bọgbaberu ọ̀ja. 30 Erọnu; yẹ ndu Ízurelu g'ẹ̀phe ha hùma Mòsisu g'iphu egbu iya nwìnwii; ndzù ejekube iya ntse gùahaa pẹ. 31 Mòsisu bya ekua pẹ; ọ̀ ya bụ; Erọnu; yẹ ndu-ishi ọ̀ha ono g'ẹ̀phe ha gbẹ teke ono bya ejekube iya ntse; ọ̀ bya epfuru yeru pẹ. 32 E mechaa; ndu Ízurelu g'ẹ̀phe ha byakube iya ntse; ọ̀ bya atùshikotaru pẹ ekemu, Chipfu nọru iya l'úbvù Sayìnayi.

33 Mòsisu pfughechaaru pẹ opfu bya aphù-chia ẹ̀kwa l'atatiphu. 34 Ọ̀ nọdu abùjeru; teke Mòsisu bahuru l'ulo-ẹ̀kwa l'atatiphu Chipfu gẹ yẹle iya bọgba; l'ọ̀ phùfu ẹ̀kwa ono l'atatiphu iya gbiriri jasù l'ọ̀ futa. Ọ̀ fùtaephò l'ọ̀bya epfukotaru ndu Ízurelu iphe, e ziru iya; 35 ẹ̀phe ahùma l'iphu egbu iya kẹ nwìnwii. Ọ̀ ya bụ; Mòsisu abya ewota ẹ̀kwa phù-chia iphu ọ̀zo gbiriri jasù o jeshia gẹ yẹle Chipfu bọgbabe.

Eswe-atùta-unme

35 1 Mòsisu bya ekukọbe ndu Ízurelu g'ẹ̀phe ha; sù pẹ: “Wakwa iphe, Chipfu sùru g'unu mee bụ ọ̀wa-a; 2 Ọ̀ sùru l'ọ̀o ujiku ishii bẹ unu e-jeje ozi unu; o -be lẹ mbọku k'ẹ̀saa; unu edobe iya nsọ; g'ọ̀ bọru eswe-atùta-unme kẹ Chipfu. Ọ̀ dọru onye jeru ozi mbọku ono; g'e gbu-kwaa onye ọ̀bu egbugbu. 3 G'ọ̀ tọ dùkwa onye a-phù-nwu ọ̀ku l'ibe iya l'eswe-atùta-unme.”

Iphe, ee-gude mee ọ̀lo-ẹ̀kwa
(Awu 25:1-7; 35:10-19)

⁴Mósisu sù ndu Ízurèlu g'ẹ̀phe ha: “Wakwa iphe, Chipfu sùru g'e mee bụ ọ̀wa-a: ⁵Unu shi l'iphe, unu nweru hata iphe bya anụ yẹbe Chipfu. Onye oohe ihee g'ọ nù yẹbe Chipfu iphe bẹ iphe, oo-gude bya anụ iya bụ mkpọ̀la-ododo; waa mkpọ̀la-ọ̀chaa; waa onyirubvu; ⁶waa owu urwukpu-urwukpu; waa ọ̀phu eke mee-mee; waa ọ̀phu dụ uswe-uswe; waa owu ọ̀chaa; waa eji eghu; ⁷waa akpọ ebili, a tseru l'uswe; waa akpọ umoro-ẹ̀nyimu; waa oshi akesha; ⁸waa manụ olivu, ee-gudeje anwụ ọ̀ku; waa iphe, eeyeje lẹ manụ k'awu l'ishi g'ọ shia mkpọ; mẹ ọ̀phu eeyeje l'ụ̀nwù-isensu g'ọ shia kwẹekweekwee; ⁹waa mkpuma ónikùsù; mẹwaro mkpuma ọ̀zo, aswa dughbaa. Mkpuma ono bẹ ee-mechaa gbapya bẹ l'uwe-ukuvu onye-ishi ndu-uke; yẹle uwe-ọ̀kpoma iya.

¹⁰“G'iphe, bukpuo ndu maru eme ọ̀na l'echilabọ unu futa bya emekota iphemiphe, Chipfu turu ọ̀nu g'e mee-a; ¹¹mbụ ọ̀lo-ẹ̀kwa ono; waa ẹ̀kwa, aa-phushi l'eli ọ̀lo-ẹ̀kwa ono; waa iphe iya ono, nweru nkoloba ishi labọ ono; waa mgbo ono, ee-gude kụ-chite ọ̀lo-ẹ̀kwa ono; waa oshi ono, ee-gudegbaa swebushia lẹ mgbo ono; waa itso iya ono; waa ẹ̀nya ẹ̀ka aa-kpọgbaaru iya ye; mbụ itso ono; yẹ ọ̀kpa mgbo ono; ¹²waa okpoko ono; yẹ mgboro ono, ee-gudeje apa iya ono; waa opfu okpoko ono, aa-nọduje apfụ ụ̀gwo iphe-eji ono; waa ẹ̀kwa ono, ee-gude kochite iya; ¹³waa teburu ono; yẹ mgboro ono, ee-gudeje apa iya ono; yẹ ngwa iya; yẹ buredi ono, ee-dobeje l'iphu Chipfu ono; ¹⁴waa iphe ono, aapfubeje orọku ono, e-meje g'ìphóró dụ; yẹ ngwa iya; waa orọku iya ono; mẹ manụ ono, ee-gudeje anwụ ọ̀ku ono; ¹⁵waa ọ̀ru-ngweja-ụ̀nwù-isensu ono; yẹ mgboro ono, ee-gudeje apa iya ono; waa manụ ono, aa-wu l'ishi ono; yẹ ụ̀nwù-isensu ono, eshi mkpọ ono; waa ẹ̀kwa ono, ee-kochite ọ̀nu-abata ọ̀lo-ẹ̀kwa ono; ¹⁶waa ọ̀ru-ngweja ono, bụ ẹ̀ka ee-gweje ngweja-akpọ-ọ̀ku ono; yẹ iphe iya ono, dụ g'ụ̀gbu, ee-gude onyirubvu mee ono; waa mgboro ono, ee-gudeje apa ọ̀ru-ngweja ono; yẹ ngwa iya g'ọ ha; yẹkwapho eze gbamughbamu ono, ee-gude onyirubvu mee ono; yẹ ọ̀kpa iya; ¹⁷waa ẹ̀kwa ono, ee-gude gebuta ọ̀ma-unuphu ọ̀lo-ẹ̀kwa ono; waa itso ọ̀ma-unuphu ono; yẹ ẹ̀nya ẹ̀ka aa-kpọbegba itso ono; waa ẹ̀kwa ono, ee-gude gechite ọ̀nu-abata ọ̀ma-unuphu ono; ¹⁸waa nggu ọ̀lo-ẹ̀kwa ono; yẹ k'ọ̀ma-unuphu iya; mẹ eri iya; ¹⁹waa uwe ono, e kweru ekwekwe, ee-yeje gude eje ozi l'ọ̀lo-nsọ ono; mbụ uwe, e doberu nsọ kẹ Erọnu, bụ onye uke; yẹ k'ụ̀nwu iya, ẹ̀phe e-yeje gude eje ozi gẹ ndu-uke.”

²⁰Ndu Ízurèlu wukahu l'atatiphu Mósisu. ²¹Iphe, bukpuo onye oohe ihee; waa onye o rwuru l'ẹ̀hu g'ọ nù Chipfu iphe; gudegbaa iphe bya anụ iya; mbụ iphe, ee-gude mee ọ̀lo-ẹ̀kwa-ndzuko; mẹwaro iphe, ee-gude eje ozi l'ime iya; mẹkwapho ọ̀phu ee-gude kwee uwe, dụ nsọ. ²²Iphe, bukpuo

onye oohe ihee; unwoke mę unwanyi; gudegbaa iphe, e gude mkpola-ododo mee bya anu; mbu iphe, dugbaa ge ngga agbabe; me eregede-nchi; me iphe-eka; mewaro iphe ozo, dugbaa egube ono. Epehe gudegbaa mkpola-ododo phe ono bya anu Chipfu go buru ngweja-amama. ²³Ndu nweru owu wotagbaakwaru iya pho; mbu owu, du urwukpu-urwukpu; ozoo ophu eke mee-mee; ozoo ophu du uswe-uswe; ozoo owu ocha; ozoo eji eghu; ozoo akpo ebili, a tseru l'uswe; ozoo k'umoro-enyimu.

²⁴Ndu du ike nu mkpola-ochaa; ozoo onyirubvu; nukwaru iya pho Chipfu. Ndu nweru oshi akesha, nweru eka ee-gude iya jee ozi ono nukwa iya pho. ²⁵Iphe, bukpoow nwanyi, maru eme ona gbaa owu bya anu. O duru ndu bu owu urwukpu-urwukpu be epehe gbaru; ndu bu owu, eke mee-mee; duru ndu bu owu uswe-uswe; ndu aburu owu ocha be epehe gbaru gude bya. ²⁶Unwanyi, oohe ihee; teme epehe je adu ike mekota iya; bu eji eghu be epehe gude gbaa owu nkephe. ²⁷Ndu-ishi wotagbaaru mkpuma onikusu; mewaro mkpuma ozo, aswa dugbaa; ga gbapyabe l'uwe-ukuvu onye-ishi-uke; yele uwe-okpoma iya. ²⁸Epehe nufukwapho iphe, eshi mkpo; waa manu olivu, ee-gudeje anwu oku; waa k'ophu ee-yeje le manu awu l'ishi; waa k'unwu-isensu, eshi mkpo. ²⁹Ndu Izurelu l'ophu; unwoke me unwanyi; mbu ndu oohe ihee wotaru Chipfu iphe, epehe turu obu phe onyo nu g'e gude meeru Chipfu iphe ono, o shi lonu Mosisu pfua su g'e meeru iya ono.

³⁰Noo ya; Mosisu su ndu Izurelu: "Unu maru le Chipfu hotawaru Bezalelu nwa Uri, bu nwanwa Huru, onye okpa-ipfu Jiuda; ³¹bya emewaa; unme yebe Chileke ji iya ehu; g'o nweru mmamiphe; yee nkwaanya; g'iphe doje iya enya ree; k'ophu o-makotaru g'eemema iphemiphe emema; ³²go maru g'eemeje iphe-erengete le mkpola-ododo; yee mkpola-ochaa; waa onyirubvu; ³³makwarupho g'aawa mkpuma, aswa du; waa g'aawuje mkpola-ododo l'igburonu iya; bya amakwarupho g'aapyije iphe apyipyi; mewaro g'eeshije eme ona ozo, dugbaa iche iche. ³⁴Teme o nukwapho yee Oholiyabu nwa Ahisamaku, onye okpa-ipfu Danu mmamiphe g'ephe zia ndu ozo g'eeme ona obu. ³⁵O mekwaru ge mmamiphe k'eme iphe-erengete ji phe ehu; mbu g'ephe maru eme ona; waa g'ephe maru g'eegudeje owu urwukpu-urwukpu; yee ophu eke mee-mee; waa k'uswe-uswe; waa owu ocha dengashia iphe edengashi. Ephenobo bu ndu tukoru makotaru g'eemeje iphe ona go maa mma.

36 ¹"Oo ya bu; Bezalelu; yee Oholiyabu; waa iphe, bukpoow ndu maru iphe, Chipfu nuru mmamiphe; yee iphe edo enya g'ephe maru g'eeme iphemiphe, laru le k'akpu ulo-nsu ono bukewapho g'ephe mee ya ge Chipfu pfuru su g'e meeru iya ya."

²Tobudu iya bu; Mosisu kua Bezalelu; yee Oholiyabu; waa iphe, bukpoow onye maru iphe, Chipfu nuru mmamiphe; o nodu ehakwa iya pho ihee go jee ozi ono. ³Mosisu chiru iphe, ndu Izurelu tutaru g'e gude kpua

ulo-nsọ ono nū p̄hẹ. Ndu Ízurelu nọdu atukokpoep̄ho iphe ono l'utsu mbọku anwuta anwuta g'ẹp̄he atụ iya. ⁴Ndu maru eme ọna, akpụ ụlo-nsọ ono tuko g'ẹp̄he ha parụ iphe, ẹp̄he eme haa; ⁵tuḡbua je asụ Mosisu: “Ndu-a tutaakwaru iphe, s̄uru egude mee iphe, Chipfu s̄uru g'e mee; atụwa k'etsutsu iya eye iya.”

⁶Mosisu t̄a ekemu s̄u: “G'ọ tọ dukwa nwoke; ọzoo nwanyi, a-kpataba iphe akpakpa bya anụ s̄u l'ọo iphe, o gude eyeta ẹka k'ulo-nsọ ono.” E woru iphe ono, Mosisu pfuru ono pfudzuru l'ulo-ekwa ndu Ízurelu l'ophu. E shi nno kp̄oshia ndu Ízurelu g'ọ tọ duhe iphe, ẹp̄he e-wotaba; ⁷noo kele iphe, a tutaawaru g'e gude jee ozi ụlo ono s̄uwaru g'ee-gude iya jee ozi ono; l'o tsufu etsufu.

Mkp̄ù-ékwa ono

(Awu 26:1-14)

⁸Iphe, b̄u ndu ophu maru iphe lẹ ndu-oz̄i ono gude owu ọchaa, a sw̄iru ụdo; waa ophu d̄u urwukpu-urwukpu; waa ophu d̄u uswe-uswe; yee ophu eke mee-mee; kwee ẹkwa kweta iya upfu ẹkwa iri. Onye maru eme ọna gude owu ono kwee chierobu ye l'upfu ẹkwa ono. ⁹Upfu ẹkwa ono tuko-kwa haru ẹn̄ya nhamun̄ha. Ogologo iya d̄u nkwo-ẹka ụkporo l'esato; ọsa iya d̄u nkwo-ẹka ẹno. ¹⁰Ẹp̄he wotaru upfu ẹkwa ono ise gbagbabe; ọ buru nlochiru lanu; bya ewotakwapho ụzo ise ophuu gbagbabe nanu. ¹¹Ishimishi-ophoko-ekwa ono ke mbu be ẹp̄he gude owu, d̄u urwukpu-urwukpu yeshia ya nkoloba l'igburonu iya. Ẹp̄he bya emekwapho nno l'ishimishi-ophoko-ekwo ono k'ẹbo. ¹²Nkoloba ụkporo labo l'iri be ẹp̄he yeru l'ishishi nlochiru lanu; ẹp̄he yekwapho nkoloba ụkporo labo l'iri l'ishishi nlochiru lanu ophuu. Nkoloba ono tuko ghagbabe iphu. ¹³Ẹp̄he gude mkpola-ododo meta iphe, kweru nko ishi labo ụzo ụkporo labo l'iri; gude iya dzegbabe nlochiru ẹkwa ono ẹphenebo; ọ tuko buru nanu.

¹⁴Ẹp̄he bya egude eji eḡhu kwee ẹkwa; kweta iya upfu ẹkwa iri lẹ nanu, ee-gude ph̄u-chite eli ulo-ekwa ono. ¹⁵Upfu ẹkwa ono ẹp̄he n'iri lẹ nanu tuko haru ẹn̄ya nhamun̄ha. Ogologo iya d̄u nkwo-ẹka ụkporo l'iri. Osa iya d̄u nkwo-ẹka ẹno. ¹⁶Ẹp̄he bya achita upfu ẹkwa ono ise gbagbabe; ọ buru nlochiru lanu; chita ụzo upfu ẹkwa ishii ophuu gbagbabe kwapho nanu. ¹⁷Nkoloba ụkporo labo l'iri be ẹp̄he yeru l'ishishi nlochiru lanu; yekwapho nkoloba ụkporo labo l'iri l'ishishi nlochiru lanu ophuu. ¹⁸Ẹp̄he gude onyirubvu meta iphe, kweru nko ishi labo ụzo ụkporo labo l'iri; gude iya kotagbaa nkoloba nlochiru ẹkwa ono ẹphenebo; gude iya dzegbabe ulo-ekwa ono; ọ buru nanu. ¹⁹E mechaa; ẹp̄he gude akpo ebili, a tseru l'uswe; mee iphe, ee-gude ph̄u-chia eli ulo-ekwa ono ọzo; bya egudekwapho akpo umoro-enyimu mee iphe, ee-gude kwechite eli akpo k'ebili ono.

²⁰Ẹp̄he gude oshi akesha meta oshi, ee-gudeje kpobe ulo-ekwa ono. ²¹Oshi ono be e mekotaru; ọ duḡbaa nkwo-ẹka iri l'eli. Osa iya duḡbaa nkwo-ẹka lẹ

mkipirikpu iya. ²²Oshi ono bẹ ephẹ pyitachaa ru okpa labọ ye l'ibekẹboebo. O buru egube ono bẹ ephẹ mekotaru oshi ọlo-ekwa ono g'ọ ha. ²³A bya l'ulo-ekwa ono ibiya ophu gharu iphu l'uzo ndohali; bu ukporo oshi bẹ ephẹ rutaru yegbaa ya. ²⁴Ephẹ gude mkpola-ochaa meshia enya eka aa-kpogbaaru okpa oshi ono ye; meta iya uzo ukporo labo. Iphe, bu oshi ono g'ọ ha nweru enya eka labo, aa-kpojeru okpa iya ye. ²⁵A bya l'ibe iya ophuu; mbu ibiya ophu gharu iphu l'uzo isheli; bukwapho ukporo oshi bẹ ephẹ rutaru; yeshia ya. ²⁶Ephẹ gude mkpola-ochaa meshia enya eka aa-kpogbaaru okpa oshi ono ye; meta iya uzo ukporo labo. Iphe, bu oshi ono g'ọ ha nweru enya eka labo, aa-kpojeru okpa iya ye. ²⁷A bya l'okotazu ọlo-ekwa ono; mbu ibiya ophu gharu iphu l'uzo enyanwu-ariba bu oshi ishii bẹ ephẹ rutaru; yeshia ya; ²⁸bya emetacha oshi ebo ebo; yechaa le mgbureku mgbureku ọlo-ekwa ono l'uzo okotazu iya ono. ²⁹Oshi labo ono, ee-yechaa le mgbureku iya ono bẹ dugbaa nkwegba ebo ebo. O shi l'uzo ali du nkwegba ebo jasu l'imeli. Teme o buru echi lanu bẹ a kuberu iya. Ephenebo tuko dukota nno. ³⁰Oo ya bu lo du oshi esato lazọ ọlo-ekwa ono. E gude mkpola-ochaa meshia enya eka aa-kpogbaaru okpa oshi ono ye uzo iri l'ishii. Iphe, bu oshi ono g'ọ ha nwegbaaru enya eka labo, aa-kpojeru okpa iya ye.

³¹Ephẹ gude oshi akesha rwashia oshi, dugbaa gberere, ee-gude swebushia l'oshi ono. Uzo ise bẹ ephẹ sweberu l'oshi mgbureku ọlo-ekwa ono ibe lanu; ³²swebekwapho uzo ise ozo le mgbureku ibe iya ophuu. Uzo ise ozo buru k'okotazu ọlo-ekwa ono; ibiya ophu gharu iphu l'uzo enyanwu-ariba. ³³Oshi ophu ee-swebe l'echi iya bẹ ephẹ rwaru g'ọ gbẹ l'ishi lanu lufu l'ishi iya ophuu. ³⁴Ephẹ wukota mkpola-ododo l'oshi ono, eegudeje kpobe ọlo-ekwa ono; bya egudekwapho mkpola-ododo meshia echi, e-gudeshigbaa oshi ono, dugbaa gberere ono. Ephẹ bya awukwapho mkpola-ododo le gberere oshi ono.

³⁵Ephẹ gude owu, du urwukpu-urwukpu; waa ophu du uswe-uswe; waa ophu eke mee-mee; yee owu ochaa, a swiru udo; kwee ekwa. Onye maru eme ona bya egude owu ono kweshia chierobu ye lekwa ono. ³⁶Ephẹ gude oshi akesha rwa itso eno; bya awua ya mkpola-ododo; bya egudekwapho mkpola-ododo meshia iphe, kweru nko, ee-gude kobe ekwa ono litso ono. Ephẹ bya egude mkpola-ochaa kpushia enya eka aa-kpobe itso ono uzo eno. ³⁷Ephẹ gude owu, du urwukpu-urwukpu; waa ophu eke mee-mee; waa ophu du uswe-uswe; yee owu ochaa, a swiru udo; kwee ekwa, ee-gudeje kochite onu-abata ọlo-ekwa ono. O buru ndu gude ngga ekwe ekwa meru iya. ³⁸Ephẹ gude oshi akesha rwa itso ise; bya emekwapho iphe, kweru nko, ee-gude kobe ekwa ono litso ono. Ephẹ bya awua ishi itso ono; waa iphe, ee-swebe litso ono mkpola-ododo; bya egude onyirubvu kpushia enya eka aa-kpobegba itso ono ephẹ n'ise.

Okpoko ono

(Awu 25:10-22)

37 ¹Bezalelu gude oshi akesha kua okpoko. Ogologo iya du nkwo-eka labo le mkipirikpu iya. Osa iya du nkwo-eka lanu

lẹ mkpirikpu iya. Eli iya dukwapho nkwo-eka lanu lẹ mkpirikpu iya. ²Ọ wua okpobe mkpola-ododo l'ime iya; waa l'azu iya. O gudekwapho mkpola-ododo wu-phae mgbureku iya mgburugburu. ³Ọ kputa echi mkpola-ododo eno depfubegbaa l'okpa iya ephen'eno; mbu wota ebo depfube l'ibe lanu; wota ebo k'ophuu depfube l'ibe iya ophuu. ⁴O gude oshi akesha pyita mgboro labo; wua ya mkpola-ododo. ⁵O woru mgboro ono ephenebo pyochaa l'echi ono, e depfubegbaaru lẹ mgbureku okpoko ono g'o buru iphe, ee-gudeje apa iya.

⁶O gude okpobe mkpola-ododo meta opfu okpoko; eka aapfuje ugwo iphe-aji, nemadzu meru. Ogologo iya du nkwo-eka labo lẹ mkpirikpu iya. Osa iya du nkwo-eka lanu lẹ mkpirikpu iya. ⁷O gude mkpola-ododo mee chierobu labo, a-noduchaa l'ishi opfu okpoko ono. O buru mkpola-ododo, e tsusaru etsusa be o gude mee ya. ⁸O woru chierobu lanu dobe l'ishi ibe lanu; woru ophuu dobe l'ishi iya ophuu; bya emee; chierobu labo ono, nogbaa l'ishishi okpoko ono ephenebo yele okpoko ono buru iphe lanu. ⁹Cherubimu ono be o meru; o jashia nku l'uzo imeli; nku iya ono kpuchite opfu okpoko ono. Epe ghagbabe iphu; tuko ele enya l'eli okpoko ono kwapho.

Teburu ono (Awu 25:23-30)

¹⁰Epe gude oshi akesha meta teburu. Ogologo iya du nkwo-eka labo. Osa iya du nkwo-eka lanu. Eli iya du nkwo-eka lanu lẹ mkpirikpu iya. ¹¹Epe wua ya okpobe mkpola-ododo; bya egudekwapho mkpola-ododo wu-phae eli iya mgburugburu. ¹²Epe wota werere oshi, osa iya ha g'obochi-eka wu-phae mgbureku iya mgburugburu; bya egudekwapho mkpola-ododo kpu-phae werere oshi ono. ¹³Epe kputa echi mkpola-ododo eno depfubegbaa lẹ mgbureku okpa teburu ono. ¹⁴Echi ono no-kubechaa werere oshi pho; k'ophu oo-dukwanu ike gudeshia mgboro, ee-gudeje apa teburu ono. ¹⁵Mgboro, ee-gudeje apa teburu ono bu oshi akesha be epe gude pyishia ya; bya awua ya mkpola-ododo. ¹⁶Epe gude okpobe mkpola-ododo meshia ngwa, aa-tu-kobeje l'eli teburu ono; mbu gbamugbamu; waa ite; waa okoro; me nkweka ee-gudeje gweeru Chipfu ngweja-mee.

Iphe, aapfubeje oroku (Awu 25:31-40)

¹⁷Epe gude okpobe mkpola-ododo, e tsusaru etsusa mee iphe, aapfubeje oroku. Epe meru iya; o nweru oshi; waa ekali. O bya enweru ochi; nweru nkwo iya; nweru iphe, du ge nwopu okoko; waa iphe, du g'okoko, jawaru ajaja. Epe tuko iphemiphe ono mee ge yele iphe ono, aapfubeje oroku ono dzepfua buru nanu. ¹⁸Oshi iya ono nweru ekali ishii. Ekali

eto nòdu lẹ mgburẹku iya lanu; eto k'ophuu nòdu lẹ mgburẹku iya ophuu. ¹⁹Ekali iya lanu nweru okoro eto. Okoro ono be e mechaaru; o dugbaa g'okoko oshi alumundu. E mekwaapho nwopu okoko ye iya; yee okoko ophu jawaru ajaja. Noo g'o dukota l'ekali iya ono ephe n'ishii, dzepfugbaaru l'oshi iya ono. ²⁰Oshi iya ono nweru okoro eno, e meru; o du g'okoko oshi alumundu. O nwekwarupho iphe, e meru; o du ge nwopu okoko; yee iphe, du g'okoko ophu jawaru ajaja. ²¹Nwopu okoko lanu be e meru; o nòdu lẹ mkpula ekali iya labo ono, no l'uzo ali iya. K'ebò nòdu lẹ mkpula ekali iya labo k'echi. K'eto nòdu lẹ mkpula ekali iya labo k'uzo eli. Mbù l'ò nochaa lẹ mkpula ekali iya ono ephe n'ishii. ²²Nwopu okoko iya ono; yee ekali iya ekali iya ono be e meru; yele oshi iya tuko dzepfuru. O buru okpobe mkpola-ododo, e tsusaru etsusa be e gude mee ya.

²³Ephe gudekwapho okpobe mkpola-ododo meta oroku esaa, aa-pfubegbaa l'eli iphe ono, aapfubeje oroku ono; bya emetakwapho akpa iya; waa iphe, aaguje oku iya. ²⁴Iphe, aapfubeje oroku ono; yee ngwa iya g'o hakota bu okpobe mkpola-ododo, erwa iya du talentu lanu be e gude mee ya.

Oru-ngweja unwu-isensu

(Awu 30:1-5)

²⁵Ephe gude oshi akesha kua oru-ngweja, bu eka aa-kpoje unwu-isensu oku. Ogologo iya waa osa iya tuko haru enya nhamunha. Iphe, o duchaa bu nkwo-eka lanu. Eli iya du nkwo-eka labo. Mpu iya; yee oru-ngweja ono tuko rwagbabe buru nanu. ²⁶Ephe wukota eli iya; yee mgburẹku iya; waa mpu iya okpobe mkpola-ododo. Ephe gudekwapho mkpola-ododo kpu-pee mgburẹku iya mgburugburu. ²⁷Ephe meta echi mkpola-ododo ebo ebo depfubegbaa lẹ mgburẹku iya ibekeboebo. Ephe depfuberu iya; o noduchaa lẹ mkpula iphe ono, a kpu-pheru iya mgburugburu ono. O buru l'echi ono be ee-yeje mgboro, ee-gudeje apa iya. ²⁸Ephe gude oshi akesha pyita mgboro ono; wua ya mkpola-ododo.

²⁹Ephe mekwaapho manu ono, du nso bya eshi mkpo, aawuje l'ishi ono; waa okpobe unwu-isensu ono, eshi mkpo ono. O buru ndu maru eme manu-mbeleke meru iya.

Oru-ngweja eka ee-gweje ngweja-akpo-oku

(Awu 27:1-8)

38 ¹Ephe gude oshi akesha kuta oru-ngweja. Eli iya du nkwo-eka eto. Ogologo iya waa osa iya tuko haru enya nhamunha. Iphe, o duchaa bu nkwo-eka ise ise. ²Ephe rutachaa mpu mobechea l'ishi ishi mgburẹku iya ephen'eno. Mpu ono; yee oru-ngweja ono rwagbaa buru nanu. Ephe mechaa ya nno; bya eworu onyirubvu wua ya. ³Ephe gude onyirubvu meshia iphemiphe, ee-gudeje eje ozi l'oru-ngweja ono, bu iya bu ite; waa iphe, eegudeje ekpo ntu; waa gbamugbamu; waa oji; me iphe, aaguje oku. ⁴Ephe

gude onyirubvu meta iphe, dū nggafu-nggafu g'ugbu; bya enweru mgbureku ẹno. Ẹphe woru iya kwechia ụzo alị mgbureku ọru-ngweja ono. A -gbẹ l'ụzo alị iya kwechia ya jasụ l'echilabọ iya. ⁵Ẹphe gudekwaphọ onyirubvu meta echi ẹno hebechaa lẹ mgbureku iphe ono, dū nggafu-nggafu g'ugbu ono, e meru l'onyirubvu ono; g'ọ bụru ẹnya ẹka ee-pyocha mgboro, ee-gudeje apa ọru-ngweja ono. ⁶Ẹphe gude oshi akeshia pyita mgboro labọ; wua ya onyirubvu; ⁷wochaaru mgboro ono nwua l'ẹnya echi phọ ibekẹboebo. Mgboro ono ẹphenebo a-nọdujehaa lẹ mgbureku iya ẹphenebo mẹ a -nọdu apa iya. Ẹphe gude iberibe oshi mee ọru-ngweja ono; ụzo dū iya l'echi.

Eze gbamugbamu ono

(Awu 30:17-21)

⁸Ẹphe gude onyirubvu mee eze gbamugbamu; yee ọkpa iya. Onyirubvu ono, ẹphe gude mee ya ono shi l'onyo unwanyi, anọduje eje ozi l'onu-abata ụlo-ẹkwa-ndzuko.

Ọma-unuphu

(Awu 27:9-19)

⁹Ẹphe bya emee ọma-unuphu. Ẹphe gude owu ọchaa, a swiru ụdo; kwee ẹkwa, dū ụkporo nkwo-ẹka ise l'ogologo; g'e gude gebuta ibiya ọphu ọma-unuphu ono gharu iphu l'ụzo ndohali. ¹⁰Ẹphe gude onyirubvu meta ụkporo itso, aa-kpọbe iya; yee ẹnya ẹka aa-kpọbechaa itso ono; bya egude mkpọla-ọchaa meshia iphe, kweru nko, ee-gude kobe ẹkwa ono l'itso ono; yee iphe, ee-swebe l'itso ono. ¹¹Ụzo isheli iya bukwapo ẹkwa, dū ụkporo nkwo-ẹka ise l'ogologo bẹ e kweru gude gebuta iya. Itso, aa-kpọbe l'ụzo isheli ono; yee ẹnya ẹka aa-kpọbe itso ono dūchaa ụkporo ụkporo. Ọ bukwarupho onyirubvu bẹ e gude metachaa ya. Ọ bukwanuru mkpọla-ọchaa bẹ e gude meshia iphe, kweru nko, ee-gude kobe ẹkwa ono l'itso ono; yee iphe, ee-swebe l'itso ono.

¹²A bya l'osa ọma-unuphu ono l'ụzo ẹnyanwu-arịba iya; bukwa ẹkwa, dū ụkporo nkwo-ẹka labọ lẹ nkwo-ẹka iri l'ogologo bẹ e kweru; gude gebuta iya. Ẹphe bya emeta itso iri, aa-kpọbe l'ụzo ẹnyanwu-arịba ono; metakwapo ẹnya ẹka aa-kpọbechaa itso ono ụzo iri. Ẹphe bya egude mkpọla-ọchaa meshia iphe, kweru nko, ee-gude kobe ẹkwa ono l'itso ono; yee iphe, ee-swebe l'itso ono. ¹³Ọsa ọma-unuphu ono l'ụzo ẹnyanwu-awawa iya dukwapo ụkporo nkwo-ẹka labọ lẹ nkwo-ẹka iri l'ogologo. ¹⁴Ẹphe bya ekwee ẹkwa, dū nkwo-ẹka iri l'ise l'ogologo g'e gude gebuta aguga onu-abata ọma-unuphu ono ibe lanu. Itso, aa-kpọbe iya; yee ẹnya ẹka aa-kpọbechaa itso ono dūchaa ẹto ẹto. ¹⁵A bya l'ẹka aguga onu-abata ọma-unuphu ono ibe iya ophuu; bukwapo ẹkwa, dū nkwo-ẹka iri l'ise l'ogologo bẹ ẹphe kweru g'e gude gebuta iya. Itso, aa-kpọbe iya; yee ẹnya ẹka aa-kpọbechaa itso ono dūchakwapo ẹto ẹto.

¹⁶Iphe, bu ẹkwa, ee-gude gebuta ọma-unuphu ono mgburugburu bukota owu ọchaa, a swiru ọdo be ẹphe gude kwee ya. ¹⁷Enya ẹka aa-kpọbechaa itso, ee-gude kpọ-buta ọma-unuphu ono mgburugburu bu onyirubvu be ẹphe gude meshia ya. Iphe, kweru nko, ee-gude kobe ẹkwa ono l'itso ono; yee iphe, ee-swebegbaa l'itso ono bukwanuru mkpọla-ọchaa be ẹphe gude meshia ya. Ishi itso ono be ẹphe wuru mkpọla-ọchaa. Iphe, ee-swebechaa l'itso ono, ee-gude kpọ-buta ọma-unuphu ono mgburugburu ono bu mkpọla-ọchaa be ẹphe gude meshia ya. ¹⁸Ẹphe gude owu, du urwukpu-urwukpu; waa ọphu eke mee-mee; waa k'uswe-uswe; yee owu ọchaa, a swiru ọdo; gude kwee ẹkwa, du nkwo-ẹka ọkporo l'ogologo; g'e gude gechite ọnu-abata ọma-unuphu ono. Ọ buru ndu gude ngga ekwe ẹkwa meru iya. ¹⁹Ẹphe gude onyirubvu metaru ọnu-abata iya ono itso ẹno; waa enya ẹka aa-kpọbechaa itso ẹno ono. Iphe, kweru nko, ee-gude kobe ẹkwa ono l'itso ono; waa iphe, ee-swebechaa l'itso ono be ẹphe mekotaru le mkpọla-ọchaa. Ẹphe wukotakwapho mkpọla-ọchaa l'eli itso ono. ²⁰Iphe, bu nggu, ee-libegbaa eri ọlo-ẹkwa ono; mekwapho k'ọma-unuphu ono be ẹphe gude onyirubvu mekota.

Iphe, e gude jee ozi ọbu.

²¹Ọwaa bu mkpakọ iphe, e gude mee ọlo-ẹkwa ọbu; mbu ọlo-ẹkwa Ekemu ono. Ọo Mosisu suru ge ndu oshilokpa Liviya dekota iphemiphe ono l'ekwo. Onye-ishi phe bu Itama nwa Eronu, bu onye uke. ²²Bezalelu nwa Uri, bu nwanwa Huru, bu oshilokpa Jiuda mekota iphemiphe ge Chipfu turu Mosisu ọnu g'e mee ya. ²³Onye ẹphe l'iya tuko mee ya bu Oholiyabu nwa Ahisamaku; oshilokpa Danu; bu onye maru eme ọna; yee ẹrengete; bya aburu onye maru g'eegudeje owu, du urwukpu-urwukpu; waa ọphu eke mee-mee; waa ọphu du uswe-uswe; waa owu ọchaa dengashia iphe edengashia. ²⁴Erwa mkpọla-ododo, a tutaru le ngweja-amama, a nuru g'e gude mee ọlo ono, du nsọ ono du ọkporo talentu le talentu tete; waa unu shekelu; l'ukporo shekelu iri l'ishii; le shekelu tete. G'ọ ha bukwa iphe, eegudeje atu erwa iphe l'eze-ọlo Chileke be e gude tua ya. ²⁵Erwa mkpọla-ọchaa, ndu Ịzurelu tutaru teke ono, a guru phe ọgu ono du ọkporo talentu ise; waa unu shekelu ẹno; l'ukporo shekelu esato; le shekelu iri l'ise. G'ọ ha bukwa iphe, eegudeje atu erwa iphe l'eze-ọlo Chileke be e gude tua ya.

²⁶Iphe, mkpọla-ọchaa ọbu gbaru phe l'ehu l'ehu bu mkpọla-ọchaa, erwa iya bu nkeru-ẹbo shekelu. G'ọ ha bukwa iphe, eegudeje atu erwa iphe l'eze-ọlo Chileke be e gude tua ya. Ndu a guru teke ono, a guru ndu Ịzurelu ọgu ono bu; a-gbe le ndu noru ọkporo apha kwaseru. Iphe, ẹphe du bu ọkporo unu nemadzu ugbo ọkporo ẹto l'iri l'ise; l'unu nemadzu esato; l'ukporo umadzu iri lesaa; l'umadzu iri. ²⁷Mkpọla-ọchaa ono, erwa iya du ọkporo talentu ise ono be e gude kpushigbaa enya ẹka aa-kpọbeba okpa mgbo ono, ee-gude ku-chite ọlo-ẹkwa

ono uto ukporo ise. Mkpola-ochaa, erwa iya du talentu lanu be eegudeje kpua enya iya lanu. ²⁸ Ephe gude unu shekelu mkpola-ochaa eno; l'ukporo shekelu esato; le shekelu iri l'ise kpushia iphe, nweru nkoloba, ee-gude kobe ekwa ono litso ono; bya egudekwa iya pho wukota l'ishi itso ono; bya egude iya mekwa-pho iphe, ee-swebegbaa litso ono. ²⁹ Ephe tutakwarupho onyirubvu, erwa iya du ukporo talentu eto le talentu iri; waa unu shekelu ishii le ngweja-amama ono. ³⁰ Ephe gude iya kpua enya aka aa-kpobegba itso k'onu-abata ulo-ekwandzuko ono; bya egudekwa iya pho kpua oru-ngweja ono, bu aka ee-gweje ngweja-akpo-oku ono; yee iphe ono, du gugbu ono; waa ngwa oru-ngweja ono go ha. ³¹ Ephe gudekwa iya pho kpua enya aka aa-kpobegba itso, ee-gude kpobuta oma-unuphu ono; wakwapho k'onu-abata iya; waa nggu, ee-libegbaa eri ulo-ekwa ono; mekwapho k'oma-unuphu iya.

Uwe ndu-uke

(Awu 28:1-14)

39 ¹ Ephe gude owu, du urwukpu-urwukpu; waa ophu eke mee-mee; yee ophu du uswe-uswe; kweeru ndu-uke uwe, ephe e-yeje gude eje ozi l'ulo-ekwa ono. Ephe kwekwarupho Eronu uwe, du nso, bu iya bu ge Chipfu suru Mosisu g'e mee ya.

Uwe ifodu

² Ephe gude owu mkpola-ododo; yee owu, du urwukpu-urwukpu; waa ophu eke mee-mee; waa ophu du uswe-uswe; waa owu ochaa, a swiru udo; kwee uwe-ukuvu. ³ Ephe woru mkpola-ododo tsusaa etsusa; mee ya; o du pheripheri; woru iya washia agwara; gude agwara ono tsokota le mgbaka owu urwukpu-urwukpu pho; yee ophu eke mee-mee; yee ophu du uswe-uswe; waa owu ochaa, a swiru udo pho. O buru onye maru eme ona meru iya. ⁴ Ephe woru werere ekwa labo libechaa l'uwe-ukuvu ono ibekeboebo; g'a nyaje iya l'ukuvu; g'e gudeje werere ekwa ono ephenebo lita k'atatiphu yee k'azu. ⁵ Ephe bya ekwekwapho werere ekwa, ee-gudeje tu-buta iya l'upfu ye iya. Werere ekwa ono be yee ifodu ono tuko buru iphe lanu. Iphe, e gude kwee ya bu owu mkpola-ododo; yee owu, du urwukpu-urwukpu; waa ophu eke mee-mee; yee k'uswe-uswe; yee owu ochaa, a swiru udo, bu iya bu ge Chipfu turu Mosisu onu g'e mee ya. ⁶ Mkpuma onikusu pho be ephe wuru mkpola-ododo l'igburonu iya. O buru egube ono, onye apyije mkpuma, vu oke aswa akashije epha le mkpuma; gude mee ya iphe-ohubama ono bu g'ephe kakotaru epha unwu Izurelu le mkpuma ono. ⁷ Ephe bya adzupya-be mkpuma labo ono leli uwe-ukuvu pho ephenebo; k'ophu Chipfu e-gudeje iya nyata unwu Izurelu, bu iya bu ge Chipfu turu Mosisu onu g'e mee ya.

Uwe-Okpoma

⁸ Ephe bya ekwee uwe-okpoma pho, ee-gudeje achu iphe, bu uche Chipfu pho. Ephe kweru iya; o du g'uwe-ukuvu pho, e kweru l'owu

mkpola-ododo; yee owu, du urwukpu-urwukpu; yee ophu eke mee-mee; waa k'uswe-uswe; waa owu ocha, a swiru udo. O buru onye maru eme ona meru iya. ⁹O nweru mgbureku eno; du nkwegba labo. Mgbureku iya ono ephen'eno tukokwa haru enya nhamunha. Ogologo iya du nkwo-eka lanu; osa iya dukwapho nkwo-eka lanu. ¹⁰Ephe bya adzuppyabe mkpuma, vu oke aswa l'ogiri l'ogiri uzo eno lekwa ono. Mkpuma, no l'ogiri iya ke mbu bu rubi; yee topazu; waa berilu. ¹¹Ogiri iya k'ebo; bu tokwasu; yee safaya; waa emeraludu be ephe doru iya. ¹²O be l'ogiri iya k'eto; o buru jiasintu; yee agetu; waa amitisutu be ephe doru iya. ¹³Teke o beru l'ogiri k'eno; bu kirisolayitu; yee onikusu; waa jiasupa be ephe doru iya. Ephe bya awua mkpola-ododo l'igburonu mkpuma ono.

¹⁴Iphe, o du bu mkpuma iri l'ebo. G'ephe ha nanu nanu no-chichaa ru enya epha unwu Izurelu. Ephe bya edechaa epha unwu Izurelu ono le mkpuma ono; o du g'iphe-ohubama nochia enya okpa-ipfu iri l'ebo ndu Izurelu. ¹⁵Ephe gude owu okpobe mkpola-ododo swishia gwogirigwo, ee-lipfubegbaa l'uwe-okpoma obu; mbu swishia ya; o du g'onye swiru udo. ¹⁶Ephe gude mkpola-ododo meta echi labo; yechaa l'ishi uwe-okpoma ono; ¹⁷bya eworu gwogirigwo pho libechaa l'echi ono, e yegbaaru l'ishi uwe-okpoma obu. ¹⁸Ephe bya ewota ishi gwogirigwo ono ishi iya ophu lipfubekwapho le mkpola-ododo pho, a wuru l'igburonu mkpuma labo pho, e lipfuberu l'eli uwe-ukuvu pho. ¹⁹Ephe bya egude mkpola-ododo meta echi labo ozo; lipfube l'ishi uwe-okpoma obu l'uzo ali. Ephe lipfuberu iya l'ime uwe-okpoma obu; ibiya ophu tukoru l'eli uwe-ukuvu pho. ²⁰Ephe bya egude mkpola-ododo metafua echi labo ozo; libechaa l'ishishi werere ekwa labo pho l'uzo ali iya; mbu werere ekwa ono, e liberu l'eli uwe-ukuvu ono. Ephe liberu iya temanu l'e rwua eka ono, a nmaru werere ekwa, a tu-butaru l'upfu uwe-ukuvu ono. ²¹Echi k'uwe-okpoma pho be ephe gude eri, e gude owu, du urwukpu-urwukpu swia; litachaa l'echi uwe-ukuvu obu; k'ophu oo-nodu le mgboru werere ekwa, atu-buta l'upfu pho; g'uwe-okpoma pho ta nodujeshi aku peepee l'eli uwe-ukuvu obu, bu iya bu ge Chipfu turu Mosisu onu g'e mee ya.

Uwe uke ozo

²²Ephe gude ekwa, du urwukpu-urwukpu mee uwe mgbalanu, ee-ye-je uwe-ukuvu ono l'eli iya. O buru onye maru ekwe ekwa ree kweru iya. ²³Ephe kweru iya; eka eepyoje iya ishi nodu iya l'echilabo; bya eswia igburonu iya onu g'eeswije olu uwe-a; g'o to lakahu. ²⁴Ephe gude owu, du urwukpu-urwukpu; waa ophu eke mee-mee; yee ophu du uswe-uswe; waa owu ocha, a swiru udo; metachaa iphe, dugbaa g'akpuru itorokuma; dophee onu uwe ono mgburugburu. ²⁵Ephe bya egude okpobe mkpola-ododo meshia okunmengu dophee igburonu uwe ono mgburugburu le mgbaka iphe ono, dugbaa g'akpuru itorokuma ono. ²⁶Okunmengu ono;

waa iphe ono, e meru; o du g'akpuru itorokuma ono; no-pee igburonu uwe ono mgburugburu. E dongakotaru phe edonga l'onu uwe ono, ee-yeje ejeru Chipfu ozi ono, bu iya bu ge Chipfu turu Mosisu onu g'e mee ya. ²⁷Ephe gude owu ocha kweeru Eronu; yee unwu iya uwe mgbalanu. O buru onye maru ekwe ekwa ree kweru iya. ²⁸Ephe gudekwapho owu ocha kwee okpulishe-ekwa ono; waa okpu ndu-uke ono; gude owu ocha, a swiru udo kwee nwiba ono. ²⁹Ephe gude owu ocha, a swiru udo; waa owu, du urwukpu-urwukpu; waa ophu eke mee-mee; yee ophu du uswe-uswe kwee ekwa-atu-butalupfu ono. O buru onye maru ekwe ekwa kweru iya; bya aburu ge Chipfu turu Mosisu onu g'e mee ya. ³⁰Ephe gude okpobe mkpola-ododo meta iphe, du g'okwekpu; dee ya iphe g'eedeje l'iphe-ohubama-a. Iphe, ephe deru iya bu: IPHE, DURU CHIPFU NSO. ³¹Ephe bya ewota eri, e gude owu, du urwukpu-urwukpu swia; libe l'iphe ono, du g'okwekpu ono; woru iya lipyabe l'atatiphu okpulishe-ekwa, bu iya bu ge Chipfu turu Mosisu onu g'e mee ya.

Mosisu eje agbaphe ulo-ekwa ono.

³²Nta-a be ulo-ekwa ono; mbu ulo-ekwa-ndzukọ ono be e meghewaru. Ndu Izurelu tukoueru iya pho mekota ge Chipfu suru Mosisu g'e mee ya. ³³Noo ya; ephe chita iphe ulo-ekwa ono g'o ha chitaru Mosisu; mbu ulo-ekwa ono; me ngwa iya, du g'iphe iya ono, nweru nkoloba ono; waa mgbo ono, ee-gude ku-chite ulo-ekwa ono; waa oshi ono, ee-gudegbaa swebushia le mgbo ono; waa itso iya ono; yee enya aka aa-kpobechaa itso ono; waa okpa mgbo ono.

³⁴Ephe chitakarupho akpo ebili ono, a tseru l'uswe, ee-gude kpua ulo-ekwa ono; waa akpo umoro-enyimu ono; waa ekwa ono, ee-gude kobuta aka-kakota-adu-nsọ ono; ³⁵waa okpoko-ekemu ono; yee mgboro ono, ee-gudeje apa iya ono; waa opfu okpoko ono, aa-noduje apfu ugwo iphe-aji ono; ³⁶waa teburu ono; yee ngwa iya; waa buredi ono, ee-dobeje l'iphu Chipfu ono; ³⁷waa iphe ono, aapfubeje oroku ono, e meru l'okpobe mkpola-ododo ono; waa oroku iya ono; yee ngwa iya; waa manu ono, ee-gudeje anwu oku ono; ³⁸waa oru-ngweja ono, e meru le mkpola-ododo ono; waa manu ono, aa-wu l'ishi ono; waa unwu-isensu ono, eshi mkpo ono; waa ekwa ono, ee-kochite onu-abata ulo-ekwa ono; ³⁹waa oru-ngweja ono, bu aka ee-gweje ngweja-akpo-oku ono, e gude onyirubvu mee ono; waa iphe iya ono, du g'ugbu ono; waa mgboro iya; yee ngwa iya g'o ha; waa eze gbamugbamu ono; yee iphe ono, aa-subeje iya ono; ⁴⁰waa ekwa ono, ee-gude gebuta oma-unuphu ono; yee itso iya; waa enya aka aa-kpobechaa itso ono g'o ha; waa ekwa, ee-gude gechite onu-abata oma-unuphu ono; waa eri iya; yee nggu iya; yee iphemiphe, ee-gude eje ozi l'ulo-ekwa ono; mbu ulo-ekwa-ndzukọ ono; ⁴¹waa uwe ono, e kweru ekwekwe, ee-yeje gude eje ozi l'ulo-nsọ ono; mbu uwe, du nsọ ke Eronu, bu onye uke;

yee k'unwu iya, ephe e-yeje m'ephe nodu eje ozi uke phe. ⁴²Ndu Ízurelu tukoephe iphemiphe ono mekota ge Chipfu turu Mosisu onu iya. ⁴³Mosisu bya elee enya l'ozi ono; huma l'ephe jekotaeru iya pho ge Chipfu suru g'e mee ya. Oo ya bu; o bya agoru onu-oma nu phe; gude kele phe ekele ozi ono, ephe jeru ono.

Akpobe ulo-ekwa ono

40 ¹Noo ya; Chipfu su Mosisu: ²“Kpobe ulo-ekwa ono; mbu ulo-ekwa-ndzuko; le mboku, onwa mbu fuerupho. ³Paru okpoko-ekemu ono sibe iya l'ime; li wota ekwa ono gude kobuta iya. ⁴Li pabata teburu ono; yee ngwa iya. Li pabatakwaphe iphe ono, aapfubeje oroku ono; dozichaa oroku, du iya nu. ⁵Li patakwaphe oru-ngweja-unwu-isensu ono, e meru le mkpola-ododo ono; sibe l'ataphu okpoko-ekemu ono; gude ekwa ono kobuta onu-abata ulo-ekwa ono.

⁶“Li sibe oru-ngweja ono, bu aka ee-gweje ngweja-akpo-oku ono l'ataphu onu-abata ulo-ekwa ono; mbu ulo-ekwa-ndzuko ono. ⁷Li pata eze gbamugbamu ono sibe le mgbaka ulo-ekwa-ndzuko ono; yee oru-ngweja ono, bu aka ee-gweje ngweja-akpo-oku ono; kuru mini ye iya. ⁸Li chita ekwa oma-unuphu ono gude kobuta oma-unuphu mgburugburu; wotakwaphe ekwa onu-abata oma-unuphu ono kochite onu-abata iya. ⁹Li wota manu ono, aa-wu l'ishi ono; wua l'ulo-ekwa ono; yee iphemiphe, nokota iya nu; shi nno doo yee iphemiphe, no iya nu nsu; g'o du nsu. ¹⁰Li wukwaphe oru-ngweja ono, bu aka ee-gweje ngweja-akpo-oku ono manu; yee ngwa iya g'o ha; shikwaphe nno doo ya nsu; g'o buru iphe, du nsu shii. ¹¹Li wukwaphe eze gbamugbamu ono; yee okpa iya manu; shi nno doo ya nsu.

¹²“Li duta Eronu; yee unwu iya bya l'onu-abata ulo-ekwa-ndzuko ono; wua phe eh. ¹³Li chita uwe ono, du nsu ono yee Eronu; wua ya manu l'ishi gude doo ya nsu; k'opu oo-buru onye uke; jeeru mu ozi. ¹⁴Li dutakwaphe unwu iya yeshia phe uwe mgbalanu phe. ¹⁵Li wua phe manu l'ishi g'i wuru nna phe; g'ephe buru ndu-uke jeeru mu ozi. Manu ono, ji-wu phe l'ishi ono e-me phe; g'ephe buru ndu-uke; e -shi l'ogbo sweru ogbo.” ¹⁶Mosisu tuko iphemiphe mekota ge Chipfu turu iya onu g'o mee ya.

¹⁷O be l'apha k'ebo le mboku, onwa mbu furu; e woru ulo-ekwa ono kpobe. ¹⁸Mosisu woru enya aka aa-kpobechaa mgbo ulo-ekwa ono; waa itso iya; pfubegbaa; bya akpobe iya mgbo ono; bya eye iya iphe ono, ee-gude swebushia le mgbo ono; bya kpobekwa iya pho itso ono; shi nno kpobe ulo-ekwa ono teke ono. ¹⁹O wota ekwa ono phushi l'eli ulo-ekwa obu; bya achita iphe phu-chite ulo-ekwa ono, bu iya bu ge Chipfu suru g'e mee ya. ²⁰O pata ekemu ono ye l'ime okpoko ono; woru mgboro iya ono pyochaa l'okpoko ono; bya apata opfu okpoko ono, aa-nodu apfu ugwo

iphe-eji ono; sùbe iya l'eli. ²¹Ọ gbẹ teke ono pata okpoko ono pabata l'ùlo-ẹkwa ono; bya eworu ẹkwa ono kobuta okpoko-ekemu ono, bụ iya bụ gẹ Chipfu tũru iya ọnu g'o mee ya. ²²Mósisu bya apata teburu ono sùbe l'ùlo-ẹkwa-ndzukọ ono l'uzo isheli; l'okotazụ ẹkwa, e gude kobuta ẹka-ka-kọta-adu-nsọ ono. ²³Ọ woru buredi ono dobe l'atatiphu Chipfu, bụ iya bụ gẹ Chipfu tũru iya ọnu g'o mee ya. ²⁴Ọ pata iphe ono, aapfubeje orọku ono sùbe l'ùlo-ẹkwa-ndzukọ ono l'uzo ndohali; yele teburu ono ghagbabe iphu; ²⁵bya anọdu l'iphu Chipfu l'eka ono mezichaa orọku, dũ iya nũ, bụ iya bụ gẹ Chipfu tũru iya ọnu g'o mee ya. ²⁶Ọ patakwapọ ọru-ngweja ono, e meru lẹ mkpọla-ododo ono sùbe l'atatiphu ẹkwa ono, e gude kobuta ẹka-kakọta-adu-nsọ ono; ²⁷bya akpọ ùnwù-isensu ọku l'ọru-ngweja ono, bụ iya bụ gẹ Chipfu ziru iya g'o mee ya.

²⁸Ọ wota ẹkwa ono gude kochite ọnu-abata ọlo-ẹkwa ono; ²⁹bya eworu ọru-ngweja ono, bụ ẹka ee-gweje ngweja-akpọ-ọku ono sùbe lẹ mgboru ọnu-abata ọlo-ẹkwa-ndzukọ ono; bya egweeru Chipfu ngweja-akpọ-ọku; yee ngweja-nri l'ọru-ngweja ono, bụ iya bụ gẹ Chipfu tũru iya ekemu g'o mee ya. ³⁰Ọ bya apata eze gbamugbamu ono sùbe lẹ mgbaka ọlo-ẹkwa-ndzukọ ono; yee ọru-ngweja ono, bụ ẹka ee-gweje ngweja-akpọ-ọku ono. ³¹Ọ bũru eze gbamugbamu ono bẹ Erọnu yee unwu iya; waa Mósisu gude kwọ ẹka; yee ọkpa. ³²Ọ nọdu abujeru; ephe -mee g'ephe bahũ l'ùlo-ẹkwa-ndzukọ ono; ọzoo g'ephe kpĩritaru ntse l'ọru-ngweja ono, bụ ẹka eegweje ngweja-akpọ-ọku ono; ephe akwọadaa ẹka yee ọkpa, bụ iya bụ gẹ Chipfu tũru pẹ ekemu g'ephe meje iya. ³³Mósisu bya achitakwapọ ẹkwa ọma-unuphu ono gude kobuta ọma-unuphu ọlo-ẹkwa ono yele ọru-ngweja ono mgburugburu; wotakwapọ ẹkwa ọnu-abata ọma-unuphu ono kochite ọnu-abata iya. Ọ bũru iya bụ lẹ Mósisu ejeghee ozi ọbu.

Akpabiri Chipfu

³⁴Noo ya; urwukpu ono bya asọ-kpute ọlo-ẹkwa-ndzukọ ono; akpabiri Chipfu bya eji ọlo-ẹkwa ono ejiji. ³⁵Ọphu Mósisu adukpodanu ike ye ishi l'ùlo-ẹkwa-ndzukọ ono; noo kele urwukpu sọ-kputeru iya; teme akpabiri Chipfu ji ọlo-ẹkwa-ndzukọ ono ejiji. ³⁶Ndu Ízurelu nọdu abujeru; teke urwukpu ono wukahuru l'eli ọlo-ẹkwa ono; ephe akwalia. ³⁷Teke urwukpu ono atugbuduru; ephe anọdu l'eka ephe nọ gbiriri jasũ mbọku, urwukpu ono a-tugbu. ³⁸Ọo ya bũ; urwukpu Chipfu, nọ asọ-kputajẹ ọlo-ẹkwa ono l'eswe; teke o beru l'enyashi l'o nwuahaa g'ọku l'atatiphu ndu Ízurelu. Ọ bũru g'o mekọtaru bũ ono jasũ ndu Ízurelu jeghee ije pẹ ono.